

**NATIONAL ASSEMBLY OF
SEYCHELLES**

Tuesday 05th March 2024

The Assembly met at 0900am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab. Bonzour nou bann zofisyé Lasanble. Bonzour nou piblik ki pe swiv nou a lekout. Byenveni pour nou travay ozordi. Nou a konmans avek prezantasyon Papyé, Madanm Clerk?

MADAM CLERK

Mersi Mr Speaker. Bonzour Mr Speaker. Bonzour tou bann Manm, tou bann staff Lasanble, tou bann dimoun ki a lekout. Bann Papyé ki pe ganny prezante i;

S.I. 102 of 2023 Land Reclamation (Retrospective Authority) (No.5) Order, 2023

S.I. 103 of 2023 Public Finance Management (7 December

Disaster Fund Bank Accounts) Regulations, 2023

S.I. 104 of 2023 Stamp Duty (Exemption) (Amendment) (No.2) Order, 2023

S.I. 105 of 2023 Licences (Trade) (Amendment) (No.2) Regulations, 2023.

S.I. 106 of 2023 Co-operatives (Cleaners' Co-operative) (Dissolution) Order, 2023

S.I. 107 of 2023 African Development Bank Loan Agreement Debt Order, 2023

S.I. 108 of 2023 Anti-Corruption (Salary and Allowances of Commissioner, Chairperson and Members of Advisory Council) (Amendment) Regulations, 2023

S.I. 109 of 2023 Licences (Road Transport) (Amendment) Regulations, 2023

*S.I. 110 of 2023 Excise Tax (Rates) Regulations, 2023
And*

S.I. 111 of 2023 Excise Tax (Remission, Rebate and Refund) Regulations, 2023. Mersi Mr Speaker.

MR SPEAKER

Mersi Madanm Clerk. Nou a prosede avek *Private Notice Question*. Mon a demann madanm raporter pou apel Vis-Prezidan silvouple.

Bonzour Vis-Prezidan Ahmed Afif e byenveni dan Lasanble pour ou partisipasyon dan *Private Notice Question*. Mon ava envit *Leader* Lopozisyon Onorab Sebastien Pillay pou met son kestyon silvouple. Onorab Pillay?

HON SEBASTIEN PILLAY

Mersi Mr Speaker, bonzour. Bonzour tou koleg Onorab e bonzour tou dimoun ki a lekout e ki pe swiv nou. Bonzour Vis-Prezidan dan Lasanble Nasyonal. Mr Speaker, mon kestyon i lir koumsa;

Lekel ki ti pran sa desizyon pou Sesel form par loperasyon *Prosperity Guardian* dan Lanmer Rouz e ki kalite konsiltasyon ti annan avan ki sa desizyon in ganny pran? Mersi Mr Speaker.

MR SPEAKER

Mersi Onorab. Vis-Prezidan, ou repons silvouple?

VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour tou bann Manm Onorab. Mr

Speaker avek ou permisyon, permet mwan – aköz i mon premye fwa dan Lasanble depi Leta Lanasyon, senpleman pou dir en parol *welcome* sa 2 nouvo Manm Lasanble Nasyonal; Onorab Rachel Spiro e Onorab Anne Bistoquet.

Byenveni e mon swet zot tou de byen. E fotespere ki zot ava partisip konman Manm Lasanble alaoter ekspekte e Lasanble Nasyonal e pep Seselwa.

Mon ti a kontan osi zis remersye tou bann Manm lo lapar Gouvernman ki'n fer zot repons pour SONA. Gouvernman i reste *committed* pou travay pour pep Seselwa.

Mr Speaker, pou reponn sa *PNQ*, Onorab in demann en kestyon; lekel ki'n pran sa desizyon? Larepons mon krwar i devret evidan.

Se Gouvernman Sesel, ki en Gouvernman souvren e ki annan pouvwar pou fer en tel desizyon ki konsern en size sekirite, ki'n pran sa desizyon. Osi senp ki sa.

E nou konn byen Mr Speaker, ki kot i konsern sekirite nasyonal dan en lanvironnman dinamik e sansib, sa eleman sekirite i reste konfidansyel. E ki Leta pa oblize konsilte personn apard ki son bann eleman sekirite

nasyonal. E selon son pouvwar Egzekitif ki'n ganny mandate pour li annan. Mersi Mr Speaker.

MR SPEAKER

Mersi Vis-Prezidan. Nou pou pran Kestyon Siplemanter lezot Manm ziska 9er45 apepre. E apre nou a pran siplemanter *Leader* Lopozisyon. Onorab Cosgrow i kapab konmanse.

HON WALLACE COSGROW

Mersi. Bonzour Mr Speaker. Bonzour Vis-Prezidan. Mersi Mr Speaker pour donn mwan laparol bomaten. Mr Speaker, en kestyon ki leve bomaten la apre ki mon ekout larepons Vis-Prezidan lo sa kestyon anmennen par *Leader* Lopozisyon.

Vis-Prezidan i dir nou ki poudir sete en desizyon Gouvernman. Me, eski Vis-Prezidan i kapab dir nou aköz? E ler i dir en desizyon Gouvernman, mon pe mazine en desizyon *Cabinet* Minis. An konsiltasyon avek *Cabinet* Minis se en *approval*.

Me aköz ki ni menm Minis *Foreign Affairs*, ni menm Minis *Internal Affairs* pa ti okouran sa desizyon? E i paret mwan menm Prezidan in tann sa desizyon lo televizyon.

So eski Vis-Prezidan i kapab dir nou aköz ki sa de Minis pa ti okouran, vi ki i konsern zot osi zot *portfolio*?

E eski Vis-Prezidan pe dir nou ki poudir sa desizyon pa pe afekte souvrennte Sesel, aköz ozordi limaz Sesel konman en pei nonnalinyen in ganny afekte. E limaz Sesel e Seselwa ozordi pe ganny *tarnished* enternasyonalman par bann diferan pei? Nou'n ganny diferan...

MR SPEAKER

Ou'n demann ou kestyon Onorab, silvouple pa fer *speech*. Pa fer en *speech* silvouple.

HON WALLACE COSGROW

Mon kapab fini?

MR SPEAKER

Termin sa fraz.

HON WALLACE COSGROW

Ok, mersi. E eski Vis-Prezidan pa krwar ki poudir limaz Sesel, souvrennte Sesel, pa pe ganny afekte dan sa desizyon ki swadizan Gouvernman *Cabinet* in pran? Mersi bokou Mr Speaker.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Onorab, ou premye – mon premye komanter lo ou premye bout se, mon'n deza reponn sa kestyon.

Se Gouvernman ki'n pran sa desizyon. E ler i fer konsiltasyon lo sekirite nasyonal, i konsilte tou son bann *organ* sekirite. Se en desizyon Gouvernman Sesel.

Eski i afekte nou limaz? Zimaz Sesel i toultan en zimaz kot nou en pei nonnalinyen. Nou pozisyon dan plizyer konfli i kler, enkli konfli dan Mwayen Oriyan.

Kot nou'n dir nou, nou siport en solisyon ki annan de Leta. Nou kont atosite kont nenport ki sivilyen. Nou kont sa. Nou'n etabli menm pozisyon dan lager *Ukraine*. E nou kont atosite, nou kont en lenvazyon. E nou promouvwar lape.

Mon krwar Sesel i en pei ki depi 2009 – mon repete, 2009, nou form parti sa lorganizasyon ki ozordi zot pe demann kestyon lo la, ki apel *Combined Maritime Force*.

E ler nou ti form parti an 2009, Gouvernman ti dir atraver Minis pour Zafar Enteryer sa letan, poudir wi, i annan en risk pour Sesel. Me

selman, nou debout pour nou prensip.

E nou prensip Sesel se pa kont okenn group arme ou militer pour pei. Nou prensip se nou anvi protez nou larout maritim. Nou protez semen ki anmenn manze pour Sesel. Se sa ki nou debout. E nou pe fer sa depi 2009.

Nou osi protez an menm tan ki nou pe fer sa, tou bann aksyon kont piratri. Tou bann aksyon kont aksyon militer. Tou bann aksyon kont bann dimoun ki pe fer bandisite, tel ki trafik drog dan nou delo. Se sa.

Nou dan sa loperasyon, nou napa avyon. Dan Lanmer Rouz, nou napa bato, nou napa zonn. Me, parey nou'n fer depi 2009, nou loperasyon i enkli partaz lentelizans. Ganny lentelizans. Ganny *training*.

E tousala, konman nou pe koze la, i annan en *training* ki pe fer avek plizyer Lafors Ameriken, Endyen, eksetera - ki nou pe fer. E ki tousala i form parti komitman Sesel pou protez son teritwar. Se tou ki nou pe fer.

Nou zimaz, wi. Petet i annan dimoun ki kapab get li koumsa. Me selman, Sesel nou resevwar konman touris; Larisi, Ikrenyen, Arab, Izraelyen. Nou resevwar Ameriken. Nou

resevwar Eropeen. Nou resevwar dimoun dan tou parti lemonn kot i annan konfli.

Me selman, byensir, nou form parti kominote enternasyonal, i annan en risk dan tou sa ki ou fer. Me selman i bezwen en risk balanse. E se pour sa rezon ki isi Sesel nou annan nou bann antite ki zot louvraz se evalye sa bann risk e toultan met Gouvernman azour.

E nou pran bann mezir, ki pa neseserman ki ou koz lo la. Be selman se sekirite nasyonal ki nou fer sir ki nou pei i reste tou kou dan en fason sen e sof. E nou protez nou sivilyen.

Pa bliye osi poudir en eleman sekirite se fer sir ki manze i ariv kot ou. Sa osi i form parti sekirite. E i ariv kot ou a en pri abordab. Sa osi i nou rol. Nou bezwen fer sir nou zwe nou rol. Mersi bokou Mr Speaker.

MR SPEAKER

Mersi. Onorab Cosgrow, mon krwar ou 2 pwen dan ou kestyon in ganny reponn. Alor permet mwan pran kestyon lezot Manm. Si nou annan letan, nou a retourn kot ou. Onorab Loze silvouple?

HON JOHAN LOZE

Mersi Mr Speaker. Mr Speaker, Vis-Prezidan in fer referans lo nou pozisyon nonnalinyen.

E mon krwar i ava korek poudir ki sa Polisi nonnalinyen ki Sesel in annan pandan plizyer lannen, in nou pli gran fason protez nou lekor. Be la ki nou'n al melanz nou dan keksoz ki pa konsern nou...

MR SPEAKER

Onorab, ou pa pe poz kestyon silvouple! Ou pe – poz kestyon. Ou pe anmenn en largiman lo Polisi anver Minis. Silvouple, al lo ou kestyon. Mersi.

HON JOHAN LOZE

Mersi Mr Speaker. Bon, la ki nou'n melanz nou dan keksoz ki pa konsern nou, eski sa pou met an kestyon nou kapasite pou defann nou lekor konman en pti pei ki pa militarize lo nivo, petet pou fer fas avek en latak teroris?

E mon annan mwan zis en lot kestyon, Mr Vis-Prezidan;

Eski nou pa'n ti'n kapab fer lesanz lenformasyon? Eski nou pa ti'n kapab fer *training* parey Vis-Prezidan pe dir, parey nou'n fer depi avan, san ki nou'n al melanz nou dan zafer granmoun ki pa konsern nou?

MR SPEAKER

Bon, 2 kestyon silvouple. Mersi. Vis-Prezidan, ou repons?

VICE-PRESIDENT AHMED AFIF

Mersi bokou Mr Speaker. Mersi Onorab. Onorab, Sesel i annan en lafors ki i annan son limitasyon. I en lafors ki'n reste parey pour plizyer lannen. Menas ki sa lafors i fer avek vizavi bann – tou kalite lafors ki annan aletranze, i reste parey ozordi. Mon pa war naryen ki'n sanze.

Ler nou ti pran desizyon – e sete pa sa Gouvernman, sete en Gouvernman avan, pou ziz pirat Somalyen Sesel. Menm ki zot pa'n fer krim dan nou delo. Eski zot pa ti kapab demann menm kestyon? Eski Sesel ti an risk en lenvazyon par bann pirat Somalyen? Wi.

Me, se pourtan nou ti krwar dan defans nou teritwar, dan defans nou landrwa e fer sir ki nou, nou debout pour *rule of law*. Ki nou pa ti dakor ki i annan dimoun ki kas Lalwa, enkli dan nou pei. E nou ti pare pou travay ek tou lafors ki pe ed nou pour nou defann nou teritwar. Se sa ki nou'n fer.

Risk pou toultan annan. Me nou, nou bezwen pran bann desizyon ki brav, pour nou protez nou larout maritim. Pa bliye, nou en pti pei avek en

gran teritwar delo sale. En lespas maritim. E nou bezwen protez li.

Eski, nou ti'n devret fer li trankilman? Be, nou form parti *Combined Maritime Force* depi 2009. Loperasyon ki nou pe koz lo la anba sa kestyon, i senpleman anba parasol *Combined Maritime Force*. Alor, nou form parti. Napa naryen nouvo.

Nou form parti sa parasol 41 pei, e Sesel i ladan. Pa fer okenn diferans si zot nonmen, parske lemonn i konnen poudir nou form parti *Combined Maritime Force* depi 2009. Mersi bokou.

MR SPEAKER

Mersi Onorab Loze. Permet mwan pran kestyon lezot Manm. Ou kestyon in ganny reponn. Onorab Henrie?

HON GERVAIS HENRIE

Mersi Mr Speaker. Bonzour tou dimoun e *welcome VP*. Mr Speaker, mon profite osi pou remersi tou bann Lazans Gouvernmental ki'n ed distrik Mont Buxton pandan *weekend* swivan bann sityasyon gro lapli.

Mon premye kestyon Mr Speaker, i refer lo depi ler ki Sesel ti ofisyelman enform piblik an Oktob, 2012 poudir i form parti sa *Combined*

Maritime Forces. En deklarasyon fer sa letan par Minis Zafer *Home Affairs and Transport*, Mr Joel Morgan;

Ti dir ki sa in konfirm reasirans ki bann pouvwar dan larezyon i annan pou envit Sesel form parti sa *CMF*.

Eski *VP* i kapab konfirman alor, par lefe ki Sesel ozordi i ankor form parti sa lafors. I montre poudir nou ankor ganny regarde konman en pei ki angaze...

MR SPEAKER

Pa en *long speech* silvouple Onorab.

HON GERVAIS HENRIE

Ki pou konbat...

MR SPEAKER

Poz ou keston.

HON GERVAIS HENRIE

...bann keksoz mal ki pe arive dan nou rezyon. E dezyenman; eski ou kapab konfirman poudir Sesel son Polisi nonnalinyen i pa'n sanze? Mersi.

MR SPEAKER

Mersi Onorab. *VP*?

VICE-PRESIDENT AHMED AFIF

Mersi bokou Mr Speaker. Mersi Onorab. Wi Onorab, lefet ki depi 2009 nou'n pronons nou lekor dan fason tre kler kot i konsern piratri, aktivite ilegal dan lanmer. E sirtou dan lanmer Sesel.

E ki nou'n donn en koudmen pour nou partisip ansanm avek plizyer lezot nasyon, ki osi krwar parey nou ki nou devret gard nou losean san okenn pirat, san okenn aktivite ilegal. Nou devret travay ansanm.

Wi, nou repitasyon definitivman i bon. E nou ganny respekte pour nou pozisyon ozordi par bokou sa bann pei. Zot krwar poudir nou en pei ki annan prensip. Zot krwar poudir nou en pei ki ler i dir en keksoz, i fer, i met ann aksyon son panse.

E alor, mwan mon krwar Sesel i ganny respekte pour son desizyon ki in pran. Eski nou form parti bann pei nonnalinyen? Wi, nou prensip pa'n sanze. Nou pa form parti okenn blok militer.

Nou en pei ki krwar dan lazistis. Ki krwar dan son pep. Ki krwar dan lape. E nou pozisyon in tre kler atraver plizyer rankont kot nou fer, dan tou *meeting* ki nou fer, dan tou diskour ki nou fer, nou

pozisyon i reste parey. Nou reste en pei nonnalinyen.

Me, kot i konsern protez nou larout maritim e kot manze i pase, nou pou fer tou pour nou protez li. Mersi bokou.

MR SPEAKER

Mersi Vis-Prezidan. Onorab Vidot?

HON AUDREY VIDOT

Mersi Mr Speaker. Bonzour Mr Speaker, Vis-Prezidan, tou Manm Onorab e tou manm piblik ki a lekout.

Mr Speaker, nou rekonnet ki Vis-Prezidan i annan lekonomi lo laverite. Alors, eski Vis-Prezidan i kapab dir avek nou Lasanble, akoz desizyon son Ladministrasyon ankor enn fwa, pe kree en lot lanbarasman pour Sesel?

E kot Vis-Prezidan ek Prezidan i kontinyen pa tous tou laverite avek pep Seselwa? Mersi.

MR SPEAKER

I annan serten bout dan ou kestasyon ki mon pa'n tro konpran, be mon a les Vis-Prezidan adrese. Vis-Prezidan, adres kestasyon ki ou krwar i valab, merite. Bann komantr ki mon pa'n tro konpran mwan osi, silvouple zis evite.

VICE-PRESIDENT AHMED AFIF

Mr Speaker, mon plito krwar Onorab in anbaras son lekor. Nou pa anbarase pour sa ki nou'n fer. Mersi.

(laughter)

MR SPEAKER

Ok. Tre byen. Onorab Arissol?

HON SANDY ARISSOL

Mersi Mr Speaker. Bonzour tou dimoun. Mr Speaker, mon ti a kontan letan nou lo sa size – Sesel ti form par lager mondyal en lepok. E nou ti menm al lager kont bann piratri.

Alor mon ti a kontan demann avek Vis-Prezidan; anvi ki la nou form parti sa lekip ki nou pe koz lo la, *Combined Maritime Forces*, lekel ki ti anmenn nou premyerman dan sa lanbara ki mon tann bann Manm pe koz lo la? Lekel ki ti anmenn nou? Ki Gouvernman? Ki lannen?

Nou'n antre dan sa lanbara, sa bann zafer granmoun ki mon'n tann koz lo la, ki nou pa devret antre ladan. Mersi bokou.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Sa ki mwan mon konnen se ki, Gouvernman dizour sa letan an Oktob 2009, ti anmenn Sesel pou vin en manm *Combined Maritime Force*.

2009, Minis Enteryer ti Minis Joel Morgan. Prezidan sa lepok sete Prezidan James Michel. Sete zot ki ti met Sesel dan *Combined Maritime Force*, ki nou reste ziska ozordi. E rasyonnal ki zot ti servi se ki nou bezwen protez nou lespas maritim. Nou bezwen lager kont piratri. Nou bezwen lager kont aktivite ilegal.

E vi ki nou napa mwayen konman en pti pei pour nou fer sa nou tousle, e nou teritwar i gran, nou bezwen konmsi ganny en koudmen, donn en koudmen tou bann lafors ki pli gran ki nou;

Pour nou ganny lentelizans. Pour nou ganny lenformasyon. Pour nou ganny teknik led militer pour nou kapab fer sa travay. Se pour sa rezon ki Sesel i la. Mon krwar ti en desizyon ki ti bon.

E se pour sa rezon ki nou konman en Gouvernman ki nou la ozordi, nou pe tenir anba *Combined Maritime Force* akoz nou konnen poudir anba la,

Sesel pe benefisye. Nou bann lafors pe ganny *training*. Marmay ozordi, dan sa dernyen 3an zot in vwar zot menm ki kantite benefis e ki degre avanse nou lafors i ete. Zis 3 semenn pase, nou'n aret en Dav ki ti'n ganny pirate par Somalyen, e ti annan *Sri Lankan aboard* ki'n antre dan nou delo. E ankor enn fwa, sete nou zefor pour nou kapab fer en konbat kont piratri. E nou'n anmenn sa bann dimoun isi. Zot pe ganny size.

Ankor enn fwa, Sesel, pa en lanbara. Tou bann pei i respe Sesel parske zot konnen si ou antre dan nou delo, ou pa konnen ki ou pe fer, ou pou ganny tyonbo. E ou pou ganny zize. Si ou pe anmenn drog, ou pou ganny tyonbo, ou pou ganny zize. Pa vin zwe dan nou delo. Mersi bokou.

MR SPEAKER

Mersi Vis-Prezidan. Onorab Aglae?

HON EGBERT AGLAE

Mersi Mr Speaker. Bonzour Vis-Prezidan e tou dimoun a lekout. Vis-Prezidan, dan ou larepons ou'n dir ki se Gouvernman ki'n pran desizyon. E dan larepons *SONA*, Prezidan in fer resorti ki Gouvernman se nou.

Alors, baze lo sa, eski ou pe dir nou ki lamazorite pep Seselwa ki modaryer zot pa an faver sa lantrenman Sesel ki'n antre dan sa Lagreman;

Eski ou pe dir pep Seselwa antye in dakor, ouswa se ki *Cabinet* Gouvernman ki'n pran sa desizyon? Sa i enn.

Dezyenmman; eski lefe ki Sesel in antre dan sa Lagreman, eski se sa rezon ki *Air Seychelles* ozordi i war li pa pe kapab fer bann *flight* Izrael? E menm bann bato *flagship* Sesel ki pas dan Lanmer Rouz, i bezwen dir pou dir i napa okenn lafilyasyon avek Izrael, ki pe met an danze sa bann kalite aktivite? Mersi.

MR SPEAKER

Mersi. Mon a note ki ou dernyen pwen i al totalman an deor kestyon Sesel Onorab. Me selman i annan 2 pwen ki ou'n fer ki *VP* i kapab adrese. *VP*, ou repons?

VICE-PRESIDENT AHMED AFIF

Mersi bokou Mr Speaker. Mersi Speaker, mon'n fini reponn premye kestyon. Set en desizyon Gouvernman Sesel. Gouvernman i fer en desizyon baze lo son manda. I annan serten...

MR SPEAKER

Onorab, silvouple, ou'n demann en kestyon. Ou a les li reponn.

VICE-PRESIDENT AHMED AFIF

I annan serten desizyon ki Gouvernman i fer plizyer konsiltasyon. Par egzanp; ler ou pe amann en *Civil Code*, eksetera. Ler ou pe prezant serten Lalwa ki ase diferan, ki annan bann gran prensip ki ou ti a kontan diskite. Wi.

Me, i annan serten desizyon – e sirtou kot i konsern sekirite nasyonal kot i annan en eleman sekirite e konfidansyalite, ki annan ki Gouvernman i pran en desizyon en lot fason.

E selman i gard tou son bann eleman. E bann antite sekirite zot, zot okouran. E zot in etablir tou bann risk e zot fer li dan en fason kordinen.

Set en Gouvernman ki'n ganny elekte pou deside. E i pe deside. I annan desizyon ki i fer li avek tou dimoun. I annan desizyon ki i bezwen pran pour rezon sekirite ki i pa vin diskite o piblik. E se sa mon premye larepons.

An sa ki konsern bato ki pe pase. Nou bato, nou annan 4 ki fer plizyer larout. Parey tou larestan bato, i fer fas ek menm

menas. Menm menas ler zot pas dan Lanmer Rouz. Tou bato i fer sa larout e zot swiv menm menas.

Me nou bato i ankor pe fer plizyer larout dan Lerop. Laplipar son larout i laba. E nou'n pronons nou lekor kont Larisi dan lager *Ukraine*. Me nou bato i ankor pe al Larisi. E i anmas delwil i anmenn Lerop. I ankor pe fer sa.

Alor, parey nou laliny aeryen, i pas partou. I annan defwa pour rezon komersyal, ki zot arete, zot pa al serten landrwa. Sa se desizyon komersyal.

Pou annan en moman letan ki zot a kontinyen fer lezot pei, ki enkli Izrael, ler letan apropiye. Sa sete en desizyon komersyal, operasyonnel ki ganny fer par sa bann lazans.

Sekirite, nou pou bezwen evalye li toulezour. Me selman nou prensip pour nou defann nou teritwar, i reste sakre. Mersi bokou Mr Speaker.

MR SPEAKER

I annan en pwen *VP*, ki mon krwar i relevan avek bann repons ki ou'n donner. E sa se *Air Seychelles*, *Israel*. Si ou ti kapab zis adres sa kestyon?

VICE-PRESIDENT AHMED AFIF

Mersi bokou Mr Speaker. Wi, pour rezon sekirite ti annan en letan ki *Air Seychelles* ti sispann son loperasyon Izrael. Mon mazine zot a evalye sa sityasyon.

E lemoman ki zot santi sekirite i sa nivo ki zot ekspekte pour zot konmans bann vol, zot a fer li. Me sa i en desizyon komersyal. I en desizyon operasyonnel. E si fodre ki zot konsilte Gouvernman osi, zot kapab fer li. E sa i ava kontinyen.

Me selman, i napa naryen pou fer avek en desizyon kot i konsern sekirite ki Sesel in pran, ki pou afekte loperasyon *Air Seychelles*. Mersi.

MR SPEAKER

Mersi *VP*. Onorab William?

HON WAVEN WILLIAM

Mersi Mr Speaker. Bonzour tou dimoun ki a lekout. Bonzour *VP*. Mr Speaker, mon ti ava kontan demann Minis, si i kapab konfirm ek sa Lasanble, si parmi sa 120 manm nonnalinyen e 27 manm obzervater, si Gouvernman Sesel in ganny okenn rapor ki i pe ganny retire konman en manm?

E dezyenmman, eski enternman Sesel, bann kor diplomatik, zot in apros

Gouvernman pou dir li ki i pe mal fer vizavi sekirite son pei? Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab, i en bon kestyon. Non, pour premye kestyon; eski mouvman nonnalinyen in trouv li konmsi nou pe kas – vyol nou komitman anver zot? Non ditou. Personn pa'n kontakte nou lo la.

Eski bann pei ki Sesel, oubyen ki nou zanmi avek ki isi, in reprimann nou pour nou pozisyon? Non. Aktyelman i le kontr.

Zot in felisit nou ki nou pe montre nou pozisyon tre kler vizavi bann aksyon ilegal lo lanmer. E zot felisit nou pour sa zefor ki nou pe fer pou ede pou anmenn lape dan sa landrwa, e fer sir ki nou larout maritim i ganny proteze. Mersi bokou.

MR SPEAKER

Mersi Vis-Prezidan. Onorab Georges?

HON BERNARD GEORGES

Mersi Mr Speaker. Bonzour Mr Speaker. Bonzour Vis-Prezidan e tou nou bann koleg. Mr

Speaker, mon kestyon pour Vis-Prezidan i konm swivan;

La ki nou'n aprann ki nou'n antre dan sa *Combined Maritime Force* an 2009, ler Prezidan Sesel ti Mr James Michel; e ki mwan antan ki en Manm Lasanble Nasyonal an 2009, mon pa rapel okenn konsiltasyon, ni avek Lasanble, ni avek okenn Seselwa.

Mon kestyon se; eski – eski sa bann zafer granmoun ki pa konsern nou, parey in ganny dir par Lopozisyon bomaten a plizyer repriz – eski, Sesel i konsernen par sa ki pe arive dan mwayen nouriyen e dan *Red Sea* ozordi?

Eski Sesel i konsernen? Eski i annan en lenpak direk lo nou ki fer li normal e neseler pour nou kontinyen dan sa *Combined Maritime Force* ozordi? Mersi Mr Speaker.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Eski Sesel i konsernen? Onorab, nou tre konsernen. Tre, tre konsernen. Parske, nou leksportasyon bwat ton ki al prensipalman ver Lerop, son larout pli kourt i atraver Lanmer Rouz.

Lot pozisyon, se i kapab fer letour Sidafrik. I fer sa *freight* monte bokou plis. Nou pa pou osi konpetitiv borde i ariv Lerop. Be, nou tre konsernen akoz sa.

E tou nou lenportasyon, nou manze sirtou, kantite i sorti mwayen nouriyen. I ganny transborde mwayen nouriyen. E i annan en kantite ki sorti Lerop, sirtou fri ek legim, eksetera. E zot pas lanmenm. I annan ki vin par avyon. Alor sa i ed nou. Me en kantite i vin atraver sa ki nou apel, *refrigerated containers* ki vin Sesel.

Byensir, pri sa bann *container* i pou konmans monte. In deza konmans monte. E si nou, menm lo en pwennvi moral, nou pa eksprim sipor pour bann zefor pou fer sir ki sa larout i sen e sof - nou pa pe zwe nou rol. Nou pa pe zwe nou rol pour nou ede fer desann kou transportasyon. Nou pa pe ede pour nou fer sa.

E nou pou senpleman les ariv en sityasyon kot *freight* pou monte. Nou, nou pa pe fer naryen ladan. E demen se vant Seselwa ki pou santi sa kou. E alor nou, nou devret fer sir poudir nou zwe nou rol, aktiv, kler e met nou prensip devan. E tou dimoun i a respe sa. Mersi bokou.

MR SPEAKER

Mersi Vis-Prezidan. Onorab Bistoquet?

HON ANNE BISTOQUET

Mersi Mr Speaker. Mr Speaker, Vis-Prezidan in anonse ki sa *Combined Task Force 153* ti ganny kree an 2009. E nou'n tann dir pou dir ti napa okenn konsiltasyon sa voyaz pour rezon sekirite nasyonal.

Mon ti a voudre ki Vis-Prezidan i enform sa Lasanble, si depi an 2009 ki sa *task force* in kree, si in annan okenn rikord konmkwa parey tel ki piratri ki nou'n al defann, si in annan okenn konsiltasyon piblik, e kote ti fer? Mersi.

MR SPEAKER

Mersi Onorab. Vis-Prezidan?

VICE-PRESIDENT AHMED AFIF

Mersi bokou Mr Speaker. Mersi Onorab. Mwan mon pa rapel okenn konsiltasyon ki'n deza ganny fer pour nou form parti *Combined Maritime Force*. Mon pa okouran. E mon konnen...

MR SPEAKER

Mersi.

VICE-PRESIDENT AHMED AFIF

Mon mazin en ti napa okenn sa bann konsiltasyon. Set en desizyon sekirite.

(Interruption)

VICE-PRESIDENT AHMED AFIF

Sete en desizyon...

MR SPEAKER

Espere Onorab!

VICE-PRESIDENT AHMED AFIF

...Sete en desizyon – en desizyon Gouvernman sa letan. Petet mon ti a zis mansyonnen – mon ti a zis mansyonnen an pasan, ti annan en Lagreman ki ti pe al ganny sinyen avek Gouvernman Lenn.

(Interruption)

MR SPEAKER

Silvouple! Silvouple!

VICE-PRESIDENT AHMED AFIF

Dan zot letan Onorab. Dan zot letan – ki ti'n fini drafte. Ki zot ti pe pase pe koz lo la, ziska ler ti'n ganny li. E, eski ti annan en konsiltasyon avan sa ti'n ganny drafte? Zot ti'n deside fer li lo en baz...

E mon kontan ki pozisyon Lopoziyon sa letan, i ti dir si

zanmen sa i vin pou ratifikasyon devan Lasanble Nasyonal - parske Lopoziyon ti napa pouvwar Egzekitif, i pa ti pou pase. E sa pozisyon in reste kler ziska ozordi.

Alor, Gouvernman i annan en manda kot i konsern sekirite nasyonal. I annan en manda. Nou, nou pe servi nou manda dan en fason responsab e lozik pour nou protez lentere pep Seselwa. Nou konnen poudir sa desizyon i en desizyon ki i annan son risk. Me i annan son merit.

E nou fyer ki ozordi nou form parti tou sa bann pei ki ansanm pe travay pou anmenn lape, e pou defann nou larout maritim. Mersi bokou.

MR SPEAKER

Mersi. Ki ou *point of order* Onorab Loze?

HON JOHAN LOZE

Mr Speaker, i annan en koreksyon mon bezwen met devan Lasanble aköz Lasanble pe ganny *mised*. Sesel depi 2009 i form par *CTF 151* ki kler *Anti-Piracy*. Sesel pa'n zanmen form par okenn *CTF 153* ki *Red Sea Security*. Nou bezwen kler lo la!

(APPLAUSE)

HON JOHAN LOZE

I kler *CTF 151* i *Anti-Piracy*. Al lo son *website*, al dan bann dokiman, gete. Mon pa konnen ki mannyer Gouvernman pa konn sa mwan? Mersi.

MR SPEAKER

Mersi. Mon pa kapab klarifye lo sa *point of order*. Nou a kontinyen avek kestyon. Onorab Hoareau?

Silvouple bann Manm, obzerv en pe lord kourtwazi. Zot demann kestyon, *VP* i reponn. Pa antre dan largiman letan i pe reponn. Onorab Hoareau, ou annan en kestyon?

HON JOHN HOAREAU

Mersi Mr Speaker. Bonzour Mr Speaker. Mr Speaker, sa desizyon ki Gouvernman in pran parey *VP* in dir nou, in fer an konsiltasyon avek bann larzan sekirite nasyonal.

Mr Speaker mon ti a kontan petet, zis pou retir sa lafreyer, sa kantite rimer ki parti Lopozisyon pe fer, si *VP* i kapab eksplik nou si vre si i annan okenn risk oubyen okenn kapabilite ki bann *OT* i kapab tir en misil pou fer koule Sesel? Akoz sa se en rimer ki zot pe fer. Mersi.

MR SPEAKER

Vis-Prezidan?

VICE-PRESIDENT AHMED AFIF

Mr Speaker, mon pa en eksper militer, premyerman. Mwan mon krwar i annan risk toultan – pa zis en kote, ek tou bann lezot pei ki kont annan sekirite lo lanmer.

E, i annan plizyer nasyon ki ozordi an rezilta diferan konfli, ki'n pran serten pozisyon. Resanman nou'n vwar par egzanp, Iran avek Pakistan in tir misil lo kanmarad. Ki zot pa'n zanmen fer pour en bon pe letan. Alor i annan en tansyon.

Mon pa krwar poudir bokou sa bann pei, e sertennman *Houthi*, i annan fasilite sorti lo son pei, pou tir misil pou ariv lo Sesel. Mon pa krwar sa i egziste. Me parey mon'n dir, mon pa eksper militer.

Me, mwan mon krwar sa ki pli enportan pour nou se ki nou, nou reste konnekte avek nou bann partener enternasyonal. Nou fer sir ki nou etabli tou bann risk ki annan vizavi nou, parske nou pa nou tousel dan sa koalisyon.

Ler en dimoun i decide atak okenn manm koalisyon oubyen fer en menas, nou partaz lenformasyon. Alor, mon krwar bann risk okenn latak,

enkli piratri par egzanp, i minim lo Sesel akòz nou pran bann mezir nesese pou nou fer sirveyans nou teritwar. E pour nou konnen kwa ki pe pase.

Alor Onorab, mon krwar i pa normal pou fer pep Seselwa per e pou krwar poudir ozordi nou anba plis risk atak ki nou ti ete detrwa lannen pase. Oubyen menm 5an, 10an pase.

Ozordi nou dan en sityasyon lemonn ki annan bokou plis tansyon ki 5an, 10an pase. Bokou plis. Parske i annan 2 gro lager ki pe pran plas an menm tan. E tou lede i anmenn risk.

E Sesel nou, nou kontinyen reste en pei nonnalinyen. Nou kontinyen lager kont atosite. Pronons nou lekor for kont atosite. Nou, nou oule lape. Me nou anvi protez nou larout maritim ki anmenn nou manze. Mersi bokou.

MR SPEAKER

Mersi VP. Onorab Uranie?

HON ROCKY URANIE

Mersi Mr Speaker. Bonzour tou koleg Onorab e en bonzour spesyal pour tou zabitan Zil Pros ki a lekout. VP mon konnen ou en boug ki kontan fer ekonomi laverite.

(Interruption)

MR SPEAKER

Onorab. Onorab, ou la pou demann en kestyon. Si ou annan en kestyon ou poz li, e evit sa kalite komanter.

HON ROCKY URANIE

Mersi Mr Speaker. VP, eski ou krwar i aproprye pour sa lenformasyon ganny anvoye lo Sesel ek Seselwa? Sa lenformasyon i ganny dir avek Seselwa par Sekreter Defans Ameriken?

Ouswa i ti devret ganny fer par Gouvernman Sesel ki dayer, ni Minis *Foreign Affairs* e ni Minis *Internal Affairs* pa ti okouran? Mersi.

MR SPEAKER

Bon. Vis-Prezidan, i annan en pwen dan son premye – dan son konmansman kestyon.

VICE-PRESIDENT AHMED AFIF

Mr Speaker. Mersi Onorab. Onorab, CMF i ganny komannde par en *US Navy Vice Admiral*. Se zot ki komann *Combined Maritime Force*. *Deputy Commander* i en *Royal Navy Commodore*.

Alor, ler zot fer lanons lo nivo CMF, mon mazin en enn zot protokol ki Lanmerik i pou

fer sa lanons, si in ganny fer par son Sekreter Defans. Mon mazine sa i swiv bann protokol ki deza egziste. Se sa ki mwan mon okouran. Sesel i form parti sa lafors. E en lanons in ganny fer. Mersi bokou.

MR SPEAKER

Mersi. Onorab Gill?

HON CHURCHILL GILL

Mersi Mr Speaker. Bonzour tou dimoun prezan. VP, konman leksplikasyon pour PNQ ou'n dir ki Sesel ti zwenn sa *Combined Maritime Force* pou defann son EEZ e son teritwar. E ou rezon prensipal se nou manze i pas laba.

I annan en pe letan ki Sesel nou'n ganny dir ki kou transportasyon i ser. Me la ou, ou dir nou ki, kot Sesel in al laba pou anpes kou transportasyon ser. Petet ou kapab dir nou be, ki mannyer kou transportasyon ti ser *in the first place*, si i pe pas dan en landrwa ki pli pre pou vin Sesel? Mersi.

MR SPEAKER

Mersi. Sa kestyon napa okenn relevans. Kou transportasyon i en lot size. Onorab Larue, ou annan en kestyon?

HON FLORY LARUE

Bonzour tou dimoun. Bonzour VP. Mersi Mr Speaker. Mr Speaker, mon ti a kontan demann Vis-Prezidan, si dan lepase nou laliny aeryen in bezwen *divert* son larout komersyal, akoz serten konfli dan rezyon, tel ki; Iran, Irak ek bann lezot ki nou'n annan?

E lefe ki letan nou ti *join the Combined Maritime Force*, nou ti vwar ki i pou fer 2.5milyon *square miles of international waters*. Eski ou kapab dir nou ki rol prensipal ki sa lafors i sipoze kouver? E akoz ki ziska ozordi nou ankor par ladan? E si nou pou kontinyen *être* par ladan dan le fitir? Mersi.

MR SPEAKER

Mersi. Konmsi mon'n tann 3 kestyon. Premye, si *Air Seychelles* in ganny lot problem, mon krwar sa nou kapab pase. VP, ou ava adres lezot pwen silvouple?

VICE-PRESIDENT AHMED AFIF

Mersi bokou Mr Speaker. Mersi Onorab. Wi, *Air Seychelles* toulezour – sak vol ki i fer, i evalye bann risk sekirite lo bann *flight part* ki i servi.

E wi dan lepase in arive plizyer lensidan kot li in bezwen evit serten lespas aeryen akoz

konfli lager Iran, Irak ti bokou lannen pase. Me resaman ti annan konfli ant *Qatar* ek *l'Arabie Saoudite* par egzanp.

E kot tou bann *airlines* i bezwen evit – sirtou *Qatar Airways* ti bezwen evit serten landrwa. Detanzaot, kan bann tansyon i leve dan mwayen nouriyen – e sirtou, otour Liban avek Izrael, i annan bann moman kot bann vol aeryen i ganny fer pas par kote. Parske sa rezyon i vin danzere.

Alors sa i en keksoz ki dinamik, ki sanze de zour an zour. E *Air Seychelles* e Gouvernman, zot fer sir poudir nou pran tou mezir nesese pou asir sekirite nou pilot, son *crew* e byensir tou pasaze ki abor. Mersi bokou Mr Speaker.

MR SPEAKER

Byen, *ok*. Nou ava al lo Kestyon Siplemanter *Leader* Lopozisyon.

HON SEBASTIEN PILLAY

Mersi Mr Speaker. Mon pou al direk lo mon bann Kestyon Siplemanter;

Mr Speaker, eski Vis-Prezidan i kapab eksplik nou; *CMF* i annan 41 manm, e i pa *Operation Prosperity Guardian*. Parmi sa bann manm, i enkli *La France* ki *La Reunion* i dan Losean Endyen.

Ki mannyer alors ki ni *La France*, ni *Maurice*, ni Madagascar – ni okenn sa bann pei Losean Endyen ki nou pe dir, i pou ganny afekte par sa larout maritim, pa pe form par *Operation Prosperity Guardian*?

Annefe *La France* ti *pull out* an di-z-an ki i pa ti ganny okenn konsiltasyon ler sa lanons ti ganny anonse. Savedir, ki lenportans ki Sesel i annan konparab ek *La France* ek *L'Espagne* ki'n *pull out*, ki ou ou'n ganny konsilte?

Mon oule demann Vis-Prezidan prezan en dezyenm kestyon Mr Speaker konman en siplemanter;

Ou'n donn nou en ta leksplikasyon la. *Still* ou pa ankor kapab reponn nou, aköz ou Minis Zafer Entern ki annan tou son bann *apparatus* sekirite anba li – ou Minis *Foreign Affairs* ki *deal* avek tou nou keksoz zafer etranzer, pa ti kapab donn en leksplikasyon Lepep Seselwa; kot ler en *case* Minis *Foreign Affairs* ti ganny demande kestyon, i ti dir i pa konnen. Al demann Minis *Foreign Affairs*. So, ki mannyer la ozordi ou dir nou se Gouvernman ki ti pran sa desizyon, si ou pa pe koz lalang avek Lasanble?

(APPLAUSE)

MR SPEAKER

Onorab, mon pe demande – mon pe demande ki nou evit bann akizasyon koz lalang. Ou'n poz 2 kestyon.

HON SEBASTIEN PILLAY

Ok Mr Speaker, mon pa ava servi sa lakizasyon. Me i enportan Mr Speaker, akoz ou'n lev en pwen letan ou pe *rule* bann kestyon, ki prezan i pertinan pour sa ki Vis-Prezidan in entrodwi dan sa bann kestyon.

MR SPEAKER

Bon. Prezidan...

HON SEBASTIEN PILLAY

Mon ti a kontan klarifye en keksoz Mr Speaker. An 2009 ti annan en *joint Motion* anmennen par Onorab Marie-Louise Potter e Onorab Wavel Ramkalawan pou enform pep Seselwa lo nou lentervansyon an relasyon avek piratri.

So ti annan lenformasyon ki ti ganny pase Mr Speaker.

MR SPEAKER

Onorab, ou pe...

(Interruption)

MR SPEAKER

Sorry!

(Interruption)

MR SPEAKER

Order! Order! Ou pe al dan en largiman lo sa ki'n arive. Silvouple, Vis-Prezidan reponn kestyon ki Onorab *LOTO* in demande.

VICE-PRESIDENT AHMED AFIF

Mersi bokou Mr Speaker. Mersi Onorab. Onorab, mwan mon pa kapab koz pour *La France* ek *L'Espagne*. Zot, zot en pei souveren parey Sesel. E zot, zot annan drwa deside ki zot priyorite stratezik pour militer. Mwan mon pa kapab koz pour zot.

La France otan ki mon konnen, ti dir ki li i kapab pran aksyon militer lo li menm pour li protez Lanmer Rouz e son bann bato. E li i pou donn son proteksyon. Petet sa i rezon li i deside i kapab fer, al lo li menm.

L'Espagne mon pa konnen. Sesel otan ki mon konnen, parey mon'n dir, nou napa bato. Nou napa avyon, nou napa zonm dan loperasyon dan Lanmer Rouz.

Nou'n deside ki nou, nou pou protez nou larout maritim atraver nou partisipasyon,

atraver *Combined Maritime Force*. Se sa nou kontribisyon.

Si Minis Zafer Etranzer ti dir avek al rod lenformasyon ek *Internal Affairs*, sa otan ki mon konnen, ti ganny raporte atraver medya. Zot pa ti vin devan Lasanble pou vin dir demann enn, demann lot.

So, sa i zot lenformasyon ki zot annan. Mwan mon pe dir ou, i annan en sel dimoun ki'n fer desizyon. Se Gouvernman Sesel. E *Government* Sesel in pran en desizyon stratezik lo en size ki *involve* en size militer e sekirite nasyonal. E mon pe konfirm sa ozordi. Mersi bokou.

MR SPEAKER

Mersi. Mon pa pou donn *Leader* Lopozisyon loportinite pour li antre dan deba ek Gouvernman.

(Interruption)

MR SPEAKER

PNQ in terminen. Vis-Prezidan, mersi pour ou larepons. Nou'n pran tou kestyon e kestyon in ganny reponn. Mersi. Mon swet ou *bonne journée* e orevwar. *LOTO*, ki pwen ou annan?

HON SEBASTIEN PILLAY

Mersi Mr Speaker. Mr Speaker, me mon bezwen met devan ou e soumet levidans devan ou ki

Vis-Prezidan in *mislead* Lasanble.

La mon annan mwan dernyen *status* lo *Operation Prosperity Guardian*. E la Sesel son partisipasyon in ganny *downgraded to supported by Seychelles*. E li in dir nou, nou form par sa loperasyon.

Prezan mon ti a kontan ganny en konpran avek ou; eski nou pou kapab konman en Lasanble, ganny laverite avek sa Gouvernman, ki i kontinyelman kasyet laverite Mr Speaker?

(APPLAUSE)

MR SPEAKER

Onorab, mersi. Ou'n demann ou kestyon. Ou kestyon in ganny reponn. Onorab Georges, ki ou pwen?

HON BERNARD GEORGES

Mersi Mr Speaker. Mr Speaker mon anvi anmenn en rektifikasyon en pwen ki swadizan – ki Onorab Loze in dir ki swadizan in ganny mal demande dan sa Lasanble, aköz swivan en kestyon par Onorab Anna Bistoquet.

Mon lir la Onorab ti dir kler ki; *Combined Task Force 151* ti annan pou fer ek piratri e non pa *153*. Mon anvi lir en *statement* ki'n ganny *issued* par

bann Lotorite isi Sesel. Bann Lotorite Militer ki dir;

Operation Prosperity Guardian will be built upon an existing counter piracy mission in the region known as Task Force 153 e non pa 151.

(Interruption)

MR SPEAKER

Mersi.

HON BERNARD GEORGES

Nou bezwen rekti...Nou bezwen rek...

(Interruption)

MR SPEAKER

Bann pwen ki Manm in fer i lo rikord. Nou a kontinyen avek *Question Time*. Madanm *Hansard Reporter*, ou ava apel Minis Rangasamy.

(Interruption)

MR SPEAKER

Mon a ekout ou Onorab Loze. Mon a ekout ou, be selman mon war bann *point of order* ki pe zis fer fer enteripsyon pou retard travay Lasanble.

(Interruption)

MR SPEAKER

Mon a pran en *point of order*. Wi Onorab Loze?

HON JOHAN LOZE

Mersi Mr Speaker. Mr Speaker, zis pou pas lenformasyon ek Lepep Seselwa. *From website Combined Maritime Task Force, CTF...*

MR SPEAKER

Non, *sorry*. Ou pe re fer sa largiman. Nou'n fini avek sa.

(Interruption)

MR SPEAKER

Nou'n fini avek sa.

HON JOHAN LOZE

Mr Speaker, ti ganny kree le 17 Avril, 2022!

MR SPEAKER

Nou'n fini!

HON JOHAN LOZE

Le 17 Avril, 2022! Zot pe koz lalang Mr Speaker!

MR SPEAKER

Nou'n fini avek sa!

HON JOHAN LOZE

Sesel pa ti ladan an 2009. Fek kree sa! Zot pe koz mansonz ek Lasanble!

(Interruption)

MR SPEAKER

Order! Order. Mon pa pe pran okenn *point of order* ankor.

(Interruption)

MR SPEAKER

Silvouple! Silvouple! Bann Manm. Bann Manm, mon demann lord. *Order!* Minis, silvouple?

(Interruption)

MR SPEAKER

Silans silvouple! Bon bonzour Minis Billy Rangasamy, Minis pour Later e Lozman. E osi ou bann zofisyé; Mr Jude Florentine Sekreter Prensipal pour Later.

Mr Denis Barbe Sekreter Prensipal pour Lozman.

Mr Steve Mussard *Deputy CEO Property Management Company.*

Mersi pou zwenn nou pour kestyon pour ou Minister. Premye kestyon i dan non Onorab Regina Esparon.

HON REGINA ESPARON

Mersi Mr Speaker. Bonzour Minis ek ou delegasyon e tou dimoun a lekout.

Mr Speaker, eski Minis i kapab dir Lasanble; ki plan son

Minister pou rektifye sa problemn delo *overflow* e tiyo kase dan plafon, ki pe kontinyelman arive dan bann *flat PMC* bor lanmer North East Point? Mersi.

MR SPEAKER

Mersi Onorab, Minis ou repons?

MINISTER BILLY RANGASAMY

Mersi Mr Speaker. Mr Speaker, permet mwan pou dir en bonzour spesyal ou menm, tou Manm Lasanble, tou bann *staff* Lasanble prezan. Bann nouvo *MNAs* ki'n form par lekip. Bann ki pe swiv lo radyo e lo *internet*.

Nou remersye Bondye pour sa zoli soley ki'n leve bomaten. Mon en pti pe sagren letan mon'n antre mon'n tann sa bann tirayman. Mon priye nou sesyon i a kontiny dan en lape. Nou a kapab deliber e nou a kapab partaz nou bann larepons dan en linite spesyal. Sa i mon lapriyer. Sa i mon dezir Mr Speaker.

Mon remersi Onorab pour son kestyon. Lo kot i konsern North East Point Onorab, lo sa blok bor lanmer; Nou konnen ki a plizyer repriz ou menm ou pe pouse pou regle sa sityasyon dan sa 2 blok *bedsitters*, kot nou annan 16 fanmir pe reste.

Mr Speaker, sa problemn tiyo kase e bann tenk ki *overflow* dan bann *flat* North East Point e bann plizyer *units* ki nou annan dan pei, nou bezwen admet i la pour en bon pe letan.

Mon okouran Mr Speaker, ki *PMC* in entervenir plizyer fwa pandan sa bann lannen dernyen – bann dernyen lannen eskiz mwan, pou fer reparasyon pour sa bann *unit*. Sirtou lo sa bann *unit* ki anler dan letaz, akoz tiyo in kase dan miray, ouswa tenk in *overflow*.

Mr Speaker, sa 2 problemn ki koz sa bann sityasyon se, i relye avek bann tiyo delo ki dan miray e in vyei. E sa kalite materyo tiyo *polycop* ki nou konnen, ti ganny servi dan bann letan oparavan.

Me i pa telman lo sa kalite standar konpare avek ozordi. Delo i *overflow* dan bann *unit* ki anler dan letaz, letan bann *ball valve* par egzanp, i bloke e i *fail*.

Mr Speaker, *PMC* ti antreprann en proze lannen pase pou fer plizyer renovasyon mazer lo enn sa 2 blok *flat*. Nou ti profite pou regard sa 2 problemn ki Onorab in mansyonnen, o profon.

Mr Speaker, mon ti a kontan enform Lasanble ki *PMC* in antreprann sa bann travay swivan; Premyerman, in

kennsel tou bann tiyo dan miray e ranplas zot lo – enstal zot direkteman lo miray. Fikse lo sirfas miray.

PMC in osi met en pli gro tiyo desarz – parey nou apel sa nou *overflow pipe*, ki 40 milimet olye 20 milimet, ki ti la oparavan. Pou fer sir ki i annan ase kapasite pou *deal* ek sa bann *overflow* o ka zour nou ganny sa bann *challenges* avek bann *ball valve* ki bloke oubyen ki *fail*.

Mr Speaker, mon kontan pou dir ki sa bann travay amelyorasyon in minimiz bann lensidan kot tiyo kase ouswa tenk *overflow* dan bann lakaz, dan bann *bedsitters* in enkonvenyans lo bann zabitan.

Mon'n vizit sa vilaz mon menm resaman e mon ase satisfè ek travay. E mon'n demann *PMC* pou konplet sa bann lezot travay ki annan pour nou fer lo sa dezyenm blok o pli vit posib sa lannen. En fason sa pti vilaz ek sa 16 fanmir, omwen sa problemn delo tenk *overflow* i a kapab ganny rektifye.

Onorab, nou reste touzour angaze pou kolabore e trouv solisyon ansanm. Se sa lapros pratik e dan linite ki mon touzour ankouraze. E mon pou touzour promouvwar atraver tou distrik dan pei. Mersi Mr Speaker.

MR SPEAKER

Mersi Minis. Onorab i annan siplemanter?

HON REGINA ESPARON

Yes, Mr Speaker. Mr Speaker, eski Minis i kapab dir nou, dan a lavenir dan bann nouvo Proze Lakaz ki zot anvizaze fer, eski zot pou servi menm sistenm met sa bann basen dan plafon?

Oubyen zot pe reviz en pti pe Polisi lo ki mannyer zot ganny en sistenm kot pou met sa basen an deor kekfwa lo pilye, ki fer ki i ava evit sa sityasyon kot i *overflow* dan plafon e sa dimoun ki anler i ganny afekte?

E dezyenmman, dan bann ka kot sa bann dimoun i ganny afekte, eski i annan okenn mekanizm ki Minister i mazin met an plas petet, pou kapab rekonpans sa bann dimoun ki zot bann propriyete i ganny andomaze?

E la mon pe mazin Mrs Finesse ek lezot ki a 2 repriz zot bann propriyete dan lakaz in ganny andomaze akoz sa *overflow* ki'n arive avek sa basen dan plafon. Mersi Mr Speaker.

MR SPEAKER

Mersi Onorab. Minis, repons?

MINISTER**BILLY****RANGASAMY**

Onorab, mon apresye ou'n demann sa kestyon. E mon pou reponn premye parti Mr Speaker. E dezyenm kot i konsern rekonpans, vi ki i bann *flat PMC*, mon a demann *Deputy CEO* pou *tackle* dezyenm kestyon.

MR SPEAKER

Tre byen.

MINISTER**BILLY****RANGASAMY**

Pour premye kestyon, i en bon pwen. E en pe letan la nou'n revwar sa bann *design* pour sa bann blok *flat* kot i annan peron. Nou apel sa nou bann *staircase*. Kot nou bann *central staircase*.

Se la kot nou annan en slab beton ki nou'n konstrir. En fason sa bann tenk pa ganny pozisyon dan okenn – par lao okenn *unit*. Me dan landrwa santral kot bann peron i ete lo en slab beton.

E i annan en *containment* ki nou fer osi. En fason ki, o ka zour nou ganny sa bann problem *failure*, par egzanp *ball valve*, i pa afekte okenn apartman. So, sa in ganny – dan tou nou bann nouvo *design*, se sa ki nou'n enkorpore.

E kot i posib, nou osi pe rod fason pou met sa bann tenk deor. Me an zeneral, nou bezwen balans en pti pe bann laspe estetik. Bann laspe probableman – nou priye napa sa bann kalite keksoz.

Be pangar i annan okenn vandalism, ler i anndan *within the staircase* dan sa *zone* ki izole ek bann apartman, nou annan plis konfyans ki sa solisyon i mars byen. Mersi Mr Speaker pour sa premye parti.

MR SPEAKER

Tre byen. *Deputy CEO* pou pran laparol?

DEPUTY CEO STEVE MUSSARD

Bonzour Mr Speaker. Bonzour tou Manm Onorab. Bonzour tou dimoun dan lakour. Mersi Mr Speaker pour donn mwan laparol.

Onorab, ou kestyon i pertinan. I byen ou kestyon. Mon ti a kontan dir ou ki; parey dan ka North East Point *Bedsitter*, i bann *flat PMC*. Sa bann dimoun pe lwe laba. E tou *flat PMC...PMC* i kouver avek en lasirans.

So ler bann lensidan koumsa i arive, otomatikman - *well* i annan bann prosedir protokol parey ou fer pour

lasirans. Me nou kouver tou sa bann dimoun, en.

Mon pa – mon konnen poudir mon letan pour mwan *PMC*, ti annan enn de ka ki ti arive dan North East Point. E napa okenn ka, si mon memwar i servi mon byen, ki nou pa'n *compensate* sa bann dimoun. Menm nou kouver – pa zis pour fer reparasyon. Nou menm kouver osi bann *household item*. Bann *set sofa*.

Par ler i annan dimoun ki aste bann *Cabinet sapele* ki ganny pti delo. Ou konnen i ouver. Tousala nou ranplase. E sa i mars byen. Mon krwar i pe mars byen.

Parey mon pe dir ek ou, si i annan okenn ka ki mon pa kouran. Selman nou kouver tou dimoun dan bann lensidan. Mersi Mr Speaker.

MR SPEAKER

Mersi *Deputy CEO*. Bon, nou a kontinyen avek kestyon lezot Manm. Nou annan 8 kestyon bomaten. Savedir nou annan apepre 15 minit par kestyon. Onorab Sandy Arissol?

HON SANDY ARISSOL

Mersi Mr Speaker. Bonzour Minis avek ou lekip. Mon ti anvi zis demann avek Minis, an relasyon avek sa size basen *overflow* ki andomaz propriyete

bann dimoun. I en vye size. E en vye topik.

So mon ti a kontan demande; eski i annan en travay ki pe ganny fer par *PMC* pou annan bann *regular checkup* lo bann blok *flat* - sirtou bann ki en pe pli aze spesyalman, pou asire ki bann basen pe fonksyonn byen - *ball valve*, sirkilasyon delo, kote zot *outlet* i ete? Pou asire ki bann fanmir pa kontinyelman ganny afekte. Mersi bokou Mr Speaker.

MR SPEAKER

Mersi Onorab.

MINISTER **BILLY**
RANGASAMY

Mr Speaker, vreman en bon kestyon. E i en lenstriksyon mon'n donn *PMC* zot *Board* pou fer sa travay. Mon a les *Deputy* eksplik en pti pe stratezi ki nou annan. Mersi bokou.

MR SPEAKER

Tre byen. *Deputy*?

DEPUTY **CEO** **STEVE**
MUSSARD

Mersi Mr Speaker. Mersi Onorab. Vreman en kestyon en pti pe pertinan. En kestyon enportan osi tou.

Onorab, detrwa keksoz nou pe fer. Enn de proze ki nou

pe fer - mon kapab dir ou enn nou fek fer Bel Eau. Nou pe al fer enn la kot Onorab Romain kot Vilaz Granit, kot nou pe met sa bann basen deor avek en....

Sa de landrwa nou'n kapab fer li aköz in fasil, en. I fasil. I ankor en *challenge*. I ankor poz en *challenge*, kantmenm dan lepase in touzour en *challenge*. I ankor en *challenge* pour nou.

Si mon get lo mon rikord, mon annan apepre 88 *estate* ki mon annan sa problem. Konmsi ki mon rikorde ki mon kapab donn ou en rikord pou dir in ariv sa bann lensidan. So 88 *estate*. I pa en pti gin.

Ok, nou'n fer Bel Eau. Mon kapab tir Bel Eau la i a fer 87. Me i touzour pran sa *challenge* kot; *what do you do?* Ki nou pou fer? Pa dir mwan poudir nou kapab fer pran tou basen met deor. Pratikman pa tro, tro fasil. I annan landrwa kot i ouver, i annan vandalizm parey Minis pe dir. So, i annan en kantite keksoz.

Dezyenm keksoz ki nou pe fer; nou ti lans en Program Netwayaz ou Tenk. Pa zis pou netwaye, me selman pou - dan sa kontra ti annan pou verifeye sa bann *fitting*. Sa osi i en lot gro *challenge* Onorab, aköz parey ou, ou dir; sa bann tenk i

dan plafon. Akse i vin en difikilte.

North East Point ler nou ti pe fer sa legzersis kot Onorab Esparon, en pe landrwa nou'n kapab fer. En pe landrwa nou pa'n kapab fer akoz dimoun pa donn nou akse. En keksoz ki arive.

E enn de ki mon personnelman mon'n al vizite, en nespes *spaghetti* anler laba ler en tenk pa marse. I annan tenk lanmar in o ladan. So, nou annan sa program – nou annan sa lot Program *Preventive Maintenance* kot;

Wi, i annan ankor kontra nou pou donner pandan sa lannen ki la e lannen ki pe vini, kot nou pou sey nou mye pou ganny akse ek sa bann tenk. Netwaye. Tyek sa bann *fitting*. Regarde *ball valve, overflow* - si pe marse, si pa pe marse.

E sa bann travay koumsa konmsi ki – i en program kontinyel Onorab, en. I pa – mon pa kapab konfirman poudir nou kapab fer tou sa lannen akoz i annan kantite defi.

Me selman, langazman i la pour nou fer tou nou mye pour nou kapab *at least* ganny – netway sa tenk en pe. Akoz i annan 10an – i annan tenk 10an pa'n netwaye, en. E nou pe fer nou mye Onorab. Sa mon

kapab asir zot. Mersi Mr Speaker.

MR SPEAKER

Mersi *Deputy*. Onorab Labonte?

HON ANDY LABONTE

Mersi Mr Speaker. Bonzour Minis avek *panel*. Zis en pti leklersisman; vi ki *Deputy CEO* parey in dir ki i annan tenk ki plis ki 10an i ankor pe ganny netwaye.

So dan lenstans ki en kliyan in fini pey son *flat*, e i pe rankontre bann problem parey ki pe kontinyelman arive, eski *PMC* i antre ladan?

Or i plizoumwèn sa endividi ki merit pran son responsabilite pou li *sort out* sa bann *issue*? Mersi.

MR SPEAKER

Tre byen. *Deputy* i a reponn Minis? *Deputy*?

DEPUTY CEO STEVE MUSSARD

Mersi Mr Speaker. Mersi Onorab. Wi, bann dimoun ki'n fini parey Onorab, nou *still* donn sa servis nou. Selman zot pey nou en pti larzan. Mon krwar i R500. Mon krwar sa enn bann rezon ki ou war ki en bon pe tenk pa'n ganny netwaye akoz dimoun pa le pey nou.

Me si i ariv bann lensidan kot kantmenm ou'n fini peye, malgre ou'n fini peye, tenk i *overflow* ouswa i ariv en problenm avek, nou *still* antre pou fer reparasyon. Akoz nou dekouraz – mon krwar i annan en Polisi *PMC* ki nou pa tro, tro kontan dimoun al akse sa bann tenk.

Enn; i dan - akse pa tro, tro fasil. Akoz pour rezon ou kapab konpran en, nou pa anvi i ariv – i annan en serten problenm akoz i annan en kantite dezagreman dan bann *Estate*. Dan bann blok *of flat*. So nou dekouraz dimoun pou mont anler pou al fer okenn reparasyon. I plito nou ki al fer li.

Nou annan plis kontrol e nou konnen poudir nou pa *avoid* bann lezot lensidan ki kapab arive ler ou anvoy nenport ki dimoun pou al dan sa tenk.

Selman pour bann dimoun ki pe peye Onorab, wi nou ti donn sa servis. E pour zour sa dimoun i donn pou netwaye, nou'n netway li avek en *fee* mon krwar minim R500. I pa vreman bokou ler ou mazin sa louvraz ki annan. Mersi Mr Speaker.

MR SPEAKER

Mersi. Mersi *Deputy*. Onorab Uranie?

HON ROCKY URANIE

Mersi Mr Speaker. Bonzour Minis avek ou delegasyon. Mon kestyon i en pti pe an relasyon avek Onorab Regina avek Onorab Sandy Arissol.

Lo kote bann dimoun ki bann pake i andomaze konmsi, ki dele letan ki zot servi pou ranplase? Eksplik nou ki mannyer i marse; eski sa dimoun i al rod en *proforma* son pake i anmenn kot zot? Oubyen zot ki anvoy zot dimoun fer sa tranzaksyon pour li?

E menm parey pour netwayaz tenk, konmsi ki dele letan ankor i osi zot donner sa konmsi? Eksplik nou en pti pe. Mersi.

MR SPEAKER

Mersi. Minis ou a...?

MINISTER

BILLY

RANGASAMY

Mr Speaker, mon ava demann *Deputy CEO* pou eksplik sa en pti pe lo lapar *PMC*. Silvouple.

MR SPEAKER

Deputy, yes?

DEPUTY

CEO

STEVE

MUSSARD

Mersi Mr Speaker ankor. Mersi Onorab pour ou 2 kestyon. Premye kestyon ou ti pe koz zafer pake. Pake ler nou assess nou war poudir in andomaze, nou donn ou *cash*. Nou pa al aste pake pou mete. Nou donn ou sa – ler nou fini fer tou bann prosedir, bann protokol ki lye avek Lasirans, *once* ki nou ganny konfirmasyon avek Lasirans, nou rann ou *cash*. Nou, donn ou, ou *cheque*. Ou al aste ou bann zafer.

E lot zafer, zafer *water tank* netwayaz. Sa si parey Onorab Labonte ti pe dir; si ou'n fini aste – si ou'n fini aste, kan nou ganny sa, nou planifye sa travay avek ou. Akoz i ant *PMC* avek ou la.

Bann lezot landrwa parey bann landrwa ki nou pe lwe, sa nou annan en program. Sa program la ler nou fini finaliz sa program, nou distribye notis. Dizon North East Point kot Onorab Esparon. Nou pou distribye sa notis nou dir ek ou; *look, this weekend* nou pe vini. Nou pe vin netwaye. Silvouple, donn nou akse. E sa i ale koumsa bann lezot landrwa.

E *still* kantmenm mon pe dir ek ou sa, *still* i annan *challenge*, en. *Still* ou war nou ler nou monte dizon sa *weekend* ki nou'n planifye, nou kapab *end up* dan plas netway

10, 12 tenk. Zis 4, 6 ki nou netwaye. Pour rezon ki petet dimoun pa la ouswa refize pou donn nou akse.

So, i annan en *process*. I annan en plan pour sa. Selman si parey ou pe aste ou anvi sa ganny netwaye, ou *call* nou, nou aranz ek ou deswit. Nou fer sa. Nou fer sa travay pour ou. Ok Onorab? Mersi Mr Speaker.

MR SPEAKER

Tre byen, mersi. Onorab Bastienne?

HON DESHEILA BASTIENNE

Mersi Mr Speaker. Bonzour Mr Speaker. Bonzour Minis ek ou delegasyon. Bonzour tou koleg Onorab.

Minis, mwan mon ti a kontan demann ou en kestyon an rezilta bann domaz ki arive dan bann lakaz an rezilta tiyo kase, basen *overflow*.

I annan parfwa i annan bokou dimoun ki ganny bokou afekte. E mon ti a kontan konnen si *PMC* avek - si i annan en *meeting* kot i vin *PMC*, Lasirans enkli sa zabitan li menm ki'n ganny afekte. Kot zot asiz lo en sel latib e zot la. E la zot diskit sa bann keksoz ki'n arive pour zot kapab vin lo en desizyon akseptab lo tou lede kote? Mersi.

MR SPEAKER

Mersi. Yes, en klarifikasyon lo prosedir. *Deputy*, si ou annan en repons?

DEPUTY CEO STEVE MUSSARD

Mersi Mr Speaker. Onorab, Lasirans la i annan tout en prosedir li en. Nou pa zanmen – *anyway*, mon pa zanmen rapel en ka en *claim* lasirans kot nou'n met tou le 3 parti asize. *PMC*, sa Lasirans ek sa dimoun.

Nou, nou servi en *Broker*. *So Broker* i fer sa negosyasyon pour nou avek Lasirans. E *come back* avek *the offer*. E nou prezant sa *offer* avek sa dimoun.

Pou dir ou fransman, i annan de ka kot domaz – parey ou'n dir, domaz i en pti pe plis. Akoz nou osi nou annan en Polisi. Polisi savedir nou annan – dan nou Polisi i annan en *celling* ki nou mete dizon pou *refund* bann *household items*. *So far*, bann zafer koumsa, en. I annan Polisi i annan en *limit*.

Be i annan bokou ka kot nou'n anmenn *case* pli o kot mou *Board* pou dir ki; be, sa domaz i en pti pe plis ki sa Polisi ki sa *ceiling*. E *most of the time* mon kapab konfirm ek ou poudir nou'n rann sa dimoun plis ki sa Polisi an servan finansman *PMC*.

Akoz nou'n war poudir i pa son lafot. *Ceiling* i en *ceiling*. Selman nou'n agree pour nou kapab rann li pou li kapab kontinyen ek son lavi.

So i annan sa. Selman, pour sa 3 parti asize lo latav, nou pa tro vreman fer sa nou, en. *So far* mon pa'n – enn de. Apard enn de ki dezagreman, apre nou koze nou diskite. I *appeal*. La nou get son *appeal*, nou koze. Napa sa *process* kot nou asiz ansanm lo latav.

MR SPEAKER

Mersi.

DEPUTY CEO STEVE MUSSARD

Mon pa tro krwar poudir i ganny fer koumsa. Koriz mwan si mon mal, selman *but most of the time* bann protokol i mars byen. Bann prosedir i mars ase byen. Mersi Mr Speaker.

MR SPEAKER

Mersi *Deputy CEO*. Mon en pe prese pou al lo dernyen kestyon. Onorab Cosgrow?

HON WALLACE COSGROW

Mersi Mr Speaker. Mr Speaker, mon kestyon an relasyon avek plan *PMC*, en. Depi bomaten, annefe kestyon ki'n ganny demande i en kestyon ki relye avek problem ki annan dan

bann *housing estate* an relasyon avek delo, basen, tiyo kase.

Mwan mon kestyon i; kwa ki *PMC* i annan an term striktir dan ou lorganizasyon ki pou *deal* avek sa bann sityasyon e anpes li arive dan le fitir?

Par egzanp; eski zot striktir - eski zot annan *estates manager*? Konbyen dimoun ki travay dan sa Seksyon si zot annan *or* si zot napa zot ava dir mwan – pou kapab *deal* avek sa 80 ekek *estate* ki mon'n tann ou ou'n nonmen?

So, eski *PMC* i striktire dan en fason ki pou anpes sa bann zafer arive dan le fitir? E dezyenm eski...

MR SPEAKER

Sorry.

HON WALLACE COSGROW

Ki mannyer zot pe *deal* avek *Condominium Act* pou *sort out* sa bann problemn?

MR SPEAKER

Ok, bon. Minis, Deputy, silvouple annou fer li vit, bref. I annan Onorab Spiro ki'n lev son lanmen lo dernyen moman. Me akoz ozordi i son premye zour, mon zis anvi fer li sa kourtwazi. So annou fer sa bref, mon a ganny sans pas li en kestyon.

MINISTER

BILLY

RANGASAMY

Onorab Cosgrow, mersi pour ou kestyon. Mr Speaker, pou demann *PMC* pou ed mwan osi lo la. Me selman sa ki mon kapab dir Onorab;

Challenge ki nou pe gannyen ek sa bann *estate* kot i konsern sa problemn tiyo kase, delo dan – ki *overflow*, eksetera, i sa bann vye *unit*. Ki mannyer in ganny konstrir. Sirtou kot i met tenk par lao apartman kot dimoun pe reste, en. So sa ki fer li difisil.

Me kot i konsern striktir *PMC*, i en keksoz ki mon'n konstate i ti feb letan mon'n pran lofis. E mon kapab reasir ou, *Board* oparavan e nouvo *Board* osi in angaze pou ranforsi sa Seksyon *Maintenance*, pou nou *drive* en *preventative maintenance approach*.

E en pe kestyon ou ti mansyonnen boner; pa les problemn arive, epi pou nou al kas latet pou al regle. Annan en program an plas kot nou pe pase nou pe fer bann *regular check*. Me ou bezwen mendev pou fer sa pou sir, en. 88 *unit*. Bann *unit* i Mahe, Praslin. La Digue osi. E i pa fasil.

Me selman, tou zefor neser pe ganny fer pou

ranforsi sa *Unit Maintenance* kot *PMC*, avek sa lapros *preventive maintenance*. Sa mon kapab reasir ou. Mon ti a voudre i ti a ganny fer en pe pli vit.

Me osi pou ganny mendev konpetan e mendev ki serye ki annan bon latitud. Ki onnet. Ki pa al anpay ou ek bann problemn koripsyon. Sa i vin en lot fason. Pou ganny bann bon mendev profesyonnel, pa fasil. Me nou pe fer tou sa zefor pour nou ranforsi sa *unit*.

Sa i enportan parske larzan ki nou depanse pou al ranplas *sofa*, pou al fer tou sa bann travay, i kout nou en kantite larzan. So alors, avek tou zefor, mon kapab reasir ou ki *Board* pe pran sa konman en size tre enportan pou restriktir *PMC*, pou ranforsi nou *Maintenance Unit* dan en lapros *preventive maintenance*.

MR SPEAKER

Mersi Minis.

MINISTER BILLY RANGASAMY

Lo *Condominium Act* osi, sa osi i en size vreman enportan parske nou annan en kantite sa bann blok ki bokou dimoun fini aste zot apartman. I annan pa ankor fini aste ladan osi. E sa osi i en size ki *PMC* lo nouvo

Board in pran konman en langazman, pou regle sa problemn *Codominium Act* o pli vit posib.

E lo si dimoun in aste zot apartman, donn zot, zot lavant. Zot a pran zot responsabilite. Zot a zwenn ansanm. Zot a fer zot pti group pour zot okip zot landrwa. Pa bezwen anvoy lo *taxpayers'* pou sey solve zot problemn, akoz evantyelman i tonm lo zepol Gouvernman. Alors nou anvi adres sa.

E mon kapab konfirm sa ki sa 2 size pe ganny pran vreman o serye. E mon priye ki sa lannen *PMC Board* i ava vreman kapab tyonbo sa byen for. Mersi Mr Speaker.

MR SPEAKER

Mersi. Onorab Spiro, mon a pran ou kestyon, menm ki nou'n depas letan.

HON RACHEL SPIRO

Bonzour Mr Speaker. Bonzour Minis avek ou delegasyon. An referans avek lasirans ki'n ganny mansyonnen la bomaten;

Eski Minister i annan lasirans pour tou son bann kliyan ki in ganny lakaz avek *PMC*? E si non, eski zot pe mazine etabli dan zot Lagreman, en Polisi Lasirans pour lavenir?

MR SPEAKER

Mersi. Minis oubyen...*Deputy* pou reponn? *Yes*?

DEPUTY CEO STEVE MUSSARD

Yes, mersi Mr Speaker. Mersi Onorab pour ou kestyon. Onorab, tou – nou annan 2 kategori nou, en. Nou annan lakaz ki nou lwe. Bann *unit* ki nou lwe. Apre bann *unit* ki dimoun pe aste. Tou lede kategori i annan lasirans.

Pour bann *unit* ki napa *rental*, *PMC* i peye pour lasirans. Bann ki pe aste, sa dimoun ki ler pe fer son repeyman, i annan en pti zafer ladan ki i al pour lasirans. I mete la dan son striktir peyman, ou pou war i met; *principal payment*, lentere, apre son lasirans. So, tou. Napa en *unit* ki pa ganny kouver anba lasirans. Mersi Mr Speaker.

MR SPEAKER

Yes, Minis i le azoute?

MINISTER BILLY RANGASAMY

Wi. Mersi Mr Speaker. Mersi Madanm Spiro pour sa kestyon Onorab. Vreman bon kestyon. E annefe, i annan en lot ka prezan. I annan bann ki'n fini pey zot lakaz. E nou pe

ankouraz bann zabitan, nenport sekte prive ek Gouvernman. Nenport, pou silvouple, konsider seryezman annan en lasirans pour ou batiman. Parske sa i en gran lenvestisman ki ou'n fer e i tre neserer pou al devan pran ou lasirans.

Nou'n vwar bann ka dezaz ki'n arive. Bann ka dife ki tanzantan i arive. So la, konman sa Minis ki responsab pour Lakaz, mon ankouraz tou zabitan – tou nou bann *student* dan bann *housing estate*. Bann ki'n fini aste zot lakaz e bann dimoun prive osi, pou pran en lasirans pour zot lakaz. Tre enportan. Mersi bokou Mr Speaker.

MR SPEAKER

Mersi. Mersi Minis. Nou ava avans lo segon kestyon. Onorab Andy Labonte? Ou'n gannyen?

HON ANDY LABONTE

Mersi Mr Speaker. Mr Speaker, avan mon demann mon kestyon, permet mwan pour mon remersye Minis pour son lasistans ek led ki'n donn nou pandan sa letan dezaz Sanmdi. Zabitan La Rivière Anglaise in vreman apresye ou sipor. Mersi.

So, kestyon numero 2 i demann koumsa; eski Minis i kapab dir sa Lasanble ki plan

PMC pou fer sir ki bann lokater i onor zot kontra? Mersi.

MR SPEAKER

Mersi Onorab. Minis?

MINISTER **BILLY**
RANGASAMY

Mersi Onorab pour sa bon keston. Mr Speaker, mon kontan pou dir ki mazorite lokater pe respekte zot kontra. Sa i donn nou bokou lankourazman.

Me par kont, nou annan en pti minorite ki malerezman pa pe onor serten konponan spesifik zot kontra tel ki;

1. Pa zwe lanmizik for
2. Gard lapropte kot zot lakour
3. Viv byen dan kominote
4. Kontrol konportman zot bann zanfan
5. Pa sonny zannimo
6. Gard zot peyman azour
7. Pa vann drog ek lalkol dan vilaz
8. Pa fer vandalizm
9. Pa fer aktivite nwizans tel ki garaz e stok boutey *pet* dan vilaz
10. Respekte laranzman *parking*, eksetera.

I pa 10 Komannman sa, me i par kont bann legzanp konkret ki mon kapab donner kot nou vwar parfwa sa minorite pa ede. Pa pe respekte. I tre deplorab e

vreman sagrinan ki sa pti minorite lokater pe fer lavi mazorite bann lokater malere e pe kree dezord dan nou bann vilaz.

Bokou lenvestisman i ale pou fer sa bann lakaz pour plizyer lannen. E letan ou vwar sa bann minorite fer sa, i dekourazan. Sa i pa akseptab mon krwar Mr Speaker, e zot tou isi dan Lasanble, zot tou kote latab mon krwar zot pou dakor avek mwan ki nou pa pou kapab toler sa kalite *stupidity*.

PMC i annan en *Unit Enforcement* ki pe sey son mye pou pran aksyon anliny avek prosedir an plas. E menm al ziska eviksyon kot neseler.

Travay pou ranforsi sa *Unit Enforcement* avek plis *staff* kalifye e ki annan kapasite e latitud apropriye, pe kontinyen. Nouvo *Board PMC* pe met bokou lanfaz lo la. Mr Speaker, i kler ki sa i pa zis en problem *PMC*.

Akoz laplipar sa bann problem i debord lo tou nou bann partner pou ed Seksyon *Enforcement PMC*, aminisyon pou pran aksyon neseler.

I pour sa rezon ki Gouvernman in reviz konpozisyon *Board PMC* e enkli nou bann partner kle; tel ki reprezantan lapolis e Gouvernman Lokal lo *Board*. Bi sa laspirasyon se pour ki nou

devlop en stratezi targete pou adres sa bann kontrovansyon kont aktyel e sa bann move konportman dan nou bann vilaz.

An paralel, *PMC* pe osi travay lo bann revizyon enportan pou ranforsi nou bann kontra. I enportan note ki laplipar nou bann kondisyon dan kontra, i date plis ki 10 an.

Alor i nesese pou met nou bann nouvo kontra azour e donn plis lotorite *PMC* pou pran aksyon. Plis ledan pou morde. Sa i pou ede avek bann nouvo *estate* e alokasyon ler nou fer nou bann Lagreman – ler nou bouz devan pou fer nou bann nouvo Lagreman.

Mr Speaker, vizyon Gouvernman se pou pran en lapros – mon repete, en lapros zero tolerans anver sa bann aktivite anti-sosyal koze par en pti group minoriter.

Mon enplor sa Lasanble silvouple, pou donn tou zot sipor Gouvernman e *PMC* dan sa demars. Mon konvenki ansanm dan linite, ki nou kapab adres sa problemn nasyonal, pour byennet nou pei e tou nou pep. Mersi Mr Speaker.

MR SPEAKER

Mersi *VP* – Mersi Minis. Siplemanter Onorab Labonte?

HON ANDY LABONTE

Mersi Minis pour ou larepons. Minis, zis petet pour lenformasyon piblik, vi ki ou'n nonm i annan apepre en 10 bann konportman anti-sosyal ki pe deroule. So, pour bann zabitan ki kontinyelman pa onor zot kontra, petet si ou ti kapab donn en previ ki bann sanksyon ou bann mezir ki ganny pran kont sa bann endividi?

E an *d'autre mots* lo en lot kote, ler i annan bann zabitan ki zot deside vann zot *unit* apre sa, e eski *PMC* i kontinyelman *follow-up* avek sa bann lezot dimoun ki fer sir ki zot onor sa Lagreman ki ti ganny agree avek premye, pou fer sir ki sa dezyenm *owner* i kontinyen lo menm Lagreman? Ki zot pa vin avek en lot latitid ki *distort* kominote. Mersi.

MR SPEAKER

Mersi Onorab. Minis wi, repons?

MINISTER

BILLY

RANGASAMY

Mr Speaker, mon a demann, avek ou permisyon, *Deputy* pou reponn sa 2 kestyon Onorab. Epi si i nesese mon a azout en pti pwen.

MR SPEAKER

Tre byen. *Deputy?*

DEPUTY CEO STEVE MUSSARD

Mersi Mr Speaker. Mersi Onorab pour ou kestyon. Onorab, mon pran ou dezyenm kestyon, en. Sa kot i konsern sa dezyenm dimoun ki antre dan lakaz. Bon, oparavan nou ti fer en sel konsiltasyon ler i ganny son lakle. La nou pe sanze la.

Pou dir ou – mon plezir pou dir ou ki nou annan en Program *RBM* ki nou fek, fek lanse, ankor nouvo. E ladan ou pou war ki i annan serten letap, serten *process* kot i pa zis pou en konsiltasyon ki ler ou ganny ou lakle.

I annan sa swivi, parey ou pe demande. *Well*, nou osi nou war sa. E *part* ki - *Part* dan sa legzersis *RBM*, sa Seksyon ki *deal* ek sa ki nou pe koz zafer kontra, i oblize – i oblize pou li al fer mon krwar 3, *at least* 3 swivi ek sa dimoun.

Menm pa zis pour sa dimoun ki'n ganny en lakaz ki'n *renovate*. I menm pour bann nouvo alokasyon. Kot nou mazine poudir; wi, nou fer gran *meeting* ler pe donn lakle. Tou zafer korek. Apre nou bliye ki arive. Nou dir, non, non, non, non, non. Akoz nou fini war poudir nou bezwen antre boner.

Menm apre ... mon krwar - mon pa tro kapab dir ou la ki kantite dele letan ki annan pour sa bann konsiltasyon ganny repete. Selman i annan ki nou pe planifye ki pou arive. Ou pou war ou menm ki bann nouvo alokasyon e bann dimoun ki ganny lakaz *renovate* – renovasyon, kot i pou annan plizyer sa diskisyon ek sa dimoun. Akoz *in the end*, *PMC* pa anv i okenn dimoun pe viv dan en nespes laterer, kot enn de dimoun...Nou anv i tou dimoun viv byen.

E sa nou *wish*, i nou swe kot nou annan en *estate* kot nou pa war drog, ou pa war isi, ou pa war lanmizik for. Akoz i pa fer sans pour nou, ou donn en dimoun en nouvo lakaz fek antre la. E i menm in espere 15, 20 an. Li menm i pe dir ou i pe espere tou sa letan. Apre ki ou war? Lanmizik for. Pa viv byen. Kosonnyen. Salte deor.

So i pa bann keksoz ki nou kontan, nou ti a voudre war. E sanmenm sa ki nou war nou sey sanz nou lapros. Annou koz ek sa dimoun. Pa zis en koze ler ou pe donn ou lakle. Apre nou *bye, bye, so long*. Bliye ou. Non. Annou – annou rod sa dimoun ankor en kou.

E avan sa, ler kantmenm ou ti pou koze - petet dimoun i bliye, *staff* i bliye. Be la nou'n

met li konman en...dan nou prosedir *RBM* kot *you have to do it*. Ou bezwen fer li. Ou bezwen al rod sa dimoun kot i ete. Annou atrap li. Annou koz ek li. Sirtou si nou war li poudir i pe konmans – ou konnen, i pe konmans al dan lot kote.

Mersi Mr Speaker. Mon krwar mon'n eklersi ou Onorab lo sa bout.

MR SPEAKER

Mersi. Minis, wi – Minis i le azoute?

MINISTER

BILLY

RANGASAMY

Wi, Mr Speaker, mersi bokou. Mon vremen anvi azoute, parske lapros ki nou pe pran osi pou bouz devan la. Avan nou pe fer alokasyon dan bann nouvo *housing estate*, mon pe demande ki bann alokasyon i ganny fer bokou pli boner, par egzanp dizon 2 mwan avan.

E pandan sa 2 mwan, sa 6 semenn dizon ki avan ki ou antre dan ou lakaz, i annan bann sesyon travay ki nou pou fer, parey enkli tou bann *cross-sectoral*. Pa zis *PMC*.

I ava annan Lapolis. I ava annan Gouvernman Lokal, Lafanmir, Sosyal, *DA* osi – Biro Distrik. Kot nou pou rankontre sa bann nouvo zabitan ki pe rantre dan sa nouvo proze. Pou

nou fer en seri preparasyon travay avek zot avan zot - parey en nespes *counselling – pre-counselling*, avan zot rantre dan zot nouvo apartman.

Akoz la prezan, petet zot ti abitye viv dan en lakaz. Zot pe al viv dan en *flat*. I annan bann lezot bann apartman i annan bann lezot kalite konportman pou zot al met zot azour avek. So nou pou pran sa konman en led ki nou pe donn zot.

Be dan sa konversasyon, nou pou met lanfaz. Parske i pour bann nouvo kontra ki lapros i pou zero tolerans. Nou a koz ek ou en fwa. Nou a koz en ou de fwa. Trwazyenm fwa ou pou ganny eviksyon si ou pa respekte ou bann kontra. Alors sa i pran preparasyon. Ou pa kapab dir ou pa ti konnen, parske ou pou asiste bann – sa pour bann nouvo *estate*, en. Bann *estate* ki egzistan ki deza annan bann kontra an plas. Sa legzersis i kontinyen - sa dyalog avek zot atraver distrik, pour nou sey rod fason avan ki nou pran aksyon.

Dernyen aksyon se eviksyon. Nou pa anvi fer sa. I nou *last resort*. Be selman si ou pa pe respekte, a lafen dizour ou pou bezwen pran li. *Full stop*.

MR SPEAKER

Mersi.

MINISTER **BILLY**
RANGASAMY

E kot i konsern bann *unit* ki dimoun i vann Mr Speaker, pou sir si in pas en dele letan ki zot in fini respekte zot peryod – dizon si i ti 15 an, zot kapab vann zot *unit* pou sir. Napa naryen ki anpes zot.

Me selman sa kondisyon Lagreman i kontinyen. *Ownership* i kapab sanze. Me selman ou kondisyon Lagreman i kontinyen, si ou dan en *housing estate* par egzanp. Fotespere mon'n reponn sa kestyon Onorab? Mersi Mr Speaker.

MR SPEAKER

Mersi Minis. Onorab, mon annan plizyer kestyon pou pran. Onorab William?

HON WAVEN WILLIAM

Mersi Mr Speaker. Bonzour Minis avek ou delegasyon. Minis, mon anv i ki ou klarifye avek nou, se ki enn; i annan bokou koze, bokou *meeting*. Me aksyon mon vwar poudir i en pti pe vreman limite.

Mon anv i ou dir avek nou, par lefe ki nou konnen bann problemm. E i annan bann lazans i ganny peye pour zot delivre serten servis e pran

serten responsabilite. Mon santi poudir zot pa pe fer li.

So, la ou pe dir pou dir i annan en nouvo kontra ki pe vini. Mon anv i demande. Eski sa bann nouvo kontra zot pe vin avek, i dir pou annan aksyon swivre? Akoz, nou konmans fatigue sa bann *meeting* ek sa bann repons fatigue. Mersi.

MR SPEAKER

Ale, nou a pran sa kestyon. Wi Minis?

MINISTER **BILLY**
RANGASAMY

Wi, mon osi mon konmans fatigue Onorab parey ou menm. E mon pou fer mon mye pou met tou sa lenerzi neser pou pran aksyon, pa zis koze.

Sa i tre enportan, akoz mon krwar mon konpran byen kot ou kestyon pe vini. I annan bokou keksoz nou agree dan bann *meeting* ki nou fer. Me apre *follow-up* pa la. Mon dakor totalman avek ou Onorab.

E mon krwar sa lapros dan tou nou bann Lazans; *being PMC, being SIA, being Planning Authority* parey bann ki dan mon responsabilite. Epi bann lezot lazans ki nou travay avek, fodre nou pran aksyon.

E aksyon la, si ou pa pe swivre ou kontra, *full stop*, Eviksyon evantelman. Sa

napa, napa - parey mon'n dir, zero tolerans, parske i pe fer nou lavi martirize e nou perdi bokou lenerzi konman en Minister, en Gouvernman, en *PMC* tousala – pou tay deryer detrwa dimoun.

Alors, i annan son konsekans avek ou aksyon. E mon pou demande ki tou lazans anba mon Minister i pran aksyon. I pa zis koze. E *that's the way forward* Onorab. Mersi bokou.

MR SPEAKER

Mersi. Mon a pran ou kestyon Onorab Roucou?

HON MICHEL ROUCOU

Mersi Mr Speaker. Mr Speaker, Minis in tous lo sa bout *enforcement*. Si Minis i kapab dir nou lekel bann zofisye – konbyen zofisye ki annan dan sa departman – dan sa *Unit Enforcement*? Lekel zot? Eski zot pe travay par rezyon, par distrik li menm li? Si Minis i kapab dir nou, fer nou konnen lekel zot par zot non.

Apre dezyenman; Minis, ti ava bon *PMC* i dir avek nou, *once* ki en dimoun in kas son Lagreman ki i pe fer bann konportman anti-sosyal, ki bann staz ki annan? Eski i ganny kriye? I annan en premye *warning*, dezyenm *warning*,

trwazyenm *warning*? Ouswa *PMC* i anmenn li Ankour, ouswa i *terminate* son Lagreman? Ti ava bon zot fer nou konnen. Mersi.

MR SPEAKER

Minis, *Deputy*, silvouple si zot kapab adres sa en pe vitman. Nou *out of time*.

DEPUTY CEO STEVE MUSSARD

Mersi Mr Speaker, mon a reponn kestyon Onorab Roucou. Onorab ou annan 2 kestyon, en? *Enforcement*; lekel nou bann *staff*? Nou annan 5 *staff* dan nou tim *enforcement*. Mon pa pou mansyonn ou zot non. Mon a donn ou zot non apre. Mon kapab *email* ou en pti *email* pour sa 5 non dimoun.

Ti annan 5 dimoun ki nou'n *recruit*, ki nou ranforsi. Ler ou get sa 5 ki nou'n *recruit*, nou annan enn de – *ok*, ti annan 3 ki ti la – 2 ki ti la depi oparavan.

Be selman sa ki nou'n anmenn *onboard*, zot pe fer en diferans. Petet nou pa pe war li vizib aköz problem ki mannyer i ete, i pran letan pour nou *solve*. *But* i annan dimoun ki annan sa kapabilite. Pardon Onorab?

MR SPEAKER

Ale, kontinyen silvouple
Deputy.

**DEPUTY CEO STEVE
MUSSARD**

I annan en *style* travay ki sa
nouvo *manager* in anmennen. E
i annan serten rezilta ki i pe
anmennen, en.

Onorab, vitman ou
dezyenm kestyon se prosedir.
Ou pou war kantite fwa nou
kriy dimoun, en. *First warning*.
Donn li en *compliance note*.
First warning. Pran *file*, in the
end, anvoy kot legal.

La nou fer 3 konsiltasyon
ek sa dimoun. Nou pran sa *file*
nou anvoy kot legal. La kot i en
pti pe tarde kot ou pou war
petet – parey Onorab William pe
dir; ou pa war telman sa
aksyon. Dan nou *file* pou kot
legal, legal nou servi Avoka an
deor e nou *submit file*. I pran en
pti pe letan - *Rent Board*.

La mon kapab dir ou, mon
annan 3 *case* dan mon lespri la
ki mon – konmsi ou – ler mon
retournen mon bezwen al
follow-up, aköz ou war poudir *it*
takes time. Ou bezwen tay
deryer sa bann Avoka. Nou osi
tou.

But avek tou sa sanzman
ki Minis in mansyonnen la, nou
nouvo Lagreman, nouvo *Board*
– nou annan lespwar ki sa bann
case koumsa la, i pou mars en

pti pe pli vit. Nou pou war
aksyon en pti pe pli direk.

E nou *hope* ki i a fer sa
sanzman. *Well*, nou *hope* en.
Nou vreman, vreman *hope* ki i
pou fer sa sanzman dan bann
estate. Nou pa anvi war sa bann
zafer ki pe arive la. Mersi Mr
Speaker.

MR SPEAKER

Mersi. Mon regrete mon bezwen
termin sa sesyon kestyon la,
pour nou zis kapab pran lezot
kestyon ki pe vini. Oubyen, si
non, bann Manm pa pou ganny
sans pran zot *break*. Nou a pran
poz la e nou a rebran ller.
Mersi.

(BREAK)

MR SPEAKER

Nou annan en pti sanzman
panel. Mon remerbye Mr Steve
Mussard pour son
partisipasyon, menm si in fini
ale.

E mon dir byenveni Mr
Jitesh Shah *CEO Seychelles*
Infrastructure Agency pour lezot
kestyon ki nou pe pran. Prosen
kestyon, Onorab Kelly
Samynadin?

HON KELLY SAMYNADIN

Mersi Mr Speaker. Bonzour
Minis ek ou delegasyon, tou

mon bann koleg Onorab e tou dimoun a lekout.

Mon keston i lir konm swivan; eski Minis i kapab dir sa Lasanble ki progre ki nou annan lo Proze Drenaz Turtle Bay Au Cap? Mersi.

MR SPEAKER

Mersi. Minis?

MINISTER **BILLY**
RANGASAMY

Mersi bokou Mr Speaker. Mersi Onorab pour ou keston. Mon le dir ki mon osi okouran ki pandan ou manda e menm ou predeser, zot ti pe touzour pouse pou rod solisyon drenaz apropiye pour sa rezyon dan Turtle Bay.

Mr Speaker, mon tre kontan pou partaz ek sa Lasanble pou konfirmen ki Proze Drenaz Turtle Bay i dan staz lenplimantasyon. Proze ti konmanse le 1^{er} May 2024, e i en proze – le 1^{er} Fevriye, eskiz mwan. Le 1^{er} Fevriye 2024. E i en proze ki planifye pou dire pour 5 mwan.

Pour lemoman kontrakter in konmans son louvraz lo kote lanmar o bor *Domaine de Val des Près* kot i pli fon, kot i pli - pour nou – kot nou pe desarze.

Avan ki louvraz permanan ti konmanse, nou ti osi fer serten travay enterim, parey ou

konnen Onorab. Tel ki fouy en *sump* pou ede ponp delo ki ti pe monte. Nou ti osi konstrir serten rigol tanporer e enstal bann tiyo atraver semen, pou ede kontrol problemm drenaz dan sa vilaz.

Me pou travay permanan, avan proze ti kapab demare lo *site*, nou ti bezwen ganny permisyon *wayleave* avek bann propriyeter prive parey ou konnen. Mon kontan pou dir ki in annan bokou korporasyon e kolaborasyon ek sa bann propriyeter prive dan sa landrwa.

Parske sa osi i pour zot byennet osi, par kont. Me zot kolaborasyon ti vremen egzanpler. Mon ti a kontan ganny sa en pti pe partou dan pei ler nou pe sey fer bann travay kominote.

Nou ti osi organiz en serten – en seri rankont avek Kontrakter *PUC* e bann diferan Lakonpanyen Telekomunikasyon, pou fer sir ki zot lenfrastruktir pa ganny andomaze pandan ki louvraz pe ganny antreprann.

Pour lemoman Mr Speaker, Proze i anba kontrol e nou swete ki sa lenstalasyon drenaz ki Gouvernman in investir ladan, i ava rezourd – i ava ede rezourd sa bann problemm linondasyon dan

Vilaz Turtle Bay enn fwa pour tou. Mersi Mr Speaker.

MR SPEAKER

Mersi Minis. Siplemanter Onorab Samynadin?

HON KELLY SAMYNADIN

Mersi Mr Speaker. Avan mon demann mon kestyon siplemanter, mon ti ava - mon anvî senserman remersye Gouvernman. Pli spesifikman Minister Later ek Lakaz. E Minis avek ou lekip pour ki sa proze in kapab finalman ganny antreprann.

Akoz i annan plizyer lannen depi ki bann zabitan Turtle Bay pe *somewhat* sibir – akoz sa bann sityasyon linondasyon kot delo i antre dan lakaz sak fwa lapli i tonbe. So felisitasyon pour sa travay.

Mon kestyon i al konm swivan; mon ti ava kontan konnen ki dele letan ki sa proze pou dan faz enplimantasyon? Eski i pou ganny fer dan bann diferan faz e osi konbyen i pou kote? Mersi.

MR SPEAKER

Mersi.

MINISTER

RANGASAMY

BILLY

Mr Speaker, mon a – avek ou permisyon mon a demann CEO Jitesh ki pe...

MR SPEAKER

Tre byen.

MINISTER

BILLY

RANGASAMY

...okip tou ban travay teknik, pou donn plis leklersisman. Mersi bokou.

MR SPEAKER

CEO?

CEO JITESH SHAH

Mersi Mr Speaker. Mersi Onorab pour ou kestyon. Proze li menm, i sipoze parey Minis in dir, en proze 5 mwan. I en sel proze. Pe ganny enplimante konman en sel faz proze. Kontra ti sinyen konmansman Fevriye. Savedir en mwan in fini pase.

Parey Minis in dir, nou annan en kantite bann seri rankont ki nou bezwen fer ek bann diferan *stakeholders*. So la aprezan nou pe get ankor 4 mwan pour nou kapab fini sa proze. Lo kote son kou, i en pti pe par anba R1.4 milyon sa proze. Mersi.

MR SPEAKER

Mersi. Onorab Sandy Arissol?

HON SANDY ARISSOL

Mersi Mr Speaker. Bonzour bann dimoun ki fek zwenn nou. Mon ti a kontan zis demann avek Minis;

Zot konnen souvandfwa letan nou annan bann proze drenaz – souvandfwa i anmenn en pe konstrent pour bann dimoun ki reste dan zalantour. Oubyen menm parfwa en larout parey Au Cap, souvandfwa i annan en kantite trafik.

So, eski dan sa travay ki zot pe fer, i annan tou sort konsiltasyon avek lezot lazans, pour ki i asire ki ban *flow* trafik i *flow* byen, bann zanfwa ki pe servi semen i annan bon direksyon, *proper sign* pou asire ki naryen pa arive - E ki sa travay deroul byen pour ki tou dimoun e lazans zot okouran i annan sa proze? Mersi bokou.

MR SPEAKER

Mersi.

MINISTER RANGASAMY

BILLY

Mr Speaker, sa en tre bon kestasyon ki Onorab in demande e i tre enportan pour nou fer sir nou ban proze pa enkonvenyans nou bann zabitan. Ki sa landrwa i reste toultan an sekirite osi.

Me petet pour laspe spesifik pour sa tel proze, mon a demann CEO Jitesh pou donn

en pti pe leklersisman. Mersi bokou.

MR SPEAKER

Thank you. CEO?

CEO JITESH SHAH

Mersi Mr Speaker. Mersi Onorab. Onorab, definitivman parey nou'n dir, sanmenm sa rezon kekfwa ki apre ki nou'n *award* sa proze avek sa kontrakter, pou li aktyelman demare lo *site*, in pran en pti letan. Akoz nou ti pe fer sir poudir tou dimoun i okouran ki pe arive.

Byensir, i pou annan lenkonvenyans, *whether we like it or not*. E i annan – sa bann semen laba Turtle Bay i annan landrwa ki vremen etrwat. So dimoun pou bezwen travay avek nou en pti pe. Selman nou lentansyon i pou fer sir sekirite dimoun i priyorite a lafen dizour.

E lo kote bann relasyon ki annan avek nou bann diferan partener, pour lemoman i vremen, vremen solid. Nou fer sir poudir konsiltasyon avek bann diferan *stakeholder* Gouvernman i arive.

I annan bann komite ki'n formen depi sa dernyen 2an, ki tou bann proze i ganny diskite lo la. Nou fer sir tou bann diferan akter i la *as well*. Zis

pou fer sir tou dimoun i lo menm paz, tou dimoun pe konpran proze. Mersi bokou.

MR SPEAKER

Mersi. Onorab Pillay?

HON SEBASTIEN PILLAY

Mersi Mr Speaker. Prenan kont ki nou'n ganny dir ki sa proze pou konmanse, ki pou pran ankor 4 mwan pour sa proze konmanse, eski ou annan okenn dat spesifik ki ou kapab donn Lasanble Nasyonal kan travay pou demare lo sa proze? *So that – hold on* en pti kou.

So that, pandan letan ki sa proze pe ganny fer, i annan *monitoring* pou vwar si sa proze pe ganny fer alaoter spesifikasyon ki'n ganny demande.

E an relasyon avek sa *size disturbance* pour bann dimoun, bann motoris ki servi sa rezyon. E nou konnen poudir trafik i kree en gro problem pandan sa rezyon.

Ki plan mitigasyon zot annan pou fer ki sa lenkonvenyans ki sa i koze, i minim an relasyon avek letan ki dimoun pou pran pour zot monte desann, pour zot al travay e desann anvil? Mersi Mr Speaker.

MR SPEAKER

Mersi. *CEO* i a reponn?

CEO JITESH SHAH

Mersi Mr Speaker. Mersi Onorab. Onorab, lo kote dele letan – parey mon'n dir, kontra li menm ti siny pour le 2 Fevriye. I egzaktman en kontra 5 mwan. So nou annan son *completion date 5 months from* le 2 Fevriye ki pou tonm le 2 Zen. Zilyet – le 2 Zilyet, *sorry*.

E nou annan en *Program of Works* ki kontrakter i donn nou pour nou kapab swiv pou fer sir poudir progre pe aktyelman progres dapre sa ki nou'n deza planifye.

Byensir bann proze parey kot i annan en kantite *civil works*, annandler keksoz i bezwen sanze. I annan bann *unforeseen factors*, nou pe travay anba later. So sa i touzour keksoz ki nou *monitor*.

Nou travay byen avek son kontrakter. Si nou bezwen fer serten sanzman, nou fer serten sanzman. Selman lenportans i pour sa proze konplet a tan. E sa i en keksoz ki nou pe pran vremen serye lo nou kote. Kontrakter i okouran.

E lo kote bann pwen mitigasyon li menm, lo kote trafik, nou annan serten konversasyon ki nou'n fer avek kontrakter lo pou fer sir i pa pe

travay dan *peak hours*. Aktyelman pe fouye.

Son bann masin, tousala, pa pe servi sa semen pandan letan *peak hours*. Definitivman parey mon'n dir, i pou annan en pti pe lenkonvenyans. Landrwa pa tro fasil pour nou travay ladan lo kote lespas.

I annan serten laspe sa proze, serten parti sa proze kot nou annan ase lespas. Kot nou lo propriyete prive oubyen nou lot kote kot *Domaine de Val des Près*. Sa pa pou vreman enpak trafik.

Selman ler nou pe koup semen, ler nou pe aktyelman travay o bor semen, bann *signage* i la. Pou annan bann lanons ler nou pe *actually fer road crossing as well*. Sa i bann protokol ki nou abitye swiv avek bann lazans konsernen; SLTA, eksetera, eksetera.

Fer sir poudir bann lanons i ganny fer pou fer sir dimoun *at least* i okouran ki sa proze pe arive. E pou annan serten letan kot zot pou bezwen adapte en pti pe. Mersi. Mersi bokou.

MR SPEAKER

Mersi *CEO*. Nou a avans lo kestyon nimerò 4, Onorab Andy Labonte?

HON ANDY LABONTE

Mersi Mr Speaker. Kestyon nimerò 4 i lir koumsa;

Etandonnen ki lakaz i ankor en gran demann dan pei, eski Minis i kapab donn Lasanble en *update* lo bann diferan proze lakaz ki dan *pipeline* dan pei e bann diferan *scheme* ki egziste? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mersi Onorab pour ou kestyon. Mr Speaker, sa size lakaz mon konnen i preokip nou tou dan Lasanble. E an se moman nou annan 146 *unit* lakaz abordab ki deza anba konstriksyon. E ankor 56 *unit* ki deza dan prosedir *tender*.

Sa i bann proze ki pe ganny finanse anba Bidze Gouvernman. Nou osi annan ankor 172 *unit* ki pe ganny finanse par *Saudi Development Fund* atraver en *soft loan*.

Nou dan en staz ase avanse pour nou kapab lans Lekspresyon Lentere lo sa bann proze. Mon priye avan Zen sa lannen. I en pe pli konplike parske nou pe bezwen travay etrwatman avek *Saudi Development Fund*.

I annan bann prosedir delika ki an plas. Vreman

spesifik, ki nou bezwen swivre. Be mon annan lespwar ki nou a kapab *wrap up* tou sa bann detay avan Zen sa lannen. E nou a kapab lans nou Lekspresyon Lentere.

An plis, mon kontan pou dir nou annan 80 *unit* anba don UAE ki pe finaliz - nou dan staz finaliz bann detay *MOU* avek Gouvernman UAE pour laspe *design* lenfrastruktir.

...nou plan ki'n fini finalize kot i konsern bann *site layout*. Prezan nou pe fer son bann *design* lenfrastruktir, anvi ki nou pe met 80 nouvo *unit* lo sa *site*.

Semen, drenaz, delo, elektrisite, tousala. I enportan pour mwan osi enform Lasanble ki nou pe osi kontinyen *explore* bann lezot loportinite pou ganny akse avek finansman pour bann lakaz abordab.

Antretan ki nou pe fer sa bann demars finansman, lekip SIA pe kontinyen progrese e prepar bann travay teknik. En fason si larzan i debloke, nou'n pare pour nou enplimant proze. Sa atraver pei; Mahe, Praslin, La Digue.

Byensir Gouvernman pou kontinyen finans bann tel proze anba son Bidze, baze lo sityasyon finansyel dan pei. Me, nou pe osi kontinyen tap laport tou bann pei zanmi, e osi bann

lezot lorganizasyon, pour lasistans atraver bann don oubyen *loan*.

Apard bann Proze Lakaz Abordab ki mon'n koz lo la, nou osi nou annan nou bann Proze *Mid-Range Condo*. Nou pe target met lenfrastruktir pou devlop anviron 200 *unit* pour sa prosen 2 an.

Nou annan osi nou *Schemes Special Housing* parey zot konnen, ki siport bann kliyan ki annan zot pti kare later. Me akoz zot swa dan en lanplwa enformel, oubyen i mank zot en pti bout larzan pour zot konplet zot proze, la nou pe get siport zot avek sa modalite finansman.

E si tou keksoz i mars byen, nou pe target omwen ed en douzenn fanmir ki merite anba sa *scheme* sa lannen. SIA pe travay etrwatman lo sa proze e mon santi ki sa pe progres byen.

Nou osi pe travay avek Minister Gouvernman Lokal pou deblok bann ka kritik preparasyon lakaz. Sa ki nou ti apel *Vulnerable Housing Repair Scheme* anba nou *Housing Repair Scheme*, pour nou ankor enn fwa ed tou sa bann fanmir ki merite - ki'n ganny idantifye dan distrik, o pli vit posibil.

Bidze i la. Nou bezwen eksplwat sa Bidze e met sa

bann reparasyon an plas. Sa parey mon'n fer resorti, i en program ki ganny *gère* par Gouvernman Lokal, me tou sipor teknik i sorti kot nou Minister.

Prenan kont volim ka demann lakaz dan pei, nou osi annan nou *Scheme Part Rental*. Nou ede soulaz nou bann aplikan merite ki pe peye, pou lwe lakaz prive pandan letan ki zot pe esper zot solisyon lakaz permanan. Sa program i mars ase byen. Mon vreman satisfè ki manner pe ale.

Parey zot tou zot konnen Mr Speaker, Gouvernman ti ogmant lasistans pou sorti 45poursan e vin 55poursan lannen pase. Permet mwan donn en legzanp pour bann aplikan ki pe espere, ki pe a lekout osi, pour mwan konmsi donn en pti apersi ki sa i vèdir.

Mr Speaker par egzanzp; si i kout R10 mil pour en dimoun lwe en lakaz 2 lasanm, Gouvernman pe ede pey R5 mil 500, e sa aplikan i pey balans 4 mil 500 par mwan olye 10 mil. Alors i ed li kit en pe larzan dan son pos akoz nou konnen i pa fasil pou lwe lakaz prive. Me an menm tan i en solisyon enterim ziska ler nou kapab met an plas en proze lakaz ki i a kapab apropiye pour zot.

Nou pe ed anviron en 151enn aplikan merite tou le mwan, e ki zwenn tou bann kriter anba sa *scheme*. Gouvernman, nou reste angaze. E mwan konman sa Minis responsab ek tou mon leker, mon reste determinen plis ki zanmen pou adres sa problem lakaz apropiye pour tou! – mon repete, tou nou bann aplikan ki merite e pe pran zot responsabilite o serye pou pey zot kontribisyon *HSS* tou le mwan dan en fason konsistan.

Sa pour mwan i en pwen kle e mon anvi ankouraz bann zabitan – bann aplikan ki pe espere; pey zot *HSS* dan en fason konsistan tou le mwan. A vwar ki zot tonm dan sa kategori ki nou apel aktiv. E zot serye, e zot angaze zot osi pou pran zot responsabilite.

Nou bezwen fer nou pep konpran ki pa ditou fasil. Inital nou sey bat zot latet. I pa ditou fasil. Sirtou ler ou annan plis ki 3 mil aplikan ki pe espere. E serten aplikan pe espere, sagrinan pou dir, pour en solisyon lakaz pour anviron 25 an.

Avek tou senserite, sa i bles mon leker bokou Mr Speaker. E parfwa menm, avek konpasyon ki mon annan, mon santi mon larm onnetman Mr Speaker, i koule, ler mon

rankontre sa bann aplikan ki plenny zot *sore* avek mwan dan bann *meeting face to face*.

Nou napa sa baton mazik pou rod solisyon otomatik, be tou zefor pe ganny fer pour nou deklans bann proze pour nou kapab ed nou bann zabitan ki responsab.

Mon le profit sa lokazyon ankor enn fwa pour mwan ankouraz tou bann aplikan ki pe espere, pour pa zanmen perdi lespwar e annan en pe pasyans avek nou. Zot bezwen fer zot bout parey mon'n mansyonnen oparavan.

Par kont, e pran zot responsabilite. Pey zot *HSS* tou le mwan. *Plan* byen zot fanmir. Pa al angaz zot avek bann konplikasyon familyal. E donn Minister bon lenformasyon, ki vre relye avek zot aplikasyon. Nou bezwen zot lonnekte ek zot korporasyon.

Gouvernman pou touzour reste sa fasiliter e nou pa pou zanmen kit personn deryer. Avek lagras Bondye tou i posibil. E mon swete avek sa bann proze ki mon'n mansyonnen, nou a kapab ede soulaz sa bann sityasyon e donn mazorite dimoun ki merite, ki la pe espere pour en kantite letan, en solisyon lakaz o pli vit posibil, Mersi Mr Speaker.

MR SPEAKER

Mersi Minis. Onorab Labonte, siplemanter?

HON ANDY LABONTE

Mersi Minis pour ou larepons vremen detaye e sa i donn lespwar bann dimoun ki lo lalis. Petet en pti leklersisman.

Nou konnen ki poudir pli gran demann i plizoumwen pour bann lakaz afordab parey ou'n dir. Me petet pour bann zenn ki nou konnen poudir *one bedroom* avek *bedsitter* pa pe vremen dan Proze Gouvernman.

Petet i annan serten *scheme* ki zot pe mazin pou devlope ki pou kapab asiste bann zenn pou kapab akse en fwaye ki deside pour zot sorti dan zot lakaz, oubyen petet atraver bann Sekter Prive pou travay avek zot dan sa laliny koumsa? Mersi

MR SPEAKER

Mersi Onorab. Minis?

MINISTER

BILLY

RANGASAMY

Wi. Mersi Speaker, mersi pour donn mwan laparol. Mersi Onorab pour sa kestyon. I en bon kestyon.

Solisyon ki nou pe vwar pour bann zenn ki tonm en pe dan sa kategori konman bann

zenn profesyonnel se bann Program *Mid-Range Condo*, ki nou santi i ava ed zot.

Me mon osi konsyan ki ou pe petet fer lanfaz; eski Gouvernman pou kontinyen e oubyen i annan plan pour bi pour konstrir bann *bedsitters*? Sa i en konversasyon nou pe pran a lenter. I en bon pwen. I en vreman en bon pwen. Petet i en solisyon ki nou kapab vwar konzwentman avek Sekter Prive.

Akoz ler nou'n get nou lalis demann, nou war presyon i en pe for. Sirtou lo bann fanmir ki gran. Alors se sa nou pe met nou lenerzi lo bann apartman 3 lasanm, par egzanp, ki nou santi i a kapab soulaz sa bann sityasyon.

Me nou annan sa bann ka osi. Parey nou dir, nou pa pou kit person deryer. So alors nou bezwen tap sa laport. Petet travay pros avek Sekter Prive pour nou rod solisyon – bann solisyon *studio flats* oubyen *bedsitter* parey nou'n dir. Mersi Mr Speaker.

MR SPEAKER

Mersi Minis. Siplemanter lezot Manm. Onorab Monthy?

HON PHILIP MONTHY

Mersi Mr Speaker. Bonzour Minis e ou delegasyon. Minis

bann diferan *scheme* ki zot annan, eski – nou konnen nou annan en kantite Seselwa ki pe reste aletranze ki pe mazin retourn Sesel.

Mon pe demann ou sa kekyon akoz mon fek ganny kontakte yer avek enn. E ki pou al aste en later, zot war li en pe konplike, en pe difisil pour zot. E ki zot prefere annan opsyon en petet *mid-range condominium* oubyen en *condominium*.

Eski sa bann diferan *scheme* i *cater* pour sa bann Seselwa ki deor ki pe prevwar retourn dan zot pei? Eski i annan en opsyon, en fason ki zot kapab *apply* pour zot kontribye pour zot ganny zot prop lakaz? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mr Speaker, avek ou permisyon, PS Barbe petet ki ti pe travay lo en pe sa program zeneralman. Mon a demann li avek ou permisyon, pou sey ed nou lo sa size. Ki lapros nou pe pran, eksetera. Epi si i neserer mon ava azoute Mr Speaker.

MR SPEAKER

PS, wi?

PS DENIS BARBE

Mersi Mr Speaker. Onorab, mersi pour ou kestyon. An prensip i annan 2 lapros Onorab. Zis pou tir en pti pe konfizyon, zis permet mwan petet donn en pti pe leklersisman.

Nou annan nou bann Seselwa ki pe travay deor ki zot in bezwen bouze pour serten rezon spesifik. Nou bann *scheme* avek nou bann prodwi aktyel i fer provizyon pour zot kapab antre. Me selman nou *set* bann paramet kler.

Tandis ki bann ki'n bezwen deplase pour serten rezon, apard ki travay, nou annan serten travay ki nou pe fer avek *Foreign Affairs* ki *capture* en pti pe sa ki nou apel sa bann *Diaspora*. Ki nou pe devlop en Polisi pou kapab gete egzakteman ki mannyer lasistans i vini pour sa bann group dimoun.

I en pti pe boner la pour nou kapab fer serten prononsyasyon. Nou prefere les sa travay teknik ant *partnership* avek *Foreign Affairs* fini ganny *endorsement* tou lede *management*. *And then*, dan en moman apropiye nou ava pas lenformasyon avek Lasanble. *Thank you*, Mr Speaker.

MR SPEAKER

Mersi. Onorab - Minis, ou le azoute?

MINISTER **BILLY**
RANGASAMY

Wi Mr Speaker, mon ti anvi zis azout en pti pwen. Pou sir nou pe ankouraz si nou bann Seselwa deor i anvi retournen, vin ed zot pei. Nou pe ankouraz zot. E pour lemoman bann ki'n apros nou, nou sey konekte zot avek Sekter Prive kot nou'n vwar i annan posibilite.

Par egzanp kot – mon a donn zot en legzanp ase kler; par egzanp dizon kot *GICC* pe fer bann *mid-range* – eskiz mwan, pe fer bann *Condo* pour nou, pour nou bann aplikan ki lo nou lalis.

Zot osi pe fer bann *luxury apartment*. So nou *tie* zot ek sa bann ka parey. Zot apros *GICC*, ganny en konversasyon - e bann ka koumsa. Be selman, priyorite pour lemoman se sirtou sa gro lalis aplikan ki mon'n fer resorti, mon'n mansyonnen boner.

Pour lemoman, les mon annan lalis devan mwan la. Zis nou pe koz *mid-range condo* i annan apepre 703 aplikan. *Condo* i annan apepre 346 bann aplikan ki lo nou lalis. Pres mil ekek lanmenm. Alors, nou priyorite se pour zot.

Me nou ankouraz nou bann *diaspora*, nou bann Seselwa aletranze pou retournen. E si nou kapab nou ouver bann laport pour zot. Lonterm parey *PS* in fer sorti, nou pou bezwen sey vwar ki lezot posibilite i kapab annan pour nou devlop en prodwi dan sa laliny. Mersi Mr Speaker.

MR SPEAKER

Mersi Minis, Onorab Esparon?

HON REGINA ESPARON

Mersi Mr Speaker. Mr Speaker, mon ti ava anvî remersi Minis dabor avan mon demann mon kestyon, pour sa 12 *unit* ki nou pe ganny kot *ex-Ferrari*. E sa i pou ed nou pour nou kapab deplas en pe bann dimoun dan *red zone*. En *issue* ki nou pou adrese pli tar dan bann kestyon.

Minis ou'n nonmen ki i annan 172 *unit* ki pou ganny fer anba *Saudi Soft Loan*. Eski sa i pou osi enkli sa 48 *unit ex-Sacos*, La Gogue. En pti pe reasirans si i osi i pou tonm dan sa 72 ki ou'n mansyonn? Mersi.

MR SPEAKER

Mersi. Minis?

MINISTER
RANGASAMY

BILLY

Wi, en repons ase vit sa enn Onorab. Mon kapab reasir ou i tonm anba sa *Saudi Loan* osi, sa 48 *unit* ki ou'n koz lo la. 40 *unit*, eskiz mwan. Mon pe toultan pouse pou ganny plis.

Sa 40 *unit*, parey ou konnen nou'n fer bokou demars. Nou'n bezwen menm aste 2 propriyete prive. Ganny akse atraver en propriyete prive, epi aste en lot kare later pour nou kapab ariv lo sa teren. Sa teren i annan gran potansyel. Dan distrik Glacis en pe letan nou pa'n kapab fer gran keksoz. Alors wi, i lo sa lalis *Saudi Project*. Mersi.

MR SPEAKER

Mersi. Onorab Labrosse?

HON RICHARD LABROSSE

Mersi Mr Speaker. Bonzour Mr Speaker. Bonzour tou dimoun. Bonzour Minis ek ou delegasyon.

Minis mon'n ekout ou atantivman ler ou pe donn larepons lo sa kestyon. Ou'n donn plizyer devlopman ki pe arive lo kote lakaz. Me selman sa ki mon pa'n tande, bann ki sipoze – i annan bann redevlopman mon pa'n tann ou koz lo la. Par egzanp mon konnen kot mwan Plaisance i annan 2. E osi dan bann lezot distrik o bor nou, parey Les

Mamelles osi mon konnen i annan.

Ki plan Minister – eski sa bann detay ki ou'n donn nou bomaten i pe osi pran kont sa bann redevlopman? Mersi.

MR SPEAKER

Mersi Onorab. Minis, ler ou pare?

MINISTER

BILLY

RANGASAMY

Wi.

MR SPEAKER

Yes?

MINISTER

BILLY

RANGASAMY

Wi, Mr Speaker, mon vreman apresye sa kekyon ki Onorab in azoute. Bann sit redevlopman i reste nou bann priyorite prensipal osi.

Li son bann konplikasyon se ou pe bezwen fer landrwa – konstrir nouvo landrwa pour ou kapab bouz dimoun ladan, bouz bann zabitan ladan pour nou kapab redevlope.

E redevlop sa bann sit i en priyorite Gouvernman, parske nou anvi klersi tou sa bann *slums*, sa bann landrwa ki dan bann leta ase trakasan. Sirtou environ dan lavil, dan zanmerant lavil, dan kan Plaisance, Corgat Estate, Les

Mamelles, *Société du Logement*. Nou annan en pe osi *Société du Logement* dan Beau Vallon osi.

Tou sa bann landrwa nou anvi met lafors pour nou deblok sa bann proze redevlopman. E mon kontan pou dir ki *PMC* in pran en lapros pozitiv pou vwar ki mannyer zot osi zot kapab asiste dan sa bann redevlopman e donn finansman apropiye.

E i zot bann *estate* a lafen dizour ki zot pe gère, zot pe *manage*. Alors zot *Board* in pran en desizyon pou sey asiste Gouvernman e ede ek son finansman.

Firamezir ki finans – nou kapab ganny bann sipor siplemanter parey mon'n mansyonnen, petet ek bann pei vwazen, bann pei zanmi. E menm atraver Bidze Gouvernman kan nou kapab ganny sa bann louvertir.

Nou lentansyon se *clean up* tou sa bann landrwa ki demann redevlope e met zot azour, e standar apropiye. Mersi Mr Speaker.

MR SPEAKER

Mersi. Mon a pas en kekyon kote Lopoziyon, menm si i pa dan lord strik. Onorab Pillay?

HON SEBASTIEN PILLAY

Mersi Mr Speaker. Mr Speaker, mon'n ekout Minis atantivman e mon pe regard lakantite plan, lakantite proze ki annan.

Mon pe zis demann mon lekor, eski sa i zis lo sa papye ki avek Minis oubyen pe reelman ganny fer, akoz nou pa ankor war *Saudi Fund* antre? E tou sa bann *unit* ki sipoze ganny fer, swa i zis lo papye la, swa pe ganny fer.

Me kestyon pertinan ki bokou dimoun pe demande la Minis; ou'n nonm en lalis lakaz ki pou kontinyen monte. Eski ou Gouvernman pa krwar poudir lapros ki zot pe pran, *given* ki en aplikan ozordi i bezwen pey en later pre R500mil, apre al deblok ankor en *loan* pres R1.2/1.4milyon pou fer en lakaz?

Sa pe fer ki bokou aplikan pe dekouraze pou al ver en later. E tousala pe vin ver proze lakaz ki pe ogmant lakantite dimoun ki pe rod lakaz. Ki ou Gouvernman pou fer pou *ascertain* si sa i leka e ki opsyon zot pe donn dimoun?

La i annan en msye in fek mete la ki li in fer en laplikasyon 2021, zot in rezete. Konmsi sey eksplik nou ki egzaktaman zot plan i ete? Akoz sa ki nou pe tande i zis parol, me nou pa pe war okenn

aksyon tanzib ki pe ganny fer Mr Speaker.

MR SPEAKER

Ale, nou a permet Minis reponn silvouple?

MINISTER

BILLY

RANGASAMY

Ok. Mersi Onorab pour ou 2 kestyon. Vreman 2 kestyon pertinan pour sir. Lo aktyalite lo aksyon lo teren kot nou ete ek sa bann proze, mon ava demann *CEO SIA* pou donn nou sa lenformasyon.

E mwan personnelman mon pe swivre sa bann proze dapre program, tre pros pour mwan vwar plan ek laktyalite – parey an Angle nou pou dir sa; *Planned progress and actual progress*, pour mwan swivre sa vreman etrwat.

Parske letan nou'n bataye pour nou ganny sa larzan avek Minister Finans dan bann Bidze eksetera, mon anvi ki nou servi sa larzan byen *to the maximum*. Tou pti sou i konte. Nou pe esey depans tou sa ki nou kapab pour nou fer nou ban proze vin en realite. Alors lo progre mon a demann *CEO Jitesh* pou reponn sa pwen.

Lo sa dezyenm pwen, *PS Barbe* oubyen *PS Florentine* – petet *PS Barbe* ki pe vwar en pti pe bann aplikasyon later, ki

bann *trend* ki nou pe vwar. I a kapab donn nou en pe leksplikasyon siplemanter. E si neserer mon ava azoute Mr Speaker.

MR SPEAKER

Wi, nou a sey avanse silvouple akoz nou pe *run out of time*. Annou fer li direk. CEO premye?

CEO JITESH SHAH

Mersi Mr Speaker. Mersi Onorab e Minis. Zis pou donn en pti kontrandi lo ki bor nou ete avek bann proze li menm. Parey Minis in dir, i annan 146 *unit* ki deza anba konstriksyon. Kontra in fini *award*. Proze i *ongoing*. Nou annan en kontrakter lo *site*. Sa i 146 *unit* dan 9 proze lakaz ki deza in demare.

Nou annan osi 3 proze ki nou kapab dir nou dan faz *procurement*. Enn *actually* nou'n fini anvoy son notis to bann kontrakter. Sa i pou ankor 24 *unit*. E 2 lezot bann *tender* ti sipoze pe antre sa semenn pou ankor 32 *unit* lakaz total lo sa 2 proze. So, an aktyalite, avan lafen Mars nou pe ekspekte annan 56 azout 146 *unit*, ki fer 202 *unit* ki pou anba konstriksyon avan lafen Mars.

Lo kote bann *pipeline projects*, en pti pe parey Minis

in dir, i annan sa 162 *unit* atraver *Saudi Fund* – 172 *sorry*, atraver *Saudi Fund* ki nou fek fer en konversasyon avek zot semenn pase. En *zoom call* ek zot. Zot in fini aprouv tou dokimantasyon ki nou'n anvoy kot zot.

E la aprezan nou pe bouz dan sa faz *expression of interest* pour nou kapab *move the project forward*. So i annan progre, en pti pe parey Minis in dir, zot annan zot bann prosedir *as well*. I en pti pe – keksoz kekfw i pran en pti pe plis letan ki nou prosedir anba nou Bidze pour nou. *Obviously* i annan en lot antite ki *involve*. Zot bezwen fer sir poudir keksoz pe byen ganny fer. Selman keksoz pe bouz devan. E nou ti a swete parey Minis in dir, *that by Zen* sa lannen nou pa'n zis fini avek Lekspresyon Lentere, nou dan prosedir *tender* li menm *as well by Zen* sa lannen. Mersi.

MR SPEAKER

Mersi. *PS*, zot pou azoute? Annou fer li bref silvouple.

PS DENIS BARBE

Mersi Mr Speaker. Onorab, mersi pour ou kestyon. Mon pa tro asire ki mannyer pou fer sa larepons bref Mr Speaker, selman mon a seye. Mon anvi

donn *as much* detay posib pour nou ganny en konpran stratezi Minister ler nou pe bouz de lavan.

So, ler nou pe gete, demann lakaz in toultan apepre 3 mil. *Like it or not*, in toultan 3 mil. Menm si nou fer Proze Perseverance, nou fer Proze Roche Caiman, nou war poudir demann i 3 mil.

Savedir kestyon kle nou bezwen demann nou lekor; aköz ki nou reste lo sa 3 mil mark e kantite lenvestisman Gouvernman pou bezwen fer pour nou kapab rezourd problem lakaz?

I enkli osi sanzman ledikasyon ki nou annan pou fer avek nou bann dimoun, pour nou kapab *at least* gete egzaktaman ki mannyer nou rezourd serten sa bann fakter ki pe kontribye fer demann.

Nou bezwen osi get en pti pe bann lezot fakter eksteryer. Menm si Minister pou vin avek nenport program, nou konnen kou konstriksiyon pe kontinyelman monte. Reget grander lakaz ki nou pe fer pour nou fer sir dimoun i kapab *afford* pou ganny zot prop lakaz.

E get en pti pe si oule lo sityasyon teren ki nou annan. Kantite teren ki nou annan. E get en pti pe kantite teren ki

nou kapab *build* lo la, ki fer ki Minister i bezwen reget en pti pe son lapros pou fer sa program soutenab.

Alor an menm tan, ler nou pe fer alokasyon lakaz, nou pa pe zis pe pas en problem osi lo *PMC*. Me selman nou pe donn zot loportinite osi pour zot kapab *at least manage* e fer zot zesyon en pti pe pli efikas.

Savedir, ki Minister in fer? Nou'n reget grander lakaz ki nou pe fer an term lakaz afordab. Profil nou bann kliyan, sa 3 mil kliyan.

Fer sir nou ganny lenformasyon aktyel lo zot toulezour ki bann *housing officers* i deor, travay an kolaborasyon pre avek distrik. Pou nou fer sir nou ganny byen nou bann kliyan, ganny byen zot bann *affordability*, pour nou fer sir nou pe *match* prodwi anliny avek zot bezwen, avek zot mwayen.

E an menm tan, devlop en lot prodwi kot nou pe pous bann dimoun ki dan *middle-income* pour zot kapab *at least* pa esper sa kantite letan.

Me selman, pour zot kapab ganny en solisyon, e an menm tan donn zot lespas pour zot kapab kontribye osi an term solisyon pour lozman. E sa i sa *mid-range condo*.

Nou konpran poudir *we're at the very start of* sa langazman. E nou konman Gouvernman, nou bezwen annan sa langazman pou dir nou pou – *we will be consistent*. Nou pou rod solisyon. Kot nou annan teren, nou pou prioritiz nou bann prodwi *mid-range condo*.

Whilst si nou pe vin avek en Program Lakaz Afordab, ki nou bann dimoun i kapab *at least* antre dan *house purchase*. Laplipar zot pour zot kapab *at least* rod zot lakaz.

E an menm tan, nou bezwen demann nou lekor kestyon osi relye avek kou konstriksyon, later ki nou pe met *available*. Likel dimoun ki vreman kapab *at least* fer en devlopman?

So, nou pa pe zis get li akoz pri lakaz, nou pe *divert* dimoun pou sorti lo later, pe anmenn li dan lakaz. E nou pe get meyer solisyon anliny avek bezwen, avek *affordability* nou bann dimoun. E sa i ava ed nou vin avek en programm sistematik e soutenab. E sa ki nou pe rode Mr Speaker. *Thank you*.

MR SPEAKER

Mersi. Mon a pran kestyon Onorab Romain.

HON GEORGES ROMAIN

Mersi Mr Speaker. Minis, vi ki mon'n tann ou ou'n dir i annan bokou proze lakaz. Mon krwar sa nou tou nou konnen. Toultan demann i bokou menm. Mon kestyon ki mon ti a kontan demann Minis; ki bann kriter ki ou Minister i servi pou fer lakaz dan bann distrik, anvi ki annandler nou vwar ki i annan – nou tou nou bezwen lakaz dan distrik byensir. Be anvi ki nou vwar annandler i annan bokou plis proze lakaz dan en spesifik distrik.

Alors mon ti a kontan konnen ki bann kriter ki Minis i servi pou fer sa bann proze lakaz? Mersi.

MR SPEAKER

Mersi. Minis?

MINISTER BILLY RANGASAMY

Ok. Mersi Mr Speaker. Kriter prensipal ki nou servi pour sir kot i konsern laspe teknik, se kot nou kapab ganny bann teren kot nou kapab maksimiz son lavantaz? Konmsi ek sa larzan ki nou gannyen dan nou Bidze devlop *maximum unit* avek en depans ki rezonnab, ki balanse. Lo sa laspe soutenabilite parey nou dir, sa i enn nou bann kriter prensipal.

E osi, an plis ki sa, nou sey vwar posibilite osi, analiz demann par sak distrik. E la mon'n demann Departman Lakaz pou ranforsi zot bann profi lo zot bann kliyan, lenformasyon lo zot bann kliyan, pour nou konpran byen demann. Pour nou gete ki manner nou demann i kapab *match* ek nou *supply*.

Pa tou distrik ki sa i posibil. Par egzanzp si ou get par egzanzp serten distrik kot teren i limite. Dan legzanzp Mont Fleuri. Menm Les Mamelles par egzanzp, Mont Buxton - kot napa teren, nou pe bezwen rod lot solisyon pour sa bann landrwa lo en baz rezyonnal.

Me selman zeneralman, nou pe sey – nou'n pran sa letan *COVID* letan mwan mon'n vin dan lofis, dan letan *COVID*, nou'n analiz tou nou bann teren. Mon'n demann lekip teknik ek Departman Later pou analiz sa bann teren. Zot fizikman al lo teren, revwar kot nou pou kapab konmsi maksimiz kantite lakaz nou kapab konstrir avek larzan ki nou gannyen.

E annefe, konmsi bann teren ki rezonnab pou konstrir lo la. Akoz nou pe depans larzan *taxpayers' money* alors nou esey servi sa larzan dan en fason efikas. Fotespere sa in

reponn ou kestyon Onorab? Mersi bokou Mr Speaker.

MR SPEAKER

Mersi Minis. Nou avan avans lo prosen kestyon, kestyon numero 5, Onorab Richard Labrosse.

HON RICHARD LABROSSE

Mersi Mr Speaker. Ankor en fwa bonzour tou dimoun ki a lekout. Mr Speaker, kestyon numero 5 i lir konm swivan; eski Minis pour lakaz i kapab enform Lasanble ki progre avek Proze *Mid-Range Condo* e lekel distrik ki'n montre plis lenterere? Mersi.

MR SPEAKER

Mersi. Minis, repons?

MINISTER

BILLY

RANGASAMY

Mersi Onorab pour ou kestyon. Mersi Mr Speaker. Mr Speaker, sa bann Proze *Mid-Range Condo* ki an devlopman, i konm swivan;

Avan mon donn bann lalis, mon a zis dir ki sa prodwi in vremen ganny en bon *momentum*, en bon *traction* parey nou dir an Angle e i vremen ankourazan.

E nou lo nou kote nou pe pous tou nou kouraz pour nou enplimant en premye proze, en 32 *unit* Iles Perseverance

atraver en *PPP - Private Public Partnership*.

Sa proze in enn ki'n pran en pti pe letan, me pou finaliz bann laspe legal. Epi sityasyon spesifik sa kontrakter an partikilye. Me mon kontan pou enform Lasanble ki finalman nou bann dokimantasyon in fini pare, e nou pe ekspekte siny Lagreman avek kontrakter tre byento.

Dezyenm proze ki nou annan se i annan 24 *unit* Iles Perseverance. Sa i en proze ki nou pou ekspekte lans *tender* avan lafen Mars 2024, ki pou enkli; son lenfrastriktir avek 3 blok 8 *unit*. Savedir nou pou ganny 24 *unit* an tou.

Nou pe balanse si nou kapab kekfwa ganny en pe plis *unit* 3 lasanm dapre demann. Toultan i annan sa kestyon ki monte. Me osi en pe 2 lasanm osi. Kekfwa dan sa 3 blok, par egzanp ki mon pe vwar, probableman 2 blok i ava 3 lasanm e en blok i ava 2 lasanm.

Nou osi annan 16 *unit* Bel Air kot nou apel sa *ex-Daycare*, ki pour sa proze nou pe lans *tender* pour lenfrastriktir pandan dezyenm semenn Mars. Savedir semenn prosen nou pe prepar nou pour nou lans *tender*.

E son blok pou ganny *tender* apre ki lenfrastriktir in ganny fini met an plas. Par egzanp sa blok nou pe anvizaze konekte li avek sistenm *sewage*. I annan bann travay lenfrastriktir pour nou enplimante avan ki nou kapab enkli bann miray, eksetera – pour nou deklans son laspe bann blok *flat* li menm.

Cascade kot nou apel *ex ... SLTA*, eskiz mwan. I annan 32 *unit* ki nou pe anvizaze enplimante laba.

E mon'n osi pe pous lekip lenfrastriktir pou vwar si nou pa kapab ganny en pe plis, anvi ki nou pou bezwen petet sa bann *mid-range condo*, konsider kot i posib met bann *lifts* pour nou kapab al en pti pe pli o. En fason ki nou a kapab ed plis nou bann aplikan.

Anyway, sa i en pti detay me nou pe anvizaze ganny omwen 32 *unit* laba osi. E sa nou pe lans *tender* pour lenfrastriktir pandan dernyen semenn Mars. E son bann blok pou ganny *tender* an menm prensip apre ki Proze Lenfrastriktir in fini konplete.

Nou osi annan ankor 3 proze; nou annan 16 *unit* Praslin, 6 *unit* La Digue e 24 *unit* Anse Royale ki nou pou ekspekte lans *tender* dan dezyenm kar sa lannen.

Mr Speaker, i enportan pour mwan enform Lasanble ki akoz sa prodwi i efektivman enn ki *self-finance*, kot Gouvernman pe *focus* lenerzi dan bann travay teknik, bann *planning application* – met tou bann proze annord tou sa.

Me osi pe *focus* kouver kou lenfrastriktir, nou'n bezwen – nou'n bezwen – en *self-finance* pa bliye. Nou'n bezwen fer en konversasyon avek bann labank, pou annan en lagreman lo ki fason ki zot pou finans en tel proze atraver *loan* pour zot kliyan.

Nou bezwen mazine ki bann *self-finance* ki ti'n ganny fer oparavan ler later ti - nou ti annan later pour nou kapab fer sa, ti plizoumwenn bann lakaz lo bann kare later lo li menm.

Be la nou pa pe kapab fer sa. I pa posibil. Ek demann ki annan, nou pe plito al vertikal. Alors nou pe fer bann blok *flat* lo bann kare later. Sa lo li menm i fer serten konplikasyon ek lanrezistremman pou pran *loan*, eksetera.

Dan ka *mid-range condo*, i kapab annan plizyer labank par egzant, ki pe finans diferan kliyan lo en sel kare later dan menm blok. Malerezman pa tou bann labank ki'n pare pou partisip dan en tel proze.

La mon le profite – mon asire bann labank i annan bann dimoun pe ekout mwan. Mon le ankouraz bann labank pour revwar sa prodwi an partenarya avek Gouvernman.

La nou pe koz anviron 700 – 700 ka, 700 dosye ki zot pe kapab pe ede deblok finansman pour sa bann konstriksyon. I annan en bon prodwi pour bann labank konsiderab, par egzant.

Apard sa Proze *PPP* ki mon'n mansyonnen pli boner, li ki son modalite finansman i diferan. Nou annan zis en proze ki nou pe konstrir bann blok dan limedya. Sa, sa 24 unit Perseverance. Larestan Gouvernman pou konsantre met lenfrastriktir oparavan.

Sa i pou ed nou teste byen ki mannyer sa modalite pou marse. I en nouvo prodwi ki nou pe met ater. E pour bann – i a ed nou konpran en pti pe son bann konplikasyon, son bann lavantaz eksetera. Fason pour ki bann lezot proze, pour nou pa perdi letan, nou enplimant sa konponan lenfrastriktir touzour ki tonm bor sa finansman Gouvernman o pli vit posibil, en fason ki nou a kapab bouz lo lot faz enplimantasyon lakaz li menm batiman, o pli vit posibil apre.

Mr Speaker, an se moman nou annan plis ki 700 aplikan ki'n montre gran lentere e ki'n deza bouz zot aplikasyon anba sa prodwi. Mon'n fini sirkil en lalis demann par distrik pour sa prodwi, kot ou lofis Mr Speaker. Anfen ki ou a kapab partaz ek bann Manm Onorab pour zot ganny en pe plis lenformasyon, en pe plis detay.

Les mwan azoute Mr Speaker ki anvi ki nou pe fer fas avek kontrent teren limite e en gran demann lozman, sa prodwi i en solisyon soutenab. En pe parey bann kestyon ki'n ganny demande oparavan, i en prodwi ki annan bann solisyon soutenab pour nou kapab maksimiz teren ki a nou dispozisyon.

Fodre pa nou bliye, si ou analiz dizon pran Mahe li menm, bann teren plat in preski fini, apard ki L'île Aurore epi enn de pti *pockets* dan Perseverance. Alors nou pe get bann teren ki anler dan lapant, ki annan dan montanny eksetera.

Alors sa bann teren, nou bezwen maksimiz zot kapasite kot i posibil. E kot i annan teren plat, li osi nou pe fer parey, parey mon'n mansyonnen tel ki Perseverance par egzantp, e Cascade.

Nou pe kontinyen regard tou bann later Gouvernman e menm pe rod fason aste serten later prive si i vo lapenn, pour nou kapab devlop sa bann *mid-range condo*. Mon annan diferan legzanp mon kapab site, be mon konnen bann Onorab ki'n travay ek nou pou osi konnen ki mon pe koz lo la.

Si nou war sa teren i pou donn nous a lavantaz, i vo lapenn pou aste pour nou kapab ed nou bann fanmir Seselwa, nou pe fer li.

An konsekans, mon le profit lokazyon pou enform sa Lasanble ki alokasyon sa bann *unit* pou lo en baz rezyonnal. La mon le fer sir bann Onorab pe ekout mwan byen. I pou bezwen lo en baz rezyonnal parske i annan distrik ki napa later.

Prenan kont par egzantp, mon a donn zis detrwa legzanp; Mont Fleuri, Mont Buxton, parey Plaisance parey nou'n dir boner, napa later. Alors nou bezwen fer sa lo en baz rezyonnal. Zot bezwen konpran. Zot bezwen annan sa lespri lapartaz pou konpran ki i pou bezwen lo en baz rezyonnal. E zot pou bezwen korpore ansanm.

Nou bann dimoun ki enterese ek sa prodwi *self-finance*, nou pe fer nou mye konman en Gouvernman

responsab pou ed zot pran kontrol zot lavi e ganny zot prop lakaz e lakour. Sa sirtou bann zenn profesyonnèl, bann *graduates* eksetera, ki annan kapasite pour zot al *raise* zot larzan pou zot pran en *loan*.

Me nou santi ki sa i pou bon, en bon prodwi. E nou eksite pou vwar son egzekisyon e ki manner i a demare bann lannen devan. Me an zeneral mon annan bon konfor e ki lekip in pran bon – bann bon desizyon lo bann teren ki nou'n selekte. E byento a kapab deklans sa bann proze. Mersi Mr Speaker.

MR SPEAKER

Mersi Minis. Onorab Labrosse, siplemanter?

HON RICHARD LABROSSE

Mersi Mr Speaker. Mersi Minis pour sa bann larepons byen detaye. Mr Speaker, mon'n tan Minis osi ler dan son bann repons ki'n donner, in mansyonn dan diferan distrik ki sa bann devlopman pe arive. Ou'n nonm Cascade, Perseverance.

Me ankor enn fwa mon pou retourn ankor lo mon kestyon taler. Par egzamp dan bann distrik kot i annan bann redevlopman - sirtou nou pa le perdi nou bann zabitan; eski la

zot Minister pe konsidere osi kekfwa pou met en tel prodwi parey, ler zot pe mazin fer redevlopman an menm tan avek *social housing*?

Aprè mon dezyenm kestyon Mr Speaker; mon ti a kontan si Minis osi – ou'n eksplik bann defi ki zot pe rankontre ek bann labank osi pour zot antre an partener avek zot.

E la mon ti a kontan konnen si i annan okenn lezot zefor ekstra ki zot pe mete, kekfwa okenn lezot kondisyon ouswa lezot fason ki pou kapab osi fer bann aplikan ki pe vin *apply* sa prodwi, annan en pti pe plis bagaz lespwar pour zot kapab antre lo la? Mersi Mr Speaker.

MR SPEAKER

Mersi. Minis?

MINISTER

BILLY

RANGASAMY

Mr Speaker, mersi bokou. Lo kot i konsern ou distrik Onorab, mon a reponn sa premye parti Mr Speaker lo redevlopman dan Plaisance. En pti pe ki nou pe pran konsiderasyon pour *mid-range condo*.

Dezyenm parti bann konversasyon ek labank, bann lezot demars ki nou pe fer, mon

a les PS Barbe eksplik sa akoz i ti pe aktivman *involved* depi konmansman lo sa size. I annan bann keksoz ki i a partaz avek nou.

Me, pour sir, pour distrik kot *Société du Logement* i ete, lo sa sit i annan gro potansyel. I annan en *view* spektakiler. I annan enormeman nou'n war potansyel seryezman ki nou kapab eksplwate. SIA in fer sa *layout*. Lo en kote nou pou met nou bann *mid-range condo*.

Lo lot kote nou pou met nou bann *redevelopment* – bann blok redevlopman. So i pou annan sa de konponan lo sa vilaz. E nou swete ki sa de kominote a kapab viv byen ansanm. Enn sa bann laspe ki nou pe ankouraze kot i annan *mixed-use development*. Enn fwa nou *gère* nou bann aplikan byen boner, pour zot kapab viv byen ansanm.

Be se sa i enn - parey dan distrik Plaisance ki napa lezot later par kont, nou'n sey analiz *ex-Murray*. I en teren tre konplike e napa ankor lezot gran posibilite dan Plaisance.

Nou pe sey tap laport bann propriyeter prive ki enterese ed nou. Me par kont sa ki nou annan se anler *Société du Logement*. La nou pou met enn nou bann blok. Enn ou 2

blok *mid-range condo*. Mersi Mr Speaker, mon a les PS...

MR SPEAKER

Wi. PS pou azout en bout?

PS DENIS BARBE

Mersi Mr Speaker. Onorab, mersi pour ou kestyon. Onorab, lo komansman 2022 nou ti fer en *Symposium Housing* avek sekter banker. Ti annan enn de zot ki ti partisipe.

Enn dan bann rezon prensipal se pour nou kapab gete egzaktman ki mannyer nou'n kapab kolabore. Si i annan lapeti pour nou kapab *improve* en pti pe lo kalite to lentere, ouswa bann kalite prodwi ki labank pe ofer nou bann kliyan.

E i annan bann serten labank ki'n resevwar sa pozitiv. E i annan ki'n dir nou ki poudir zot *already* pe donn en larzan – pe *borrow* larzan avek dimoun deza lo zot *prime lending rate*, ki fer li difisil pour zot kapab *at least manoeuvre*.

Selman nou, nou pe fer ankor en lesey. Nou'n deza pe fer serten konversasyon avek Minister Finans avek *Bankers Association* pour nou kapab gete egzaktman ki mannyer nou kapab travay avek bann diferan labank.

I annan bann labank ki *very receptive* par egzantp *Nouvobanq*. E nou annan serten dialog osi ki nou'n deza konmanse avek *Commercial Bank*. Me selman nou anvi anmenn tou labank *on-board*. *This is where* lenportans avek *Bankers Association* atraver Labank Santral ek Minister Finans pou ed nou dan sa konversasyon.

I pa en konversasyon ki nou'n fini. Parey Minis in mansyonnen, nou annan sa diskisyon ki nou pe fer lo sa Lagreman pou zot santi zot konfor akoz zot pe donn en – pour bann *mid-range condo* zot pe donn en *loan* baze lo en promes.

So zot bezwen annan en serten sekirite kot labank i santi li konfortab avek. So sa osi i en laspe ki nou ankor pe fer dyalog avek bann sekter banker pou zot konfortab avek sa modalite. Mersi Mr Speaker.

MR SPEAKER

Mersi *PS*. Bon nou bezwen avans lo prosen kestyon. Nimero 6, Onorab Michel Roucou?

HON MICHEL ROUCOU

Mersi Mr Speaker. Mr Speaker, mon kestyon i al koumsa; eski Minis i kapab dir avek Lasanble

ki plan devlopman son Minister pou *ex-Mont Royale*? Mersi.

MR SPEAKER

Mersi Onorab. Minis?

MINISTER

BILLY

RANGASAMY

Mersi Onorab pour ou kestyon. Mon konnen ki sa size in preokip ou bokou Onorab. Plizyer repriz ou'n tap mon laport pou vwar; be ki pe arive?

Mr Speaker, Gouvernman pe konsider plizyer opsyon pour sa sit. Baze lo demann later pour plizyer diferan proze nasyonal e ki osi konpatib avek litalizasyon later dan sa rezyon.

Mr Speaker, sa sit *ex-Mont Royale* i enn parmi bann sit stratezik dan rezyon lavil ki Gouvernman pe agresivman analize pou reponn bann demann bezwen nasyonal.

Mon le enform sa Lasanble ki konman en Gouvernman responsab nou bezwen analiz tou bann opsyon an detay.

Gouvernman in konmans en diskisyon preliminar avek Liniversite Sesel pour sa sit e diskisyon i ankor *still* an mars.

E Mr Speaker, byensir nou pou konsilte Lotorite Distrik e osi ou menm Onorab, e bann lezot lazans konsernen a en moman apropiye avan ki nou

konplet plan final pour sa sit ex-Mont Royale. Mersi Mr Speaker.

MR SPEAKER

Siplemanter Onorab?

MR SPEAKER

Siplemanter Onorab?

HON MICHEL ROUCOU

Minis. Mersi pour ou larepons. Mon apresye osi ki Lotorite Distrik osi tou pour ganny anmennen dan okenn desizyon ki ganny pran.

Me selman Minis parey ou konnen se ki nou pe - nou Lotorite Distrik nou pe gete eski okenn desizyon ki ou Minister, Gouvernman i pran, ki benefis i pour anmennen pour lazennes Mont Fleuri?

Sirtou lo kote lozman ouswa lo kote ledikasyon li menm li. Mersi.

MR SPEAKER

Mersi. Minis.

MINISTER **BILLY**
RANGASAMY

Mersi. Mersi Mr Speaker. Mersi Onorab pour sa pwen. I en pwen vremen enportan Onorab. Parske nou - pour nou lazennes, nou lazennes i enportan se zot nou fitir.

E pour sir, mon santi dan sa proze i pour en konponan

vremen enportan pour nou konsidere. Parske sa landrwa lo menm i annan en konponan rezidansyel, kot i ete.

I sitye dan landrwa rezidansyel, an menm tan i sitye akote en lekol, en gran kompleks Lekol Mont Fleuri.

E nou, nou santi ki si nou ti kapab ganny sa de konponan, konmsi bann pilye kle dan sa nouvo devlopman.

I kapab enkorpor lazennes, i kapab enkorpor ledikasyon i mon kapab dir i pour *thumb ups*. E se sa nou dezir osi pour nou fer sa vin en realite Onorab. Mersi bokou.

MR SPEAKER

Mersi Minis. Bon nou kapab avans lo prosen kestyon. Limero 7, Onorab Regina Esparon.

HON REGINA ESPARON

Mersi Mr Speaker. Mr Speaker, eski Minis i kapab dir Lasanble si son Minister i anvizaze antreprann en lot letid lo sit teren glise, Vista-do-Mar dan distrik Glacis ki'n ganny demarke koman *red zone* pour revwar sa sityasyon avek bi reviz sa *moratorium* ki egziste? Mersi Mr Speaker.

MR SPEAKER

Mersi Onorab. Minis.

MINISTER **BILLY**
RANGASAMY

Mersi Mr Speaker. Mersi Onorab pour ou kestyon. Vreman en bon kestyon Onorab.

Me i enportan note ki sa moratwar ki egziste dan sa *zone*. Kot nou apel sa *red zone*, Vista-do-Mar ti ganny mete an lannen 2005. Apre lensidan glisman teren, ki ti pe afekte bokou propriyete dan sa landrwa.

E depi 2005, Lotorite Plan parey mon'n ganny enformen pa'n aprouv okenn nouvo devlopman fizik dan sa *zone*, ouswa dan sa *buffer zone*, ki fer letour sa *zone*, sansib li menm.

Zot aprouv serten plan renovasyon, eksetera. Me pa pour fer nouvo konstriksyon. Mon – o kour bann lannen ki'n pase Lotorite Plan in kontinyelman mentenir sa moratwar.

Alors pour reponn ou kestyon direkteman, Onorab. Pour lemoman, sa moratwar i reste anfors.

Mr Speaker, i enportan pour en nouvo letid ganny fer avan ki okenn desizyon i ganny pran lo sa moratwar.

Avek teknolozi ki egziste ozordi, nou konnen ki i posib pour nou fer en analiz e letid aprofondir. I en lapros ki nou pe

deza fer, lo lezot sit. Kot nou'n santi i a risk baze lo bann lensidan ki nou'n gannyen resaman.

Bann gro lapli le 7 Desanm par egzantp e menm sa *weekend* premye a trwazyenm Mars 2024.

E sa bann lendikasyon ek sa bann nivo lapli ki nou pe gannyen. Bann nivo lentansite lapli dan en pti peryod letan in kree bokou devalas.

Parey ou konnen ou menm nou'n al - menm sa *weekend* ariv pres 112 ka. Mon'n lo teren mon osi ek mon bann zofisye. I trakasan.

Alor se sa mon pe dir, se sa mon pe dir, sa moratwar i bezwen reste pour lemoman. Me an konklizyon pour reponn dezyenm parti ou kestyon. Lefe ki deza i annan sa moratwar Vista-do-Mar *red zone*.

Nou priyorite pour lemoman se pour konplet letid lo bann nouvo sit, par egzantp Le Niole, Bel Ombre, Brillant eksetera kot nou'n ganny bann konplikasyon teren glise.

Se konplet nou letid laba, fini ek sa, pran bann desizyon. Akoz pour lemoman si en dimoun i soumet en plan dizon Le Niole, pour fer son proze, i napa okenn moratwar an plas e ou pa pour kapab anpes li.

Me pour lemoman nou konnen, nou'n vwar dan nou de lizye bann konplikasyon ki'n arive. Alors nou pe met nou bann eksper, nou bann letid teknik, *focus* lo sa bann landrwa avan.

E ler nou a fini nou priyorite se fer sir ki nou pran prekasyon nesaser. E ler nou a fini, nou a bouz Vista-do-Mar.

Zeneralman nou bezwen pran bann prekasyon nesaser, pour fer sir ki bann, ki nou pa met lavi dimoun an danze. E nou toultan mentenir zot sekirite.

E bann devlopman an premye, nou bezwen pran sa bann lapros. Mon konnen parfwa dimoun i fristre akoz zot pa kapab fer zot plan progresse ek zot devlopman lo zot lakour.

Me selman nou bezwen pran zot sekirite zot lavi an priyorite. Alor se sa i enportan pour nou fer sa bann letid.

E nou napa swa, nou bezwen azir koman en Gouvernman responsab. *Planning Authority* i bezwen pran son responsabilite e kontrol sa bann kalite devlopman.

Alors Mr Speaker, zeneralman lentansyon se konsantre nou letid lo sa bann lezot landrwa kot nou'n dekouver i pa stab. I annan

konsern. Epi nou a bouz *red zone* e mon pa anv i lev en size delika.

Me malerezman letan mon'n pran lofis mon pa'n vwar okenn letid ganny fer. Me i kler ki ti annan sa konplikasyon e desizyon ti ganny pran.

Alors la mon anv i ki nou, nou konklizyon letan nou fer i baze lo bann fe syantifik, i baze lo bann letid ki'n ganny fer - lo en nivo aprofondi.

En fason ki nou a kapab fer en bon desizyon e pran en bon plan lavenir pour sa *red zone* Glacis.

Parey ou konnen, menm Gouvernman pe konstrir sa *12 unit* anba, ki nou apel sa *ex-Ferrari* pour nou *relocate* serten zabitan ki reste anler dan Vista-do-Mar. Alors se sa lapros ki nou pe pran sa *zone*.

Akoz i ankor *still* anba en moratwar. E nou pour annan en letid pour ganny fer o pli vit posib ki nou kapab arive. Mersi Mr Speaker.

MR SPEAKER

Mersi Minis. Wi, siplemanter Onorab Esparon?

HON REGINA ESPARON

Mersi Minis pour larepons detaye. E mersi pour sa linisyativ pour ki nou kapab bouz en pe bann *tenant*, ki anler

dan bann flat kot i pe kontinyelman kase pour al dan ex-Ferrari.

Me selman nou *still* annan sityasyon kot i annan dimoun ki dir ou poudir pour zot pa pe bouze. Malgre ki zot dan bann flat Gouvernman, e zot pa pou sorti.

E petet mon pa konnen lo sa kote Minis, kwa ki pour kapab ganny fer pour bann ki dir ou poudir zot, zot pa anvi sorti? Me i annan ki dir ou poudir wi, zot pour sorti.

Me par kont Minis, mon'n osi obzerve ki in annan enn de konstriksyon ki'n ganny fer. Mon pe panse, ki sa bann konstriksyon ki'n ganny fer resaman, i bann plan ki ti'n ganny approve avan, me ki prezan ki zot pe fer zot konstriksyon.

Me selman dan bann ka kot sa bann dimoun pe - in fer konstriksyon resaman la, ki konsey ki ou Minister pour donn sa bann dimoun vizavi lasirans.

Akoz mon konnen poudir oparavan bann lakonpanyen lasirans pa ti pe asir bann lakaz dan Vista-do-Mar, parski sa teren in glis de fwa.

MR SPEAKER

Ale.

HON REGINA ESPARON

Ki kalite konversasyon ou Minister in annan avek bann lakonpanyen lasirans, li menm li pour bann dimoun ki dan Vista-do-Mar, ki swa zot in ganny zot plan aprouve depi avan ki pe fer sa konstriksyon an se moman? Mersi.

MR SPEAKER

Mersi. Minis a reponn silvouple.

MINISTER BILLY RANGASAMY

Mersi Mr Speaker. Mersi Onorab pour ou kestyon. Onorab sa kestyon i en pe delika. Akoz Gouvernman – depi 2005, in pronons son lekor ki sa landrwa i en *red zone*. I en *high risk*.

Nou pa'n, nou pa vreman konmsi nou'n menm parey ou konnen deplas dimoun. I annan dimoun ki'n pran desizyon pour bouze, nou'n bouz zot. E zot in ganny konpansasyon eksetera.

So zeneralman sa desizyon ki sa landrwa i *red zone*, i *still* reste. E Gouvernman pa pour kapab antre dan sa konversasyon menm pour ek lasirans.

Parske pour lemoman nou pwennvi lo la koman en Gouvernman se i ankor en *high risk area*. E nou pa voudre ki

dimoun se sa nou pe fer sa bann proze anba.

Lo kote lo bann proze lakaz Gouvernman, pour nou *relocate* nou bann *tenants* ki pe reste la deza. E sa lentansyon se, se nou bezwen mentenir sa.

E lasirans i a pran en desizyon zot menm. Me solman nou nou'n pronons nou lekor koman sa landrwa i en, i en *high risk area*. E i reste parey pour lemoman Onorab.

E bann plan ki'n ganny aprouve oparavan. Sa mon pa kapab fer komanter lo la, ziskan ler mon vwar pour mwan menm dan mon de lizye, ganny plis detay.

Me mon a, mon ava fer sa konversasyon pour mwan analiz sa avek Departman *Planning* enn pti pe pli o profon. Pour mwan konpran kwa ki'n ganny aprouve e si i bann renovasyon ki dimoun in fer, oubyen bann nouvo konstriksyon.

Me dapre mon konpreansyon pa ti devret annan okenn nouvo konstriksyon la lo sa sit, an prensip. Mersi.

MR SPEAKER

Mersi Minis. Nou a *move on* silvouple. Mon annan lezot Manm pe demann kestyon. Onorab Pillay.

HON REGINA ESPARON

Mr Speaker, i annan en bout mon kestyon ki pa'n reponn.

MR SPEAKER

Ale vitman.

HON REGINA ESPARON

Sa bann dimoun, bann *tenants* ki deza dan lakaz la ki pe refize pour zot sorti pour bouz dan nouvo proze.

I annan ki'n dir *ok*, nou ava bouze. I annan ki'n dir pa pour bouze. Ki pour arive? Parski zot tou pe reste dan lakaz *PMC*. Mersi.

MR SPEAKER

Wi. *PS* pour klarifye.

PS DENIS BARBE

Onorab, mon krwar nou ti fer en travay ase *extensive* avek – apard 16 fanmir. E si lakaz i ankor pour *PMC*, nou pa anvi ki *PMC* i war li dan en pozisyon enn pti pe difisil demen si i ariv en zafer kot *PMC* i *liable* pour okenn zafer.

So, *PMC* pour bezwen travay ek zot koman *the owner of the property* pour zot kapab bouze. I pa pour vreman annan en swa, *unless* ki zot in fini aste zot lakaz e zot in fini ganny zot lavant, sa i en konversasyon diferan.

MR SPEAKER

Mersi. Byen. Onorab Pillay, ou kestyon silvouple.

HON SEBASTIEN PILLAY

Mersi. Mersi Mr Speaker. Mr Speaker Minis letan ou'n dir poudir ti napa okenn dokiman pour sa sityasyon. Be in annan dokiman akoz dokiman in ganny montre ek zabitan e ki ti dan biro distrik oparavan.

Kestyon ki mon annan pour ou. Prenon kont sa bout *red zone*, sa bout Vista-do-Mar ki zot pe dir dan *red zone*. Ki bann dimoun pa pe kapab refer devlopman.

I annan dimoun ki zot lakaz, par anba i bann lakaz ki Gouvernman ti konstri ki zot ankor pe reste ladan e sa ki Onorab pe refer avek pa le sorti.

Ki ou Minister pour fer pou fer ki pandan letan ki zot pe reste la sa bann kondisyon ki zot pe reste ladan pa vin parey ou'n dir taler? Deplorab i pa bann kondisyon ki pa adekwat pour dimoun reste ladan.

E mon oule ou fer serten koreksyon Mr Speaker. Akoz mon pa krwar ou'n vin prepare pour sa kestyon Minis. *Sorry* mon bezwen dir ou.

I annan de bout sa bout la Vista-do-Mar, i annan en bout ki dan *red zone* e bann bout ki

pa dan *red zone*, se la kot dimoun i fer aplikasyon pour *planning*.

Mon krwar zot ti devret fer en pe plis travay lo ki mannyer sa *zone* in demarke, Mr Speaker. Akoz mwan mon'n reste Glacis tou mon lavi mon'n swiv, mon konpran tre byen sa landrwa, e mon fanmir menm i reste bor laba.

So, mon konpran ki mon pe koz lo la Mr Speaker. Mersi.

MR SPEAKER

Wi, wi. Minis osi i konpran sa ki i pe koz lo la. Minis ou repons. Minis ou repons.

MINISTER**BILLY****RANGASAMY**

Mr Speaker...

MR SPEAKER

Onorab Vidot, ou a gard silans silvouple. Letan Minis pe reponn.

MINISTER**BILLY****RANGASAMY**

Mon pour bezwen dir Onorab Pillay ki avek tou respe, mon en enzenyer par profesyon e mon konpran mon analiz lo sa size.

E vi ki i annan en glisman, i annan *zone* ki dan milye i annan *zone* ki an deor. Mon ti dir dan mon repons. Petet ou

pa'n ekout byen. Wi – non. Wi.
Non. *Ok.*

MR SPEAKER

Order!

MINISTER **BILLY**
RANGASAMY

Wi, non. *Ok* parey mon ti dir. Petet ek lakantite volim ki annan mon pa'n kapab antre dan tou sa bann laplikasyon ki'n ganny soumet. Pa vedir – sa kestyon ti pou - ou bann kestyon i vin kot mwan. Onorab bann kestyon in vin kot mwan mon krwar Merkredi swar.

Weekend antye, mon'n pri dan dezans e mon'n fer serten resers. Me pa tou resers ki mon'n kapab fer, mon pa pour dir ou i – sa ki ou pe dir i vre. Mon pa'n kapab resers dan tou sa distrik.

Me selman mon pe pran li mon responsabilite, pa zis koman en enzenyer – pa koman en Minis, koman enzenyer pour mwan donn koudmen lekip.

Ki mon ti pe dir ki ti napa. I napa en letid teknik, detaye ki ti'n ganny fer ki'n dir la bann analiz. Zis in ek sa bann glisman, i annan bann *zone* ki'n ganny idantifye.

Alors ki nou ti pe fer? Mon ti dir i annan bann teknolozi pour lemoman ki nou pour sey

aplike dan bann Bel Ombre, Le Niolo eksetera.

E ou kapab servi sa bann teknolozi pour nou revwar *red zone* e kapab pran bann desizyon apropiye. Ou konpran mwan ou? Sa ki mon ti pe sey fer resorti Onorab.

Kot konsern *PMC*, si nou annan bann apartman ki *PMC* in vwar zot kondisyon pe vin pli deplorab, nou pour fer serten renovasyon. Nou pour fer serten reparasyon.

Me nou pa pour kapab depans gran larzan pour nou al fer sa bann travay. E koman nou bann, dizon nou bann blok i pare pour nou kapab relocate zot, nou ava *relocate* zot.

Me petet ou pe balans latet petet ou pa satisfè sa larepons. Mon a, mon a fer mon mye posibil pou mwan al pli o profon, konpran sa problem ki an detay.

Me tou lentansyon se met lavi dimoun an sekirite e se tou. Mersi bokou.

MR SPEAKER

Mersi. Mersi. En Manm si i annan diferans ant sa ki en Minis in dir. I kapab *state* sa diferans. Selman i pa bezwen fer komanter, poudir Minis pa'n fer son preparasyon, Minis pa konnen ki i pe dir. I pa neserer.

En kourtwazi silvouple. Onorab Bistoquet. Ou kestyon vitman silvouple.

HON ANNE BISTOQUET

Mersi Mr Speaker. Mr Speaker, anvi ki Minis in mansyonn bann lezot ka *landslide*. Eski Minis, i kapab enform sa Lasanble ki lasistans ki kapab ganny ofer pour bann dimoun ki pe reste dan sa bann *high risk zone*?

E ki mezir e *advice* ki zot pe donn bann dimoun ki pe anvizaze konstrir lakaz dan sa bann landrwa? Mersi.

MR SPEAKER

Mersi. Minis.

MINISTER **BILLY RANGASAMY**

Mersi Mr Speaker. Onorab Bistoquet, si ou pa *mind*, zis pour nou fer sir nou'n byen konpran ou. Eski ou pe koz sa *red zone* Glacis oubyen bann lezot landrwa?

HON ANNE BISTOQUET

Bann lezot landrwa ki ou'n mansyonnen an zeneral. Mersi.

MINISTER **BILLY RANGASAMY**

Ok. Non i *ok*. Pa problem, mon a reponn. *Ok*.

MR SPEAKER

Minis, si ou annan en repons. Si aplik pour kestyon.

(laughter)

MINISTER **BILLY RANGASAMY**

Mon ava eksplike. Mon a eksplike. *Ok*. Onorab Bistoquet mwan mon apresye ou'n demann sa kestyon. Parske kekfwa i annan bann dimoun i en pe dan dout, pa tro konnen. Se sa nou'n met lanfaz nou'n dir be tyonbo en kou.

Verbalman nou'n konfirman nou pa pe *entertain* aplikasyon la. Mon krwar nou'n vwar la dan nou de lizye ki pe arive i danzere.

Alors tou bann teknisyen, tou bann *expert* pe *focus* zot lenerzi fini sa bann letid.

E *CEO SIA* i a konfirm ek mwan, petet tre byento nou a kapab vwar en - bann rezilta sa bann letid. Ki fason nou a kapab deside. E sa i premye letap.

Zeneralman ek sa bann dezas ki nou'n fer, kot nou'n vwar i annan bann ka danzere pour bann lakour. Parey petet ou konnen Onorab, nou'n *relocate* serten dimoun, par egzantp dizon Le Nirole kot i annan sa gro ros ki lekip pe kase. Nou'n *relocate* sa bann

fanmir dan bann lakaz. Nou'n fer sir sa danze lavi in ganny met a kote, konmsi ganny proteze. Eskiz mwan.

Me par kont tou lefor pe – nou pa pe tarde ek sa letid. Nou anvi akseler sa, pour nou kapab pran bann bon desizyon. E sa i premye lapros ki nou'n pran. Bann ki'n ganny afekte serten - parey ou konnen petet atraver le 7 Desanm bokou dimoun in ganny fer.

Enn pti led konpansasyon pour ed zot repar serten keksoz. Tou lasistans zot in gannyen ek Gouvernman Lokal ek bann lekip apropiye. Tou dimoun in ralye in donn koudmen.

Dorénavant, nou bezwen fini sa letid e en pe - *ah!* Mon profite. *CEO* Jitesh in aktivman *involve*.

Alors i a donn nou en pe detay, pour petet ed nou partaz enn pti pe *latest* avek - atraver ou Mr Speaker avek lekip. Mersi bokou.

MR SPEAKER

CEO pour azoute?

CEO JITESH SHAH

Mersi Mr Speaker. Mersi Minis e Onorab pour ou keston. Minis in tous enn pti pe lo bann letid, ki nou pe fer. Nou dan prosedir pour nou komans fer

en *full survey* avek en *drone* avek *lidar*.

E osi en *geotechnical survey* lo bann sit ki nou'n idantifye koman bann ki enn pti pe pli danzere, enn pti pe pli a risk.

I en keksoz ki nou'n fini *commissioned*. Solman *unfortunately* nou pa ankore kapab, fer sa louvraz aköz letan. Pour nou kapab servi sa lekipman, nou pa pour kapab servi li dan letan lapli.

Solman en keksoz ki nou ti i a swete poudir pandan sa detrwa mwan ki vini. Sa trwa sit priyoriter Bel Ombre, Le Nirole avek Saint Louis Hill. Nou pou'n fini fer sa letid pour nou konpran egzaktman ki mannyer zeoloji sa landrwa i ete. Ki pour ed nou, enn pti pe. I pa vedir poudir i pour neserman bann desizyon kot nou pour deklar plis *red zone*, oubyen pour napa devlopman.

Selman kekfwa i pour met nou dan en pozisyon, kot nou kapab pli byen gid dimoun, lo ki kalite devlopman i kapab ganny fer la; ki bann lezot prekosyon ki zot bezwen pran ler zot pe fer zot devlopman.

Si i annan lezot lenfrastruktir ki bezwen ganny mete dan sa landrwa pour protez sa bann lakaz, oubyen

ban lezot devlopman dan lefitir *as well*.

So, i en keksoz ki nou pe sey fer - teknolozi i la, *nowadays* pour nou kapab fer sa kalite letid

So nou anvi servi li pour fer sir poudir okenn desizyon ki nou pran, nou pour kapab defann poudir i ti – lo en baz teknik sa ti en bon desizyon pour nou pran. Mersi.

MR SPEAKER

Mersi. Nou ava avans lo prosen kestyon nimerò 8. Onorab Richard Labrosse.

HON RICHARD LABROSSE

Mersi Mr Speaker. Minis, kestyon nimerò 8 i *comme* swivan:-

Eski Minis pour Later i kapab enform Lasanble konbyen laplikasyon later ki'n ganny rezourd pour sa dernyen 3 an e lekel sa bann distrik? Mersi.

MR SPEAKER

Mersi Onorab. Minis.

MINISTER

BILLY

RANGASAMY

Mersi Onorab pour ou kestyon. Mr Speaker, pandan sa dernyen 3an Minister in kapab rezourd 323 aplikasyon later lo Mahe, Praslin e La Digue.

240 dan sa 323 ka i bann aplikasyon pour bann kare later *land bank*. E la balans 83, ti bann ka pour bann aplikasyon bann pti morso later Leta. Nou apel sa *state land*. So an gro nou'n kapab degaz lasasen pour 323 ka, dan sa dernyen 3 an.

Mr Speaker, parey ou konnen, mon'n fini sirkil en lalis ki reflekte detay ka par ka dan sak distrik.

Mr Speaker, permet mwan pour azoute ki nou pe met lanfaz kot i posib osi pour ed bann zanfann aste enn pti morso later. Pti morso kare later apropiye letan sa i posib, akote zot fanmir pour zot kapab fer zot lwaye.

Mon Gouvernman e Departman Later pour met bokou zefor dan sa prose 6 mwan, pour target sa bann kalite demann dan en fason efikas e transparan.

E mon annan gran konfyans kot i posib nou pour fer li. Nou bezwen balans byen bann lezot ka dapre merit osi. Me nou stratezi se *focus* nou lenerzi a lo 6 mwan.

Sirtou sa bann ka kare later akote fanmir. E sa i a ed nou osi dan nou dan nou demars, pour rod solisyon pour ed nou pep seselwa. Mersi Mr Speaker.

MR SPEAKER

Mersi Minis. Siplemanter Onorab.

HON RICHARD LABROSSE

Mersi Mr Speaker. Minis, mersi pour ou larepons. Minis ler ou'n pe koz lo tou sa bann devlopman later. E nou osi konnen ki bann *challenging* sirtou lo kote distrik ki nou pe resevwar, konplent ki nou pe gannyen.

Espesyalman servis *survey* li menm, ki pran enn pti pe letan. E la vi ki ou'n eksplik en pe sa bann bon travay ki ou pe fer.

Eski si ti posib pour ou kapab donn nou an bref Lasanble ki travay ki zot pe fer kot sa departman pour fer sir ki sa servis li menm i enn pti pe pli vit ki i ete ozordi? Mersi Mr Speaker.

MR SPEAKER

Mersi Onorab. Minis.

MINISTER BILLY RANGASAMY

Mersi Mr Speaker. Mr Speaker, avek ou permisyon mon pour demann PS Barbe, PS Later ki'n pran sa departman detrwa mwan pase, pour donn nou en apersi lo la.

E ki i pe fer pour li kapab adres sa problem. Sirtou kot *survey* parey ou'n fer resorti. E osi kot Lanrezistremman Later eksetera. Mersi bokou.

MR SPEAKER

PS.

PS DENIS BARBE

Mersi Mr Speaker. Mersi Onorab pour ou kestyon. Onorab prosedir *survey* i enn ki, ki enn pti pe long. Spesifikman aköz ki mannyer Lalwa *Survey* avek *Registration Act* i ete *Land Registration Act*.

Me selman i annan bann serten keksoz ki nou, nou kapab fer pour kapab fer sir nou egzekit enn pti pe pli byen nou bann keksoz toulezour.

Sa i varye komansman depan striktir ki nou pe adopte pour nou fer ser poudir nou kouver Mahe, Praslin La Digue dan en fason pli efikas, avek nou resours imen balanse byen.

Get enn pti pe ki mannyer nou servi nou bann teknisyen, nou bann arpanter pour kouver Mahe, Praslin ek La Digue.

Reget enn pti pe nou bann diferan demann ki pe antre.

Annan en fason ki nou kapab planifye nou travay - enn pti pe pli nou *time management*. Sa i tous enn pti pe plito lo sa laspe resours, resours letan,

resours transpor, resours imen ki nou annan.

E an menm tan get byen baze lo demann ki nou annan. Departman *Survey* pour lannen pase in anrezistre li enn pti plis ki 800 ekek ka. E dan sa 800 ekek ka, i enkli bann ka ki *surveyor* prive osi i *lodge* avek Direkter *Survey*, pour egzaminen.

So nou bezwen get byen baze lo lannen pase ki nou *baseline*, konbyen ki nou'n *turnover*? E konbyen sa *turnover* ki kontribye direktman avek en solisyon *survey* ki permet en dimoun, tranzakte aste son bout later, anliny avek laplikasyon ki'n fer avek Minister?

E si sa dele letan konbyen nou'n pran pour rezourd sa ka i rezonnab. E servi sa koman en *baseline* pour nou *challenge* nou bann manrmay. An vi ki nou annan, nou pe antre dan sa konponan *Result-Based Management*.

Met li dan zot kontra pour zot fer, delivre enn pti pe plis. Gete ki mannyer nou pe servi sa erdtan travay, 8er 3er dan ka bann manrmay *Survey*. Akoz zot pa annan sa *lunch hour*. Eski nou pe maksimiz sa letan?

E pran konsiderasyon laspe letan osi, sirtou dan ban mwan Zanvye, Desanm kot nou

annan bokou lapli. E gete lekel aktivite ki nou fer dan lekel peryod letan.

Sa i sirtou bann travay lo sa kote planifikasyon, lorganizasyon pour fer sir ki mannyer nou reservi enn pti pe nou resours imen.

I annan en pe travay osi ki nou pe fer, ki relye avek lekipman ki nou pe servi. E sa i annan pou fer avek enn pti pe nou prozeksyon bidzeter dan 3 an, dan ki, ki nou investir pour redwir sa konponan letan ki nou servi lo teren. I enkli lekipman sirtou avek teknolozi avanse.

E ki mannyer nou kapab pous sa azanda ki ed nou redwir kantite letan ki nou servi lo teren, pour nou kapab anmas en lenformasyon.

So sa i enn pti pe lo sa laspe. E i annan sa kolaborasyon ki nou bezwen fer ant enter-departman pour nou fer sir poudir bann *case* ki nou pe esper en desizyon sorti kot Departman Later, nou ganny en desizyon, nou enplimante.

Planning nou kontan avek zot *speed* ki mannyer zot pe donn zot bann *turnover*, lo bann aplikasyon 4-5 semenn depandan lo kwa ki nou met devan zot.

E *of course* i annan sa laspe osi kot bann diferan kalite

travay ki vini kot *Survey*, *be it* pour bann proze *SIA*, bann proze Gouvernman Lokal, bann proze lagrikiltir.

Nou bezwen prezan gete anliny avek zot program travay, pour zot kan ki nou enplimante sa bann zafer. Nou pa kapab *throughout* pandan lannen nou pe fer *topo surveys throughout*.

Kan ki nou konnen poudir tou nou bann departman, zot bezwen sa bann lenformasyon pour prepare, pour zot prezantasyon Bidze, zot *forecast*, zot planifikasyon.

So, sa i enn pti pe bann travay anndan ki nou pe fer. An term resours imen, i annan 2 *staff* ki'n al *training* parey nou ti'n pas lo la lo *budget*, defann Bidze.

E ler nou pour gete egzaktaman baze lo bann *turnover*, nou bann *report*, *quarterly report* ki nou bann - pe ganny fer lo nou bann arpanter. Nou pour bezwen pran en desizyon si nou bezwen investir dan plis resours imen, pour nou delivre enn pti pe plis. Ouswa si sa bann lentervansyon ki nou pe anmennen i pe donn nou ase rezilta ki nou santi nou - i en i kontribye anver en dele letan ki rezonnab avek nou bann aplikan. Mersi Mr Speaker.

MR SPEAKER

Mersi. Yes, Minister ou kapab azoute?

MINISTER

BILLY

RANGASAMY

Wi Mr Speaker. Mon ti zis anvi azout detrwa pwen. *PS* in eksplik byen. Lo mon kote koman Minis responsab, mon'n konstate osi ki i annan en eleman ki nou bezwen targete dan Gouvernman pour nou *streamline* nou bann prosesis bokou plis.

Annefe i enn nou bann pilye stratezik kot nou kapab tir birokrasi, tir *red tape*, nou pe fer li. I annan keksoz ki anba Lalwa ki nou en pe limite.

Alors mon pe demande - ki nou pe fer - eskiz mwan - ki nou pe fer? Par egzanp nou konnen i annan en konponan ek *Land Registration*, i annan konponan avek *AG's Office*.

Tousala i vin bann letap ki nou bezwen fer, avan ki en dimoun i ganny son kare later lo son non eksetera.

So nou pe fer bann bokou plis konversasyon, oubyen parey nou apel sa bann *interface meetings*, pour nou deblok sa bann birokrasi; sa bann dele letan ki pran pour nou get bann ka - pour nou toultan pour nou akselere e rod

plis, fer sir ki nou vin pli performan dan nou lapros.

PS osi in tous lo teknolozi, nou pe rod bann lekipman osi kot nou kapab fer serten travay bokou pli vit.

Tousala i vin bann restriksyon bidzeter. Nou konnen parey *CEO* Jitesh pe dir taler. i annan bann teknolozi laba deor ki nou kapab fer, *topo survey* bokou pli vit avek.

Solman i kout larzan pour investir, me se sa ki nou pe gete, bann tou sa bann fason pour nou vin pli efikas e met sa laspe performans dan tou kontra tou nou bann *surveyors*.

Par kont la, mon anvi azoute i difisil ler nou ganny bokou kritike. Departman *Survey* i anba en kantite presyon e nou resours arpanter Seselwa i limite. Limite enormeman. Nou annan petet 2 arpanter Seselwa, bann ki'n ganny *train* oparavan pe pratik dan sektor prive.

E nou toultan pe rod fason pour nou *train* nou Seselwa. Nou annan 2 etidyan deor pour lemoman si mon pa tronpe *PS*. E nou anvi ranforsi sa lekip to the *maximum*. Me selman servi bann teknik pli modern pour nou al en pe pli vit. Nou teren pa fasil, nou bann teren i konplike. Me nou anvi sey war

fason, pa neserman nou pe kontiny menm fason toultan.

Last but not least, nou anvi ranforsi nou lekip *GIS*, akoz zot osi zot annan en rol kle pour fer. Nou'n investir bokou lo bann resours *software, hardware, programmer* pe vini osi pour nou kapab ranforsi.

Lenformasyon ki nou anmase, nou anmas li dan *GIS* osi parey. Nou pa bezwen al revizit en *site*, pour nou gete si ti annan en konplikasyon lo sa *site*.

Ler nou vizit sa *site*, nou'n war poudir i annan en konplikasyon, en larivyer ki pase, i ganny *map out*, i ganny antre dan *GIS*. So, sa bann zouti nou pe servi zot to the *maximum*.

E la nou osi pe met tou zefor lo nivo nasyonal pour nou al reviz nou bann zimaz *aerial*. Ki nou servi bokou par kont pour nou bann *desktop study*. Be selman sa bann zimaz i baze 2011.

So nou anvi ranforsi sa laspe osi. Konmsi met bann zouti dan lanmen nou bann lekip pour nou kapab vin pli efikas. E donn zot sa *training* neserer e annan nou lekip Seselwa dan lavenir.

Me i toultan reste en defi, *survey* toultan i reste en defi. Tou proze ki ganny fer i bezwen

survey. Alors mon'n met sa pwen kler, lo mon pozisyon koman Minis lo diferan nivo. Alors tou zefor pe ganny fer pour nou ranforsi sa lekip.

E mon annan konfyans ki nou pour war bann bon rezilta byento. Mersi Mr Speaker.

MR SPEAKER

Mersi Minis. Kestyon Onorab Aglae.

HON EGBERT AGLAE

Mersi Mr Speaker. Minis, dan ou larepons ou'n fer resorti ki zot pandan sa 3 an zot in donn environ 323 *process*. Ki fer ki dan 3an apepre 107, kare later par lannen pe ganny donner ouswa problemm pe rezourd.

Now Minis eski ou kapab petet eklersi mwan eski sa 323 i nouvo kare later ouswa i enkli? Akoz mon ti a kontan ganny sa bann lenformasyon.

I enkli parey transfer, *subdivision*, *exchange*, bann *change of use* dan sa bann 323 ouswa *its just new land bank* ki zot vin donner? Mersi.

MR SPEAKER

Mersi. *PS* pour adrese?

PS DENIS BARBE

Mersi Mr Speaker. Onorab, mersi pour ou kestyon. Sa lalis ki nou'n donn zot i pa reflekte

bann *exchange* avek bann lezot tranzaksyon.

I plito *land bank* avek bann kare, ki bann dimoun ki nou'n arpante - swa bann kare endividuel. Pirman zis rezidansyel, pa bann lezot zafer ki vini, bann lezot tranzaksyon ki Minister i fer. *Thank you*.

MR SPEAKER

Mersi. Mersi *PS*. Yes, i annan keksoz ki pa'n ganny reponn?

HON EGBERT AGLAE

Eski i pour enkli dan sa lalis ki ou'n dir ou'n *submit* ek Speaker sa bann lenformasyon? Mersi.

MR SPEAKER

Yes PS.

PS DENIS BARBE

Mr Speaker, dan sa lalis ki nou'n sirkile, pour tou Manm Onorab. I annan 2 kolonn. En kolonn i *land bank*, sa i tou later *land bank* ki nou'n vann dan, pa dan distrik *me* solman bann aplikan *from* sa distrik.

And then state land, which is nenport kare later rezidansyel ki nou'n tire, pour en aplikan ki'n fer aplikasyon pour en bout later.

I napa lenformasyon - baze lo natir kestyon i napa lenformasyon lo bann *encroachment*, lo bann

exchange avek bann lezot tranzaksyon ki Minister in fer, ki an rezilta en morso later. *Or yes -*

MR SPEAKER

Mersi. Onorab Monthy, ou annan tre pe letan. Direk silvouple.

HON PHILIP MONTHY

Wi Mr Speaker, mon pour ase bref. Minis, kantite morso later ki'n ganny vann pandan sa dernyen 3 an ki ou'n donn nou.

Eski i en *improvement* konpare par *apport* a bann lannen presedan, avan sa dernyen 3 an lo lakantite tranzaksyon later ki'n ganny fer?

E si ou kapab dir nou, ki pli gran peryod letan ki en dimoun in espere avan ki son kare later in ganny vann avek li dan sa bann *case* ki ou'n mansyonnen? Mersi.

MR SPEAKER

Mersi. Minis ou annan -

MINISTER **BILLY RANGASAMY**

Mr Speaker, mon a demann *PS* Barbe pour ed mwan reponn sa kestyon silvouple. *PS?*

MR SPEAKER

PS Barbe. Tre byen. *PS.*

PS DENIS BARBE

Onorab lo bann – si ou get nou bann *PPU Statements over the last couple of years*, nou Minister pe target 100 kare par lannen. E nou vwar poudir i annan bokou proze dan sa dernyen 4 an-5 an kot nou'n - plis proze in materyalize, sirtou bann proze kekwfa ki nou'n *struggle* avek.

Enn pti pe letan sirtou kote konponan lenfrastriktir. Ki'n fer poudir nou'n *in term delivery* i annan en *improvement*. E nou pe antisip ki lo an term planifikasyon avek zesyon proze si nou fer li byen, nou pour annan en *improvement*.

So, pour lemoman nou annan nou apepre en 1800 aplikan, ki pe esper en solisyon kare *land bank*. E si nou pe dir delivre 100 kare savedir fasilman en dimoun pe esper li 18an.

Nou anvi redwi sa e detrwa fason pour nou redwir se annan en program, ki i annan plis *turnover*. E sa pti larzan ki nou gannyen nou maksimiz li pour *maximum outcome*.

E dezyenm osi nou pa kapab zis verifie lo – *rely* 100 poursan lo programm Gouvernman. Nou bezwen rod bann lezot fason ki mannyer

nou kapab met en *framework*, kot i annan bann zenn dimoun ki kapab fer serten - en kontribisyon pour lenfrastriktir, nou les zot ale, nou bouze.

Selman mon napa en larepons direk pour dir ou, pour kapab dir ou egzaktman bann dimoun ki'n ganny later dan sa dernyen 3 an, sa 328 dimoun ki kantite letan zot in espere.

Mon krwar petet donn ou en serten satisfaksyon an term sa larepons an zeneral ki mon'n donn ou. *Thank you.*

MR SPEAKER

Mersi *PS.* Bon nou a termin sesyon - Minis i bezwen azour keksoz?

MINISTER
RANGASAMY

Wi.

MR SPEAKER

Minis, wi.

MINISTER
RANGASAMY

Mr Speaker, mon konnen ou pe degaze la pour nou fini.

MR SPEAKER

Wi.

MINISTER
RANGASAMY

Mon konsyan sa. Me mon kontan sa enteraksyon ki nou'n gannyen bomaten ek lekip. Mon anvi fer resorti osi dan nou bann proze *mid-range condo* ki nou pe fer. Anvi ki nou pe met lenfrastriktir kot i posib nou pe sey *twin* sa bann proze avek bann *land bank* tou.

En fason zot, zot in met semen, nou nou'n met lenfrastriktir delo, elektrisite. I kapab ed enn de nou bann proze *land bank*, kot i posib, kot teren i permet.

E par egzanp Anse Royale i enn bann legzanp. Onorab Lemiel pa la. I enn bann legzanp ki nou'n, ki nou pe idantifye pour nou *twin* sa bann proze. Be mwan mon anvi fer resorti ki sa lalis osi ti annan en kestyon boner. Sa lalis nou'n anvoy kot Mr Speaker yer swar.

I annan lalis pour sa bann, sa bann proze, i annan pour later, apre i annan sa lalis – Mr Speaker. Epi i pour – mon krwar ti annan en lot kestyon lo *mid-range condo*. Sa osi nou'n pas sa lalis Mr Speaker, i a partaz ek zot byento.

Zis pour fini Mr Speaker, mwan mon kontan mon'n ganny sa - malgre mon ti enn pti pe ezite pour vin premye Minis ki pour vin la ki pour komans reponn kestyon. Mon

kontan mon'n vini, nou'n pas en bon letan ansanm.

Mon priye sa lespwar i a kontinyen. Sa linite nou a travay - epi mon anvi zis fer resorti. Mon ti a kontan sa linite i kontinyen. E mwan mon pour met mon lekòr a disponib sa lannen.

Mon ekout byen bann Onorab, mon konnen i annan en bon pe zot mon drwa zot en vizit dan zot distrik en pe partou. Mon pour tap tou pour tou pour mwan sey vizit zot tou, dan tou zot distrik pour nou rod solisyon ansanm.

E mon krwar sa i lespri pour nou bouz devan. Parske sa problem lakaz ek later i pa pour en parti politik. I pour sityasyon pei, alors annou travay ansanm.

Annou *unite at least* lo sa laspe, lo bann sityasyon dan nou bann vilaz *PMC*. Annou pa toler bann move, move konportman.

Annou *unite!* Nou kapab fer li. Annou bouz devan. Mersi bokou Mr Speaker.

(APPLAUSE)

MR SPEAKER

Mersi. Minis, mon pa ankor vwar sa lalis, be mon a rod li avek bokou lentere. Mersi. Nou

termin sa bout *Question Time* la.

Mersi Minis e zot delegasyon pour zot partisipasyon. Mon swet zot - Mersi Minis e ou delegasyon pour zot partisipasyon mon swet zot bonn rantre e bonn kontinyasyon.

Nou a rebran 2er apre midi avek en lot bout *Question Time*. Mersi. Nou a pran poz.

(BREAK)

MR SPEAKER

Bonn apre midi tou dimoun, Onorab, zofisye, piblik. Nou kontinyen ozordi avek en lot sesyon kestyon. Madanm raporter ava rapel Minis pou Zafer Entern.

Bonn apre midi Minis Zafer Entern Errol Fonseka e dan delegasyon Mr Ted Barbe *Commissioner of Police*; Mr Antoine Denousse *Assistant Commissioner of Police* e Mr Joseph Bibi *Assistant Superintendent - DG* pou ladministrasyon. Byenveni dan Lasanble. Mersi pou zwenn nou pou sa partisipasyon dan kestyon.

Sa nou pou al ziskan 3er avek sa porsyon kestyon. E savedir nou pou annan 20 minit apepre - nou annan 3 kestyon pou sa Minis.

E premyer kestyon i pou Onorab Michel Roucou.

HON MICHEL ROUCOU

Mersi Mr Speaker. Bonn apre midi a tous. Bonn apre midi Minis avek ou lekip. Mr Speaker, mon kestyon i al koumsa;

Eski Minis i kapab dir avek nou Lasanble, ki travay Departman Lapolis pe fer avek bann lezot Lotorite pou dekouraz manm piblik pou abandonn *derelict vehicles* dan bann landrwa piblik? Mersi.

MR SPEAKER

Mersi Onorab. Minis, ou repons, silvouple?

MINISTER ERROL FONSEKA

Mersi Mr Speaker and bonzour tou dimoun; tou Manm Lasanble, Manm *Leader Government Business*, Manm Leader Lopozisyon. E les mwan osi mansyonn e *welcome to the new MNAs* – Onorab Anne Bistoquet *and* lo lot kote Onorab Rachel Spiro, *welcome* e tou dimoun a lekout, bonn apre midi a tous.

E Onorab, mersi pou ou kestyon. E en kestyon tre enportan aköz sa bann abandonnen, i pa zis vilenn pou labonte nou vwazinaz, me i osi ankouraz moustik e bann

maladi asosye avek moustik, parey lafyev *dengue*.

Me menm si lapolis i responsab anba Lalwa pou retir tou sa bann transpor abandonnen, se nou prop sitwayen ki osi responsab. Omwen zot it kapab fer sa zefor pou kas sa bann transpor an bout e depoz sa bann bout kot bann landrwa ki fer resiklaz.

Sa i form par zot responsabilite sivik, me mwan osi bezwen aksepte ki nou'n ganny bon korperasyon avek plizyer manm piblik dan sirkonstans kot en loto in ganny abandonnen tanporerman.

Akoz i annan en pti problemm, kot i ti bezwen ganny plis letan pou fer sa loto bouze. E sa in arive plizyer fwa e mersi pou sa bann dimoun ki'n korpore ek lapolis.

Pou lenstan nou servi Bois De Rose koman en fasilite tanporer pou koman en *pound*; par kont si sa transpor i vreman en kales kase, nou depoz sa karkas kot *landfill*.

Me la mon konpran pou enform Lasanble, ki menm sa semenn Lapolis an korporasyon ek *LWMA*, ek *Environment Trust Fund* ki pou finaliz sa *pound* pe finaliz sa travay lo sa ... *pound* ki ti'n

bezwen arete dan bann moman restriksyon *COVID*.

E swivan sa en lot retar in tap nou ek sa dife *landfill* ki o bor menm landrwa, kot sa travay ti ganny komanse pou *fence* sa landrwa e peryans sekirite. I enportan pou note ki ler lapolis i *impound* en transpor, son met i annan tou drwa dapre Lalwa pou fer en appeal.

Nou osi bezwen revwar sa Lalwa *Derelict Motor Vehicle Disposal Act* e anmenn regilasyon pou fer pli sever pou sa bann kalite lofans. Mersi Mr Speaker.

MR SPEAKER

Mersi Minis. Siplemanter Onorab Michel Roucou.

HON MICHEL ROUCOU

Mersi Mr Speaker. Minis, mersi pou ou larepons. Minis, si ou kapab dir ou, i annan sa Lalwa ki ou'n koz lo la, kan ki zot pe mazin anmennen pou kapab fer sa Lalwa vin en pti pe pli morde – amann li?

E osi Minis, lo kote - ou'n nonm Bois De Rose kot zot met bann transpor laba ki'n ganny anmase, si i annan ankor lezot travay ki zot kapab fer avek bann dimoun prive ki ti a voudre antre petet dan en biznes parey? Mersi.

MR SPEAKER

Mersi Onorab. Minis?

MINISTER ERROL FONSEKA

Onorab, mersi pou ou kestyon. Mon a koz en pti moman, solman mon a pas laparol avek *ACP* Denousse. E *carry on*.

ACP ANTOINE DENOUSSE

Mersi Mr Speaker. Bonn apre midi tou Manm. Onorab, desito ki nou pou antre dan en konversasyon *regarding* sa bout Lezislasyon, akoz nou war pou le moman i pa en *deterrent* pou bann dimoun ki pe kit bann transpor o bor semen.

Bois De Rose kot nou mete, wi – nou annan bann serten letan ki nou donn dimoun. Me si i annan dimoun prive ki le antre ladan, sa nou kapab antre dan bann diskisyon e Lalwa i ava ganny fer pou zot nobou antre dan sa biznes pou anmas sa bann moto, petet vann li par bout - bann pyes ki annan lo la. Mersi.

MR SPEAKER

Minis, ou pa ti pou azout nanryen. non?

MINISTER ERROL FONSEKA

Mr Speaker, *I think ACP* in kouver sa ki mon ti pe al dir.

MR SPEAKER

Byen, mersi. Nou a pran siplemanter lezot Manm. Onorab Georges?

HON BERNARD GEORGES

Mersi Mr Speaker. Bonn apre midi Minis avek ou delegasyon e tou dimoun ki pe swiv nou. Mr Speaker, mon kestyon pou Minis, i swiv en serten dezapwentman avek repons ki mon pe gannyen.

I annan en Lalwa si mon pe konpran byen e i annan veikil ki'n abandonnen o bor semen, akoz ki Gouvernman i bezwen antre ladan? Akoz ki nou pa pourswiv sa bann dimoun e fer zot peye pou zot tir zot veikil ki zot in kit o bor semen?

Se koumsa ki keksoz - ekskiz mwan - i devret pe marse. Eski Minis i kapab eksplik nou, akoz premyerman, ler i annan - ler zot konnen lekel propriyeter sa veikil ki'n ganny kit dan bor semen, akoz zot pa fors sa dimoun pou li tir son veikil ouswa atraver Lakour ou *otherwise*?

E dezyenmman ler zot pa konnen lekel propriyeter sa dimoun e zot pa pou kapab pourswiv li, la zot ava antre zot ava *impound* e zot ava *dispose of* sa veikil.

Akoz ki Gouvernman i bezwen pran responsabilite dan tou le de ka? Mersi.

MR SPEAKER

Mersi Onorab. Minis?

MINISTER ERROL FONSEKA

Mersi Onorab, pou ou kestyon. E *in fact* bann leksperyans ki lapolis in gannyen mon a pas sa avek ACP pou li koz lo sa bann leksperyans - egzakte man lo sa pwen ki ou'n fer resorti Onorab. Mersi.

MR SPEAKER

ACP?

ACP ANTOINE DENOUSSE

Mersi Mr Speaker. Mersi Onorab pou ou kestyon. Onorab sa bann prosedir anba Lalwa in ganny fer akoz ler nou konnen transpor pou lekel, nou anvoy en let kot sa dimoun e anba Lalwa i donn li 14 zour pou li retire.

Si apre 14 zour i pa retire, la lapolis i lev sa bann transpor. Me se sa ki nou'n dir ki i enportan ki sa bout Lalwa i revwar, akoz si nou pe retir en transpor ki pe kout nou R2500 avek en Lalwa ki son *fine* i R250 i pa lozik.

Se pour sa rezon ki nou bezwen revwar sa bout Lalwa ki date en bon pe lannen pase. Me

ler sa dimoun i ganny li – ler nou nou lev sa transpor pou al avek, i ganny li 28 zour pou li reklanm son transpor. Pandan sa 28 zour si i reklanmen, la nou fer li pey sa kou ki'n ariv pou nou lev sa transpor.

Me dan bokou ka ler en dimoun i kot son transpor o bour semen, i pa neserman vin reklanmen, i pe kite pou fer ou anmase; *ok* - pou ou tire pou ou zete pou li, kwa? Me solman sa prosedir i ganny swiv.

E pou dan sa laliny petet ki ler nou ava annan diskisyon avek *Biro Attorney General* lo sa Lalwa, pou nou fer li v in en pti pe li sever, konpare avek manner i ete konmela. Mersi.

MR SPEAKER

Mersi ACP.

MINISTER ERROL FONSEKA

Wi, Onorab, zis pou azoute; *so basically*, ki pe arive la sa dimoun pe ganny pou peye *at cost as opposed to a penalty pay*. So sanmen sa ki nou bezwen *increase* sa ladan. Mersi.

MR SPEAKER

Thank you. Kestyon Onorab Romain.

HON GEORGES ROMAIN

Mersi Mr Speaker. Bonn apre midi Minis ek ou delegasyon. Minis, nou osi nou annan sa problem dan nou distrik, byensir parey tou lezot distrik, kot nou'n fer vizit avek lapolis ek bann dimoun, lotorite kot nou'n idantifye enn de sa bann transpor. Pa tro lontan in arive sa vizit.

Nou osi nou'n ganny dir ki zot pou met en papye lo la – mon kapab dir kekw pou 14 zour si zot pa tire. Me nou annan en problem. Bann transpor ki pou pa kapab idantifye sa *owner* akoz napa ni son vit, oubyen plak limero; dan sa bann ka mon pe regarde Minis, ki vreman pou arive?

Akoz *SPTC* in dir ek nou koumsa swa sa bann transpor i ganny tire dan nou bann semen, i pe evit zot pou kapab kontinyen sa bann larout e sa i pou kree en problem dan nou distrik.

Alor mon ti akontan konnen Minis ki lapolis pe fer lo sa kote? Mersi Mr Speaker.

MR SPEAKER

Mersi Onorab. Minis, nou a pas...?

MINISTER ERROL FONSEKA

Mersi Onorab. *Again*, mon a pas ek ACP.

ACP ANTOINE DENOUSSE

Mersi Mr Speaker. Mersi Onorab, pou ou kestyon. Onorab, sa ka an partikilye i en ka ki mon konnen. Me solman parey nou dir ki nou annan en bon pe transpor me fodre pran an kont ki sa bann transpor souvandfwa ler i o bor semen i pa neserman ki i safe bokou.

Si nou lev en transpor dan sa sityasyon, nou pran li nou met Bois De Rose, lespas osi i enportan – *ok?*

Nou'n fer en kantite, nou'n lev en bon pe transpor lannen pase, me sa lannen i annan serten notis ki nou'n deza donner ek bann dimoun pou vin tir transpor.

Menm si ou napa en landrwa *for the time being*, dan detrwa mwan nou ava annan, me sa ka an partikilye i en ka ki pou ganny *deal* avek – nou pe zis kree lespas.

Dan lenstans kot en transpor, nou pa konnen pour ki, se pou set rezon ki nou met en notis lo la. E Lalwa osi i permet nou pou nou fer sorti mesaz dan en zournal, ki sirkile dan pei kot nou kapab enform sa dimoun pandan 7 zour en *owner* sa bann transpor pou zot retir zot transpor e si zot pa fer li, nou retire nou menm.

E parey mon pe dir i annan bokou ka – bokou

lenstans 6 ou 7 transpor lannen pase, ki nou'n bezwen retire dan landrwa piblik, akoz i en danze pou bann dimoun. Ti annan bann keksoz ilegal ti pe ganny arive ladan e menm i koz serten problem, sirtou ler bis pou vire. Me nou fer tou le neser pou nou *deal* avek.

E nou konnen i annan en bon pe sa bann transpor. *Once* nou ganny landrwa nou pou fer tou nou mye pou nou rezourd sa bann problem e anmas sa bann transpor e fer le neser avek. Mersi Mr Speaker.

MR SPEAKER

Mersi.

MINISTER ERROL FONSEKA

Onorab, zis pou azout lo la, i pa anpese en dimoun dan *private sector* ki anvi fer en *pound* pou met sa transpor ladan, *apply* to the *Commissioner of Police* pou li *obviously* ek laprouvasyon *Environment as well* ganny laprouvasyon.

Pou annan en *pound* pou fer e sa bann louvraz apre *charge* sa bann dimoun. Sa i posibil osi. *Obviously* sa landrwa i byen ganny gete pou ki i soutenab sa. Me sa i posibil osi.

Me akoz landrwa - landrwa Gouvernman osi pou fer en *pound* i *restricted*. Nou annan en pti bout laba, sa osi

pou plen. Menm *pound* delo sale nou bezwen. Nou bezwen travay lo la.

So nou napa sa sitan kantite *spare space available* ozordi. Mersi Mr Speaker.

MR SPEAKER

Mersi. Onorab Hoareau.

HON JOHN HOAREAU

Mersi Mr Speaker. Mr Speaker, mon ti oule konnen; par egzanp i annan osi bann dimoun ki gard en kantite loto lo bor semen angiz ki i pe aranze li, solman sa loto ou war i pa bouze, i reste *for ages and ages* e i *still* bar bann servis esansyel ler pe vin dan sa landrwa.

So, mon ti a kontan zot klarifye, lo ki baz en loto i ganny klasifye koman en *derelict vehicle* e enn, ki zot pou *impound* li? Mersi.

MR SPEAKER

Mersi. Minis?

MINISTER ERROL FONSEKA

Mr Speaker, zis pou *again* eksplik sa – sa i en negosyasyon ki mon'n mansyonnen *already* ki lapolis i fer ek sa dimoun. E nou'n ganny bon korperasyon dan bann sityasyon, me i ariv en moman ki ou bezwen *impound* sa *vehicle*. *ACP* a take

you though some leksperyans ki in gannyen ladan.

ACP ANTOINE DENOUSSE

Mersi Mr Speaker. Onorab, mersi pou ou kestyon. Nou konnen i annan en bon pe garaz dan bor semen ki met transpor, e i annan enn de bann landrwa ki nou'n apros bann garaz pou nou fer zot tir zot bann transpor o bor semen.

Me ler nou koz en *derelict vehicle*, se en transpor ki ou konnen ki i la, i pa pe ganny aranze, i pa kot en garaz, toulezour o bor semen, sa i bann sityasyon ki nou *deal* avek.

Bann transpor ki - en legzanp – nou'n komans fer sa dan Perseverance kot nou konnen i annan bann garaz ilegal – i annan bann transpor o bor semen, nou pe komans ekri bann *owner* pou nou fer li konpran poudir ou transpor i o bor semen, i anba Lalwa si ou transpor i napa en patant – i pa devret park en *parking* piblik e i en lofans.

E nou pe *advise* zot pou zot tire e si zot pa pe tire definitivman nou pou bezwen fer le neserer. E kot bann garaz - bann landrwa kot i annan bokou transpor, nou pe fer tou pou nou koz avek zot; nou antre dan vann konversasyon avek sa

bann *owners* pou zot nobou tir sa bann transpor pou pa koz bokou problem pou bann dimoun dan landrwa piblik.

Mon konnen Cascade i enn; St Louis i enn – *ok* anler Waterloo. E bann lenstans ki nou pe get avek bann lezot *stakeholders* pou nou fer le neser. Pou nou nobou sey rezourd sa problem.

Nou konnen poudir sa problem i grav – nou konnen sa problem i koz bokou lenkonvenyans, pou bann dimoun me nou fer tou le mye.

Petet en pti keksoz mon ti ti a kontan zis fer kler; enn akoz nou bezwen revwar sa Lalwa - ozordi i dir ek nou pran sa bann transpor zet li deryer Ste Anne. I sa bann keksoz ki nou bezwen revwar sa bout Lalwa pou nou met li azour avek modernite. Mersi bokou Mr Speaker.

MR SPEAKER

Mersi *ACP*. Onorab Pillay?

HON SEBASTIEN PILLAY

Mersi Mr Speaker. Bonzour Minis e bann zofisye lapolis ki isi prezan. E bonn apre midi (*sorry*) e bonn apre midi tou dimoun ki pe swiv Lasanble.

Mr Speaker, en kekyon pertinan ki mon krwar petet i bezwen ganny reponn se sa kekyon ki koz an relasyon ek

bann *derelict vehicles*, e petet mon ti a kontan demann en *panel* la devan konbyen - konbyen ka *derelict vehicles* ki zot in gannyen dizon annou pran lannen pase, e ziska sa komansman lannen - ziska sa 2 mwan ki nou'n arive la dan lannen la.

Donn nou *statistics* ki zot annan la konbyen ka ki zot annan. Si zot napa *statistics*, mon pou bezwen konklir poudir zot pa'n prepare pou reponn sa kekyon, *that's all*. Mersi Mr Speaker.

MR SPEAKER

Mersi. *ACP*, ki pou pran? Wi?

ACP ANTOINE DENOUSSE

Mersi Mr Speaker. Mersi Onorab. Onorab, lannen pase nou annan 6 transpor ki nou'n leve - 6 ki nou'n leve pou met Bois De Rose. Parey nou dir nou ti'n kapab fer li plis, me en landrwa pou nou mete i en problem.

Nou annan tou sa bann karkas ki nou tire pou nou anvoy lo *landfill* kot *SAMLO*. E pandan sa lannen desito ki sa parey *Minister* in dir, sa *vehicle pound* ki paret i pou annan plis ki pou ganny fer.

E nou annan ankor transpor ki ankor Bois De Rose ki nou'n leve e ki nou pa ankor

dispose off, akòz petet *owner* pa ankor reveni. Nou ankor pe atann me sirman nou bezwen fer le nesese byento. Mersi bokou Mr Speaker.

MR SPEAKER

Mersi ACP. Onorab Vidot.

HON AUDREY VIDOT

Mersi Mr Speaker. Mon kestyon pou *panel*, baze lo larepons ki zot in donnen, mon pe demann avek zot ki lespwar ki zot pou donn sa group dimoun ki reste Lari Vavang dan larantre Roche Caiman, ki annan en transpor depi le 24 Zanvye zot in fer en rapor avek Lotorite Distrik ki ganny servi koman en *dumping site* – soutir lera.

Si pa ankor war en landrwa pou retir sa bann transpor, ki lespwar ki zot, zot pou kapab adres sa sityasyon e lezot konsern ki mon konpran Lotorite Distrik met dan zot latansyon? Mersi.

MR SPEAKER

Mersi. ACP?

ACP ANTOINE DENOUSSE

Mersi bokou Mr Speaker. Mersi Onorab. Sa sityasyon Roche Caiman, si sa enn ki mon pe mazin, le nesese pe ganny fer pou sa transpor ganny tire

dan sa landrwa kot i ete, pou nou al avek.

E i annan osi enn anler Union Vale osi ki nou pe fer tou le prosedir pou nou retir li dan domenn piblik pou nou al avek. Mersi bokou Mr Speaker.

MR SPEAKER

Mersi ACP. Onorab Naidu.

HON SATHYA NAIDU

Mersi Mr Speaker. Minis, ek ou delegasyon. Zisteman parey ACP Denousse in fer resorti, St Louis i tonm parmi bann distrik kot nou annan sa problem – i pa zis Waterloo i osi Roche Bois.

I fer sote 2 an ki nou pe sey *liaise* avek lotorite konsernen. *Regional Commander* pa ti *Regional Commander*, me selman nou pa ankor vremen vwar sa rezilta ki dimoun ki vin devan pou soumet zot konsern vizavi sa problem.

An rezilta avek sa Prozedlwa, kan eski zot ekspekte zot pou anmenn sa devan Lasanble Nasyonal, akòz nou bezwen fer sir ki ler zot in ganny teren apropiye, fodre ki nou annan en Lalwa ki pa parey sa enn ozordi, me enn ki morde pou fer sir ki *deal* avek sa problem enn fwa pour tou.

Epi eski i annan sa sinerzi ant lapolis avek *Licensing*? Akòz

parey Onorab John in met devan, i annan bokou bann operater garaz - e dan konteks St Louis i annan serten ki napa *license* zot pe opere, zot pe ganny rannman e zot pe koz en nwizans pou dimoun dan lakominote. Mersi.

MR SPEAKER

Mersi. *ACP?*

ACP ANTOINE DENOUSSE

Mersi bokou Mr Speaker. Mersi Onorab. Onorab, pou reponn ou dernyen kestyon, ler nou annan sa bann *issue* garaz ilegal, *Licensing*, Lanvironnman i antre, la nou fer bann vizit konzwent. Nou pa nou tousel pou nou – Nou al ansanm ek zot pou nou nobou annan solisyon pou sa bann problem.

Regarding Waterloo, parey mon'n fer resorti nou pou bezwen fer en travay avek *owner* sa garaz, akoz nou konnen i koz bokou problem. Mon frekant anler laba tre byen, mon paran i reste laba.

E Roche Bois, wi, in en sityasyon ki'n en pti pe tarde, me selman nou pou bezwen war la avek *Commander* ki pe ganny fer. Ankor enn fwa i bann solisyon ki nou annan *stakeholders* ki vin avek nou, *ok?*

Me selman nou pou bezwen donn nou langazman; anmenn bann *stakeholders* ankor enn fwa ansanm pou nou fer sir ki travay i ganny fer e ki lord ek lape i ganny mentenir dan sa bann landrwa pou dimoun nobou viv zot lavi en pe pli meyer ki la ozordi. Mersi bokou.

MR SPEAKER

Mersi *ACP*. Mon a pran en dernyen kestyon. Onorab Cosgrow?

HON WALLACE COSGROW

Mersi Mr Speaker. Bonn apre midi tou dimoun. Mr Speaker, sa i en zafer en pe letan sa - Mr Denousse i ava rapel 2019 nou ti zwenn, nou ti travay lo en *way forward* e ziska prezan ou a krwar nou pa ankor kapab fer sa ki nou devret pe fer pou *sort out* sa bann *issue derelict vehicles*.

Now, mwan mon annan en propozisyon petet zot ava dir mwan si zot in fer serten travay dan sa laliny; nou annan nou en masin R7 ekek milyon pe asize anba langar - langar *STAR* kot *landfill* - en *crusher* - pa pe servi en?

I kapab ganny servi tir blok masin met akote, i kapab ganny servi pou kraz tou sa bann *vehicle* fer li vin ptipti

parts e pran donn SAMLO laba i a kapab servi, eksport metal e *solve* nou problemm lespas.

Me solman nou bezwen konsistan. Nou bezwen ler nou tire, si napa lespas anmezir nou pe tir dan semen nou pe met dan en *pound* - 28 zour apre sepa konbyen zour apre, nou bouz li laba i ganny kraze – i ganny sa e nou *solve* sa problemm enn fwa pou tou! So eski zot pe fer serten keksoz dan sa laliny?

Si nou petet kontakte Minister Lanvironnman akoz zot pa pe servi sa *Red Giant*; pa pe servi ditou – i zis la en moniman R7 ekek milyon anba sa Gouvernman. Mersi.

MR SPEAKER

Ok, Minis, lekel ki pou reponn? ACP?

ACP ANTOINE DENOUSSE

Mersi Speaker. Mersi Onorab. Onorab sa prosedir nou pe fer, akoz sa bann loto i al kot *landfill*; sa bann bout i ganny donnen avek SAMLO kot *scrap metal* e nou travay tre pre avek Lanvironnman, avek LWMA e lezot an se ki konsern *derelict vehicles*.

Parey Minister in dir o komansman, nou ti pou'n avanse apre COVID in vini, apre ler in fini pou nou rebran nou

travay, kot sa *pound* ti pou ete, i annan en gro dife ki'n fer ki'n afekte en pti pe.

Me la travay pe al komanse. Nou annan en meeting. Nou annan en konversasyon avek LWMA pou nou nobou fer sa travay ki tre byento sa bann sityasyon i ava ganny rezourd. Sirman nou pou bezwen konsistan.

Nou pa kapab pran en loto dan semen pran li kit 2 an kot nou. Nou pa kapab tir *derelict vehicles* dan semen fer li vin *derelict vehicles* lo propriyete Gouvernman. Nou pou bezwen dapre sa ki Lalwa i dir nou pran li *discard off, ok*, menm avek son *windscreen*, avek son bann zafer, anmenn laba kot SAMLO.

Me solman i ava enportan note osi ki i koute – nou pe koz nou 2500 ou plis pou lev enn sa bann loto depandan lo ou landrwa, me nou bezwen antre dan bann diskisyon avek bann *operators*, pou nou annan bann dimoun ki a vin avek bann pri abordab pou nou nobou fer sa travay, *ok*? E sa sirman nou pou antre ladan.

Kot sa masin i konsernen, sa nou ava gete ki operater akoz nou nou leve nou anmenn kot SAMLO laba, kot *landfill*, zot ki fer le neserer avek bann transpor. Mersi bokou Mr Speaker.

MR SPEAKER

Mers. Nou ava avanse lo prosen kestyon, Onorab Kelly Samynadin.

HON KELLY SAMYNADIN

Mersi Mr Speaker. Bonn apre midi Minis avek ou delegasyon. Kestyon i lir konm swivan;

Eski Minis i kapab met Lasanble o kouran lo nouvo reform ki pe annan dan Lafors Lapolis? Mersi.

MR SPEAKER

Mersi. Minis?

MINISTER ERROL FONSEKA

Mersi Mr Speaker. E Onorab, mersi pou ou kestyon. Onorab i fer mwan en gran plezir pou ganny demande sa kestyon, sa lentere anplis ki ou avek lezot *MNA* i annan lo devlopman lapolis, pou nou kapab anmenn sa vre vizyon *professional* ki nou anvi war dan sa lafors.

Sa se a oken moman ki ou lizye i tap lo en zonm ou en madanm dan sa liniform, nou war en - ki mon apel en *model law enforcement officer*.

Savedir sa zofisyè i pe azir dan en fason apropiye i pe ranforsi Lalwa a en nivo apropiye; i pe kominik byen avek piblik; i pe azir onnet, i pe fer rapor esansyel; i pe update

kontrol an servan son radyo avek konfidans; i pe donn en swivi lo konsern piblik; i pe anmenn son tim byen.

Sa i vizyon e i vizyon *Compol* e mon sir se ou vizyon e vizyon piblik an zeneral. Nou plan stratezik, i la pou gid nou ver sa vizyon. Nou annan 81 *deliverables* pou anmenn sa reform stratezik.

Premyer staz reform i focus plis dan striktir lapolis pou etabli li byen, e ki pou apre anmenn nou lo sa 2em staz ki pou vin atraver *modernization* ek *digitalization*. Sa premye faz, se kouver pwen stratezik koman *governance and* striktir, anplwaye, striktir dan travay, *training and development* e lo en plan *operational* bann size koman *intelligence management and professionalizing investigations*, ki tousala i annan en lenpak, lo *service delivery* ek *community confidence*.

Alor *Compol* in akonplir plizyer reform lo sa bann pwen ki mon'n fek mansyonnen avek kiltir travay dan lafors, *SOPs*, *Internal respect* ek disiplin, *leadership training*, sanzman dan striktir, tou sa ki mon'n mansyonnen i form par labaz sa nouvo striktir lapolis - sa fondasyon.

Lo letap swivan, la nou pou war *digitalization – digital modernization, information technology* en sanzman ki nou apel “*Ratio of Boots on the Ground*” vizavi *common structure*.

E nou pe get en *ratio of* - la pou lenstan mon krwar the *ratio is about 40-60 common structure ek boots on the ground* nou pe get en sityasyon ki nou pou’n petet dan 30-70 e nou annan plis dimoun deor lo lokasyon direkteman ki zot kapab – ou annan plis gard.

Alor ler en dimoun i bezwen en led, direkteman ou al kot sa sityasyon i ganny bezwen, oumyen ki li i bezwen tay kot kordgard. E pou osi kouver bann lezot *areas* parey *cybercrime* enkli *online child sexual abuse, extortion fraud* ki pe devlope dan nou sosyete ozordi.

Mr Speaker, menm si sanzman i touzour en keksoz difisil, i enportan ki lapolis i rekonnet sanzman ki pe arive dan lemonn – tou sa bann nouvo krim ki pe arive. E lavites sa sanzman e lenportans konpran sa sanzman.

E mon felisit *Compol* ki pe anmenn sa sanzman ki a vin sa vremen sa *game changer* ki nou le war dan fason donn service pli modern dan travay lapolis.

Avek sa Mr Speaker, mon pou les bann lezot kestasyon vini apre. Mon krwar *Compol* i annan enn de keksoz, mon pa konnen si ou anvi fer li la, ouswa nou a ganny en pe kestasyon nou a *enlarge* lo sa ki nou’n fek koze. Mersi Mr Speaker.

MR SPEAKER

Mersi, nou a pran lezot kestasyon. I depan lo kantite letan ki nou pran. Siplemanter Onorab?

HON KELLY SAMYNADIN

Mersi Mr Speaker. Minis, mon siplemanter i pou baze lo sa premye konponan ki ou’n mansyonnen dan ou larepons ki striktir lapolis. So, mon premye kestasyon i lo en rekomandasyon dan sa Rapor Revi Lafors Lapolis; i annan pou fer avek provizyon en lankadreman legal ki pou regulariz fonksyon lentelizans ensi ki *covert policing*.

Mon ti a kontan konnen si i annan okenn travay ki’n komans fer dan sa direksyon? E dezyenmman, mon lot kestasyon i pou *focus* lo *deliverable* dan sa rapor kot i konsern formasyon bann nouvo *recruits*, mon ti ava kontan konnen sa *delivery* i konsern propozisyon en nouvo *curriculum* ki apel *Recruit Foundation Training*, ki pou

ganny akredite par SQA e sa i enkli *basic investigation skills* avek *Foundations of Community Policing*, so eski i annan okenn travay ankor la dan sa domenn ki in komanse pour ki sa i kapab materyalize? Mersi.

MR SPEAKER

Mersi.

MINISTER ERROL FONSEKA

Mersi Mr Speaker. Mr Speaker, *Compol* in fer plis travay lo la ki mwan, so mon a les li elabor lo la. *Thank you.*

MR SPEAKER

Compol, ou annan laparol.

COMPOL TED BARBE

Mersi Mr Speaker. Bonn apre midi tou bann Manm Onorab. Minister in mansyonn en bon pe akoz mon pa pou repete – konmsi sa bann reform in komans depi 2021 – si oule 2021 ler nou ti zwenn avek bann eksper etranze pou nou zisteman *review strategic review of the police force* dan son lantyerman. E osi nou *strategic plan*. E sa 2 dokiman i mars ansanm zisteman.

Kot i konsern bann letid si oule, nou *review* nou *Police Academy* nou bann konponan ki pe ganny fer laba - nou annan en nouvo tim aktyelman

laba. Nou annan en dimoun avek *background* ledikasyon ki pe *run the Police Academy right now*, e bann keksoz ki'n sanze laba si oule - bann *training* in sanze.

Curriculum i annan bann nouvo keksoz ki nou'n azoute zisteman lo la – par egzanp pou al *in-depth* dan bann *child protection issues* kot nou pe - nou fek an diskisyon avek *NCCP members* kot nou pou anmenn bann *expert* dan Lakademi zisteman pou sa - diferan *expert* - Sosyal, *NCC*, *Ledikasyon* e *Health*, tou pou vin donn sa bagaz – Gard pou donn plito *police procedures*, eksetera e sa *package* i pou annan lezot *expert from different stakeholders*.

Nou osi annan *MOU* ki nou'n sinyen avek Liniversite Sesel, kot nou pou ankadre bann zofisye, avek *paralegal studies* e osi *Law and Criminal Justice system*. So nou pe fer en move ki tou nou bann zofisye i ganny ekipe baze lo zot kapasite lo diferan nivo, pou nobou anmenn lapolis pli devan dan le fitir.

Lo size Lapolis Kominoter osi, parey Minis in dir, nou pe lans en travay zisteman i pou an konzwent avek Anse Aux Pins avek Mont Fleuri kot nou

pou – Minis in dir *boots on the ground*, se sa ki nou pe fer.

Nou pou annan less zofisye dan stasyon met plis dimoun pou deor dan kominote zisteman pou enplimant *community policing*. Nou anvi i marse e nou mazine i pou marse – nou annan konviksyon lo la. E nou pou osi apre elabor sa dan bann lezot rezyon.

So nou pe komans avek Mont Fleuri, Anse Aux Pins soon e apre nou ava debord en pti pe pli lwen. Mersi bokou pour sa kestyon.

MR SPEAKER

Mersi.

MINISTER ERROL FONSEKA

Mr Speaker, zis pou *add* en pti gin lo sa ki *Compol* pe dir; *the* eleman *training* i *vital*. Akoz dan *training* ou pa zis montre dimoun fer keksoz; ou a pe sanz en fason panse; ou pe ankadre en dimoun - son li menm li - fason war keksoz - son fason prevwar – *being* vreman *objective*. Isi en keksoz ki vreman mank en kantite sa.

Me ki enportan lo bann *specialist courses* ki nou bezwen anmenn dan lapolis e bann lezot *law enforcement area* – *border control and all that*.

Nou pe ganny en kantite led ek *UNODC as well*, me selman sa ki enportan ki nou pe sey fer, i bezwen *fit the purpose* dan nou *local environment*. Ou konnen parfwa nou anvoy dimoun fer en kantite *course* deor, ler zot vini zot pa kapab *apply because* napa lezot dimoun ki konnen ki'n al aprann *to start with*, e i mank sa konneksyon pou fer li vin efikas.

E nou nou anvi anmenn bann *instructors* ki *apply* sa, e anmenn sa konponan mannyer i marse, mannyer nu problem i ete isi dan pei. So tousala i bann gran, gran panse ki nou pe sey fer. Mersi Mr Speaker.

MR SPEAKER

Mersi. *Compol* oule azoute, wi?

COMPOL TED BARBE

Mr Speaker, ti annan en morso ki mon'n *omit intelligence reform* - wi i enn konponan nou – annefe i 2enm dan nou bann *pillars*. E nou travay actively lo bann – sa 3 keksoz lo *persons, locations*, kot krim i *likely* ouswa ki pe arive eksetera.

So, nou *intelligence* ti en pti pe *scattered* si oule e nou pe travay pou nou olye annan en bout isi, en bout laba pou *duplicate*, nou pe fer sir i annan

en *central point*, en, kot tou nou bann lenformasyon i antre.

Me i annan bann *parameters* lo nivo sekirite lekel pou lekel ki dir ou lekel eksetera. So nou pe reform *definitely*, wi. Mersi Mr Speaker.

MR SPEAKER

Mersi *Compol*. Nou a pran enn, de kestyon. Onorab Sandy Arissol?

HON SANDY ARISSOL

Mersi Mr Speaker. Bonn apre midi tou dimoun ki al ekout. Mr Speaker, mon ti a kontan demann avek Minis, letan in koz an relasyon avek striktir dan reform ki kestyon Onorab Samynadin in demande, mon ti a kontan demann ou, kan eski Kordgard Santral an relasyon avek striktir li menm li i pou ganny en nouvo *look* pou konfor nou bann zofisyé ki travay laba?

Dezyenmman e finalman, mon ti a kontan demann ou, lannen pase ti annan serten sanzman dan reform ki zot ti fer an relasyon avek bouz bann zofisyé, bouz zot en pti pe partou, donn nou en pti pe outcome, *feedback* kwa ki'n anmennen pozitivman? Mersi.

MR SPEAKER

Mersi. *Compol, yes please?*

COMPOL TED BARBE

Mr Speaker, Santral parey nou konnen i en kordgard ki - en batiman ki pli vye ki - mon krwar - mwan i pli vye ki mwan definitivman. E Santral i parey nou konnen main aktive ii la akoz Legzekitiv i la, Finans i la, an menm tan nou sant komann i la, e an menm tan nou annan en kordgard ki pe *operate* enkli ki son *general duties, CID and so on*.

So nou pa ti a kontan i koumsa nou. E nou pe travay definitivman pou nou *relocate* serten bann konponan. Sa i an mars definitivman, akoz nou pe *rewire*, nou pe fer enn de keksoz ase *facelift* en pti pe sa batiman.

Kot i konsern bouz bann zofisyé, wi sa i kontinyel; toultan sak fwa i annan en nesosite. Parey mon'n deza dir nesosite pou sanz sa zofisyé pou anvoy li dan en lot landrwa si oule, pou li al fer si byen parey in fer dan sa landrwa.

Sanz sa zofisyé osi pou li tir en pe sa konfortablilite dan en landrwa anmenn li dan en lot landrwa. Sanz sa zofisyé baze lo son kapasite e nou vwar poudir i pou fer pli byen dan sa landrwa, baze lo son - kwa ki i annan son abilite, nou fer sa osi.

So in anmennen – in anmennen - in anmenn dibyen li – in anmenn dibyen, me pa neserman ki toultan dan sa bann sanzman ki nou vwar 100% pozitivite. Me selman mon pe garanti zot poudir i annan bann demars ki'n ganny fer ki'n byen e bann zofisye i *well off* i annan.

Me selman i annan ki pa pou neserman kontan kot in ganny mete, sa i normal, akoz *it's about rotating the officers as well* - sa *policing*. Mersi bokou.

MR SPEAKER

Mersi. Onorab William?

HON WAVEN WILLIAM

Mersi Mr Speaker. Bonn apre midi Minis avek ou lekip. Mr Speaker, mon ti kontan demann avek Minis, par lefe ki zot pe dir nou ki anba sa reform pou annan plis *boots on the ground* dan *community*, me nou rekonnèt poudir zot annan en problemm transpor dan nou - *well* zis dan mon rezyon - nou pe koz sid was, ti annan en problemm transpor e lekipman.

Menm si ou pou annan en kantite *boots on the ground*, me sa eleman lekipman avek transportasyon pa vin avek, so Minis, donn ou en pti pe detay ki zot pe mazin fer. Akoz - menm si pou annan gard pou

apran mont moter plis, bisiklet, pa konnen. So, problemm se transportasyon. Mersi.

MR SPEAKER

Mersi. Minis?

MINISTER ERROL FONSEKA

Yeah, thank you. Mersi Onorab pou ou kekyon. Problem transportasyon akoz sa problemm mannyer ou servi ou transpor. Ou konpran mwan ou? En transpor i kapab *drop* en kantite dimoun lo *key points*, *ok*, donn zot zot *tasking* apre retournen.

So, mon krwar natirelman mon ... plis transpor i gou, me solman i annan en moman osi se ki plis transpor i fer ou *inefficient* – i pli bon si nou revwar nou *planning* – revwar nou fason ki nou servi sa bann transpor ki nou *drop*.

E lekipman – ler ou pe dir lekipman, lekipman i annan ase lekipman - si dimoun pe servi sa lekipman osi. So mwan mon pa tro kontan tann lekipman, lekipman, lekipman; mon kontan pli tann *training, training, training*.

Get kominikasyon, par egzantp ozordi nou bezwen plis *training* lo kominikasyon pou fer dimoun kapab servi sa, akoz ler ou annan kominikasyon ou

pe servi li byen, tou lezot dimoun i konnen ki pe arive. E la ou kapab *divert* dimoun akoz *already* - i *already know* ki pe ariv Lari Bazar kanmenm i pe travay kot lasose. Ou kapab pran li vitman, al siport laba.

So par ler i fason nou servi lekipman. Mwan mon krwar nou annan ase polisye, nou annan ase lekipman pou nou fer. Nou bezwen zis fer sa ki *Compol* pe fer la – sa plis *training*, plis *operational training*, plis *briefing*, plis *engagement* bann zafer koumsa pou donn nou sa rezilta.

Zis pou *pile* lekipman, *pile assets*, *pile* isi, *pile* laba si ou pa donn sa baz, i pa pe ed ou. Natirelman zofisye pou demann sa li, me selman ler pou pe planifye sa, ou bezwen annan ou plan travay, met li in *place*, *Compol* mon pa konnen si ou dakor ek mwan - petet ou kapab elarzi lo la. *Thank you*.

MR SPEAKER

Mersi.

COMPOL TED BARBE

Mersi Mr Speaker. Vitman en pti pe, parey nou pe bouz ver en pti pe ver *digitalization*, so lapolis i pa tro mal lo la, nou annan enn de bann keksoz ki nou'n deza fer, ki pa neserman ki nou *reveal* pou

dir nou annan sa nou fer sa eksetera. Bann *investigative tools* eksetera, apre i fasilite en pti pe deplasman.

Par egzanz nou annan nou lokirans par egzanz nou oule *digitalize* li pou zisteman pou nou kapab *pick up* keksoz sitan vit ler en dimoun i vin rod en keksoz, nou konnen nou'n vwar. Nou fasil *on the pressing of a button* nou kapab *reveal* keksoz.

Lensidan ki ganny raporte en konparezon, nou sant komann i annan – nou annan fasilite pou nou gete lekel transpor ki pli pre avek sa lensidan. So mwan mon pou dir en keksoz. Mon pou et fran – i zis en kestasyon ki nou tou nou angaz nou e servi sa ki nou annan *right now*, pou nou fer otan ki nou kapab avek.

Sant komann i kapab – i konn mouvman gard avek son radyo kote i ete. I konn mouvman nou transpor ki kote i ete, ki direksyon i pe fer e kapab fer bann *diversion* eksetera.

So, i en *matter* ki nou fer sir nou met li an mars *from top bottom* – tou dimoun i angaz li efektifman pou kree sa lefikasite. Nou annan sa ki nou apel *case management* – nou'n deza koz lo la la en pti pe – mon

a zis tous lo la vitman; e sa nou - tou stasyon i ganny akse avek.

Nou konnen ler en *case* i ganny anrezistre lekel ki'n anrezistre e tou sa a bann lenformasyon *is on* la. E nou konnen even lekel ki avek sa *file*.

So nou annan sa kapasite nou. Ki kordgard i servi, *Statistics Unit* i servi - i annan son *parameter* li osi i annan tou keksoz ki ou kapab war eksetera. *CID officers* i fer li osi.

Nou *still* pe ganny konplent - nou konnen ek bann piblik kot i dir poudir gard i *still* pe demann zot isi, laba. Nou annan sa sistenm sa fasilite pou *driving license* pou nou konn son valideite, konn sa *owner* eksetera. Tousala i annan Nou pe bouze dousman, dousman. Nou annan serten keksoz ki nou ankor pe travay lo la pou nou fer sir ki i *complement* avek sa ki Onorab in dir, ki nou annan en pti pe - nou konnen nou napa en kantite me sa ki nou annan, nou kaba fer keksoz avek.

Nou annan fasilite *drones* osi. Nou fek fini *train* - *it's a long list* mon kapab dir, nou fek fini - mon kapab koz lo la en pe. Nou fek fini *train* 17 - 16 *sorry* - tou ansanm i fer 17 zofisye lapolis dan diferan *unit* ki'n

train pou servi *drones* - zot *licensed*.

E nou'n komans servi - pa nou komanse - nou pe servi *drones* en pe dan nou bann *daily duties*. So nou pe servi - nou deza pe servi *drone* nou. Nou annan otan - nou pe *capacitate* bann dimoun dan diferan - nou bann gard dan diferan - diferan oter - diferan sa.

Conter Terrorism Unit, nou annan en tim ki'n *train* - ki pe *train* nou apel zot *Quick Response Team*. Se zot in *train* ek bann *Franse, La Reunion* e dan 2enm *training* in fer isi. E nou annan ankor 2 dimoun - zofisye pou nou ki nou'n anvoye ki nou'n vwar dan zot pou vin bann *trainers* e zot in al fer zot *training* - *Train the Trainers course La Reunion*, pou nou kapab *conduct* serten *basic* isi e ganny *expert* pou vin *top up* lezot keksoz.

Sivilyen - nou sivilyen ek nou bann zofisye parelel, tou le de konponan pe *train* avek swa *Guy Morel Institute*, me i annan ki *University of Seychelles*.

Nou annan en bon pe zot la ki'n *training* - lapolis e sivilyen tou lo *policy* - *Development of policy or policies*. So, nou pe aranze, aköz nou pe revwar tou bann *policies* ki nou lapolis in annan dan

lepase, e *update*, *upgrade*, amann eksetera.

Nou annan otan ki nou pe fer Mr Speaker e mon ava aret la, me selman sa lapolis dousman, dousman i pe ganny transformen. E se sa nou vizyon pou le fitir se nou annan en lapolis ki kapab satisfere nou bann *customers* ki *public – the public* e donn sa servis ki nou *product* ki nou donn dimoun.

Mon kontan koz lo la koumsa, kot lepep i kapab dan tou dimansyon *regardless* lekel ou, i satisfere avek prodwi ki lapolis pe donner e sa se sa servis. Mon ava aret la Mr Speaker. Mersi.

MR SPEAKER

Mersi.

MINISTER ERROL FONSEKA

Mr Speaker, zis mon anvi siport *Compol* pou en pwen byen enportan ki in dir, pa aköz ou annan 10 veikil ki ou *deploy* tou le 10. Ou konnen toultan dan sa bann louvraz ou bezwen kit en reserv, *ok?*

Ou pa bezwen *deploy* tou, apre ou war ou napa ase, aköz ou fek *deploy* tou. So - e lot keston ki in mansyonnen ki petet mon pa konnen si ou'n manke, i sa nesite planifye kot ou demann i ete plis, pou met plis dimoun.

Pa zis partaz keksoz bonnavini. So, sa i bezwen fer ek sa bann *tools* ki annan e pe travay serye lo sa bann zafer pou anmenn plis sa lefikasite. Mersi.

MR SPEAKER

Mersi. Mon a pran keston Onorab Aglae.

HON EGBERT AGLAE

Mersi Mr Speaker. Bonn apre midi Minis, *Compol* e Mr Denousse e Mr Bibi. Minis, ou'n koz lo reform, aköz mwan pou mwan bi reform se pou fer sanzman pou anmenn pli lefikasite.

So baze lo sa Minis, i annan en konponan ki mon pa'n tonm ditou, ki bezwen akonpany bann reform ki zot bezwen fer pou anmenn sa lefikasite, sa i resours.

E Minis, premyerman ou'n dir ou pa anvi tann lekipman, me lekipman i en resours. Prezan, eski zot pe mars *alongside* en Bidze ki zot pe programmen, pou etal sa reform pou li vin dan sa ki zot zot anvi, e rann Lafors Lapolis vin pli efikas.

La mon pe koz an term finans la. Mersi.

MR SPEAKER

Mersi Onorab. Minis.

MINISTER ERROL FONSEKA

Thank you. Mersi Mr Speaker. Mr Speaker, sa panse i en panse ki vremen pa neser anmenn okenn lefikasite. Ou bezwen get sa zonn deryer sa lekipman. Sa i priyorite toultan akoz ler keksoz i al mal, ek sa pli pti gin – pli pti gin ou kapab ganny gran kantite keksoz.

Mon fek sorti Australia, mon pe get zot border control sistenn, zot annan diferant lekipman pou detekte isi detekte laba, me selman zot efficient ki mon apel instinct; sa bann zofisy zot annan instinct, ki ou bezwen really ingrain sa dan dimoun.

So, ou ou pozisyon ki ou pe fer, mon konnen akoz ou pe fer sa, ou pe think dan sa fason, me krwar mwan i pa the answer. The answer is to focus lo human- Ganny sa bon dimoun, apre ou donn li sa bann lezot zafer.

Lekipman i pou la toultan. I pou annan nouvo lekipman e ou pou anmenn sitan lekipman toultour, ou ou pa ni pou bezwen servi sa bann si ou pa pou konnen ki ou pe fer. I pou lo ou, me selman ou pa pe servi li.

So, sa i enportan ki nou focus lo lo dimoun. Mersi Mr Speaker.

HON EGBERT AGLAE

(Off-Mic)

MR SPEAKER

Mersi. Onorab, zis i annan en pwen ki pa'n ganny reponn silvouple. Wi, ale.

HON EGBERT AGLAE

Minis, nou pe koz reform dan lapolis dan son totalite. Ou'n nonm modernization, digitalization, i vin avek en kou teknolozi. Sa ki mon pe demann ou Minis. The whole package itself ou bezwen annan larzan pou fer. Eski ou pou annan Bidze pou ou akonpli tousala? Mon pa pe koz zis gadget pou met lo lapolis mwan. Mersi.

MR SPEAKER

Minis?

MINISTER ERROL FONSEKA

Yeah, ok. Zis pou klarifye sa thing. This is the phased approach. So tou sa ki nou pe fer i right. Ou bezwen pou sa bann keksoz ki ou pe fer, me it's a phased approach.

Sa ki nou pe fer la, i pa pe fini dan sa lannen. It's ongoing. It's a long-term thing ki ou pe sanze. Nou pe sanz en sityasyon kot dimoun i krwar nou pa bezwen training, la, ou'n fini ariv en oter. Nou'n tande sa.

Non, *training, learning i really en lifetime experience*. Nou bezwen konpran sa.

E sa sanzman – toultan mon'n mansyonn sanzman mwan. Akoz sanzman pe arive – La nou pe asize, i annan sanzman ki pe arive ki nou bezwen revwar. Mon fek get *Malawi* la, zot bann *passport* la ... *you know there's* tou sa bann prekasyon nou bezwen annan, nou bezwen prevwar. Nou pa kapab zis dir nou'n fini konnen. Nou pa fini konnen. Tou dimoun i bezwen sa. E mon krwar sa nide ki'n sorti dan Lasanble.

I bezwen ganny redir, redir poudir sa *is wrong*. Nou pe met move lenfliyans dan latet dimoun ki ou'n fini konn tou keksoz. Mersi Mr Speaker.

MR SPEAKER

Mersi. Bann Manm mon bezwen bouz lo prosen kestyon avanse. Mon regrete letan i koumsa, me selman mon santi ki kestyon esansyel lo reform dan lapolis in ganny refer.

Sa ki nou pe fer la, nou pe diskrit loperasyon lapolis an antye. Petet sa ki neser se Minis i vin fer en leksplikasyon detaye lo loperasyon lapolis. Nou a bouz lo prosen kestyon Onorab Andy Labonte.

HON ANDY LABONTE

Mersi Mr Speaker. Bonn apre midi Mr Speaker. Bonn apre midi *panel*, ek tou koleg Onorab. Kestyon 11 i lir koumsa;

Minis, ki kolaborasyon ou Minister i annan avek Lotorite Por Victoria, pou reasir bann biznes ek endividi, ki i annan lord ek lape lo tou Por Sesel, sirtou kot *Inter Island Quay* ? Mersi.

MR SPEAKER

Mersi Onorab. Minis?

MINISTER ERROL FONSEKA

Mersi Mr Speaker. E onorab mersi pou ou kestyon. *Ok*, sekirite lo tou bann por Mahe, Praslin ek La Digue i tonm anba responsabilite *SPA*. E zot annan zot prop *team* sekirite ki bezwen travay anba serten prosedir ek *standard* pou asire ki nou *standard* anba *IPS Code* i ganny respekite e ki Sesel Port Victoria i ganny grade koman en por ase *secure*, pou permet nou resevwar trafik maritim ki anmenn sa *life line* ver sekirite alimanter, e lekonomi nou pei.

Se pour sa rezon ki sa Minister responsab anba Minis Derjaques i annan plizyer plan devlopman lo por e se osi sa rezon ki zot annan en *team* ki

ganny dedye pou sa travay sekirite lo por.

Natirelman, anba lord ek lape, e osi *border control*, lapolis, *Immigration*, *SRC* e *NRCC*, nou annan en gran kolaborasyon avek *SPA* ek *SMSA*. Par egzanp, lapolis i ed *SPA* ek serten *training* pou sa *security team*; *Marine Police* i bezwen travay tre pros avek *Maritime Ports Security*; *Immigration* an sa ki konsern *border control* me osi *extend SEBS* pou en *maritime upstream immigration processing of entry* dan *Port Victoria*.

E tousala, tousala pou anmenn plis sekirite dan *border control* e sa i bann gro, gro travay ki pe deroule.

Pou vin lo sa kote fasilite *port*, lo *Inter Island Quay*, sa sityasyon i ankor en pti pe pli konplike, vi ki sa lasose i pe deservi pasaze e osi *cargo* pou bann zil.

E sa i fer ki sa lasose i reste konzeste espesyalman pandan bann *peak hours* ler i annan bato *Cat Cocos*, ki pe desarz son bann pasaze, enkli bagaz. E an menm tan i annan sa bann bato *cargo* ki pe pran *cargo* pou anmenn lo bann zil.

Pou amelyor sa sityasyon, i annan serten mezir sekirite, ki'n deza komans ganny mete

an mars par Lotorite Por depi an Out lannen pase, pou rafal lafet 15 Out, pou ed - kontrol en pe sa bann aktivite ek mouvman transpor.

Par egzanp, pou pa les okenn transpor ganny akse anndan si i pe al *drop off* en dimoun, oubyen si zis pou anmenn en dokiman par egzanp.

En konsiderasyon spesyal i ganny pran pou bann dimoun avek bokou bagaz – bagaz lour e priyorite i ganny donnen pou bann transpor ki pe anmenn *cargo* pou sa bann bato.

Pour mansyonnen ki lo kote lasose Praslin avek La Digue par egzanp, in fini deza ganny separe ant mouvman pasaze e aktivite *cargo*, pou asir bann mezir sekirite me lo lot kote *Inter Island Quay*, i osi annan proze redevlopman sa lasose *Inter Island Quay*, ki'n deza komanse tel ki, met *fencing* pou kontrol en pe akse ek lasose.

E sa pou ede osi avek mezir sekirite ki deza an plas, e lenstalasyon *camera*, kyosk pe ganny mete pou kouver sa fasilite portyer, kot bann *stakeholders* ki osi deservi sa lasose, pou osi ganny enformen pou partisip e donn zot bann pwennvi, an relasyon avek plis mezir sekirite ek *safety* an plas.

Lo kote *parking* sa osi i annan serten mezir ki pou ganny amelyore, e sa pou osi an diskisyon dan sa nouvo devlopman ki pou ganny fer. Reste asire ki tou bann lazans Gouvernman, enkli por pe travay an bon kolaborasyon. Mersi Mr Speaker.

MR SPEAKER

Mersi. Wi, Onorab Labonte, ou siplemanter.

HON ANDY LABONTE

Mersi Minis pou ou larepons byen detaye. Petet mon apresye ki ou'n fer resorti ki i annan sa bann sinerzi ant SPA ek lapolis kot zot menm ede lo kote donn *training*.

Me petet lo kote prezan lapolis – la mon pe koz petet direkteman lo *Inter Island Quay*, ki lenstan ki zofisye lapolis i vreman entervenir, sirtou la kot *Inter Island Quay* ler i annan bann bato Praslin, La Digue?

Akoz i annan bokou konfli ant par ler *taxi driver* avek pirat ki tousala i kree en konfli. So dan ki lenstan petet ti kapab annan en prezans lapolis pandan sa bann peryod letan? Mersi.

MR SPEAKER

Mersi Onorab.

MINISTER ERROL FONSEKA

Mersi Mr Speaker. Mersi Onorab. ACP Denousse a donn *operational details* lo la.

MR SPEAKER

ACP?

ACP ANTOINE DENOUSSE

Mersi Mr Speaker. Mersi Onorab. Mr Speaker, i annan en detrwa semenn la ki nou pe ranforsi prezans lapolis dan bann *peak hours* lo sa bout lasose. Dan lepase in toultan annan bann *issues* me ler i annan bann konplent kot nou'n anvoy zofisye; i annan en desizyon ki'n ganny pran ki nou bezwen sak fwa i annan bato.

Nou'n koz avek bann dimoun - bann *commanders* santral pou fer sir ki i annan prezans lapolis akouz nou okouran ki i annan en tansyon ant bann diferan operater dan sa landrwa. E alor prezans lapolis i osi enportan ki pou mentenir lord avek lape.

E nou pou fer sa, tanzantan ki nou santi poudir i annan en devwar pou nou fer ziska ler keksoz i tourn annord e la mon a get avek Lotorite Por.

Wi, nou'n vwar poudir nou ti annan en nesosite pou nou la, me nou pa kapab laba tou lazournen. *Ok*, ler bato pe koste

sirtou aswar ki nou konnen i annan sa bann problem, ant bann diferan operater *taxi* avek lezot, ki zot pe lager bann kours lo lasose e sa i pa donn en bon zimaz.

Annan de zour, enn fwa i kapab anmenn blese pou lezot dimoun ki nou santi i nou devwar. Mersi Mr Speaker.

MR SPEAKER

Mersi *ACP*. Nou a pran kestyon lezot Manm. Onorab Pillay?

HON SEBASTIEN PILLAY

Mersi Mr Speaker. Mon konsernen avek larepons ki mon pe gannyen, aköz i pa neserman larealite. Mr Speaker, Lotorite Por ki lotorite ki mandate pou asir Lotorite lo por; i asir lotorite lo por – *safety*. Sekirite i antre, me si i annan en bagar, ant bann endividi se sa louvraz lapolis pou *deal* avek.

E kestyon i byen plase aköz nou napa prezans lapolis e i pa korek ki i annan zofisye la. So, mon krwar fodre bann dimoun ki lo *panel* i *get their act in order* e dir nou ki zot pou fer pou *deal* ek sa sityasyon?

E eski zot pou annan en prezans? I permanan lapolis, an menm tan ki Lotorite Por pe asir sekirite lo por, aköz dayer bann zofisye ki asir sekirite lo por, i

annan en *outcry* parmi zot aköz bann kondisyon ki zot in gannyen i met en presyon lo zot ankor.

So, mon krwar Minis, sa ki'n donn ou sa *brief* ti devret donn ou sa lenformasyon osi. So eski zot pou annan en prezans lapolis lo por, pou ede asir sekirite kan i annan bann lenstans kot i pou annan bagar oubyen okenn alterkasyon ant bann endividi? Mersi.

MR SPEAKER

Ok, mersi. Minis, ou pou reponn?

MINISTER ERROL FONSEKA

Mersi Mr Speaker. *Basically* i ti pou en *waste of resources* pou nou met dimoun laba permanan, ler i annan en tim sekirite laba. Me selman on demande nou bezwen *respond*. *ACP* petet ou a donn enn de bann legzanp ki nou'n fer sa, e in mars ase byen. Mersi Mr Speaker.

MR SPEAKER

ACP pou azoute?

ACP ANTOINE DENOUSSE

Mersi Mr Speaker. Onorab Dirizan Lopoziyon, a sak fwa ki nou annan bann sityasyon lo por, nou fer sir ki zofisye lapolis i la. E parey mon'n dir detrwa

semenn pase nou'n ganny serten konplent e nou'n donn lenstriksyon ki lo *peak hours*, lo *peak hours* ler bato i koste, nou fer zofisye la prezan.

E nou pe menm servi bann zofisye ki an sivil. Ler napa aktivite koumsa, nou pa mete zofisye, me par kont, si nou pe koz lo *New Port* – lo *New Port* nou annan zofisye lapolis ki stasyonnen laba – *ok?*

Me lot kot bato Praslin, La Digue ler bato i arive, parey mon pe dir, ler bato i koste, nou fer sir ki nou annan zofisye lapolis. E si i leka ki sa bann dimoun ti ava voudre i annan, wi, nou a fer sir la ki kontinyelman i ava annan – nou ava met plis ankor.

Me nou pou *increase* nou patrol, me nou pa pou kapab met zofisye lapolis lo en baz lazournen antye, akoz nou war poudir pou annan en gaspiyaz resours. Me parey mon'n fer sorti Onorab, Mr Speaker lo *New Port* i annan dimoun la ki stasyonnen lo *New Port*.

Me par kont, i annan bann por ki zofisye lapolis i pase, parey nou get bann por kot *IPHS*, zofisye lapolis i pase. E tou le lannen nou annan en loperasyon ki ganny fer ki nou apel sa *USALAMA* kot lo tou bann por bann bato i ganny *search*, travay i ganny

entansifye akoz sa i annan bann loperasyon konzwent.

Me lo kote lokal, Mr Speaker, nou pou *increase* patrol dan sa bann landrwa, pou nou fer sir ki i annan lord avek lape lo la. E *search* osi tou sirman i pou bezwen ganny *increase* lo la. Mersi bokou Mr Speaker.

HON SEBASTIEN PILLAY

(Off-Mic)

MR SPEAKER

Onorab, mon annan lezot Manm – ou pe rod en klarifikasyon? Ale, annou ale vitman.

HON SEBASTIEN PILLAY

Mersi Mr Speaker. Mr Speaker, mou oule koriz en *misapprehension*. Sa semenn mon'n al gete mwan dan *peak hours*, akoz sa kestyon pe vini pou mwan vwar si ti annan prezans lapolis e ti napa. Sa ki mon pe dir, se ki i bezwen annan en prezans lapolis dan sa *peak hours* pou *avoid* sa bann sityasyon.

Si i annan *plain clothes policemen* ki li i pe fer son louvraz separe, i pa kapab al idantifye son lekor, si li i annan son target lenvestigasyon ki i pe fer. Se sa ki mon pe dir avek zot

la devan e ki ti pe *misleading* ler Minis ti pe dir. Mersi.

MR SPEAKER

Tre byen. Silvouple *panel* a note. Onorab Larue ou kestyon.

HON FLORY LARUE

Bonn apre midi Minis avek ou panel. Mersi Mr Speaker. Lefe ki kestyon i bord lo korporasyon ki Minis i annan avek Lotorite Por, e pe koz lo lord dan por, eski Minis, i kapab dir nou ki travay ki pe ganny fer pou met en sistenm ki ekivalan avek erport lo kote *border control* avek por? Mersi.

MR SPEAKER

Mersi.

MINISTER ERROL FONSEKA

Mersi Mr Speaker. Mersi Onorab pou ou kestyon. Petet ou pa'n tann – Dan mon lentervansyon mon'n mansyonn sa egzakteman nou pe fer sa ki parey nou fer lo erport – *by the way* parey dan tou lezot pei osi zot pe swiv nou ki nou pe fer isi; e sa *upstream clearance* kot dimoun avan ki i ariv dan ou pei, ou'n fini konn tou son bann detay.

E i pa egziste lo *port*, nou pe al met sa lo *port*. Lo *port*, SPA in *invest* dan en *Port Management System platform* ki

tou bann lenformasyon ki pou vin lo la, i ganny *filtered back* kot Imigrasyon, kot NICC partou, kot tou dimoun i byen ganny enformen.

Sa i sa *modernisation* ki nou pe anmennen pou *enhance border security*. So i en gran, gran... Wi zis parey lo erport nou pe fer menm zafer. Sa louvraz *border control* pe vin pli entans. E *luckily* nou annan nouvo teknolozi konmela, me i enportan ki tou dimoun ki met son lipye lo nou later, lo nou *sovereign area* ki nou pe kontrole. Mersi Mr Speaker.

MR SPEAKER

Wi, mon a pran ou klarifikasyon Onorab Larue.

HON FLORY LARUE

Mersi Mr Speaker. Mersi Minis. I plito lo kote lord *in the sense* kot dimoun i annan mouvman antre, sorti lo por. E kekfwa lo erport avan ou antre dan en *secure area*, ou ganny *searched* letan ou sorti ou ganny *searched*, eski sa kekfwa i en keksoz ki nou pe *plan* pou fer?

Me solman pou le moman ki mannyer nou pe gard sa lord *through search* - bann dimoun ki *enter* ek *exit* lo por? Mersi.

MR SPEAKER

Mersi.

MINISTER ERROL FONSEKA

Yes, Mr Speaker, mon kapab reponn sa. Egzakteman dan sa laliny menm, nou pou met – la nou annan *immigration post* dan *southern port*, lo *north side* nou pe mete osi e nou pou konnen si menm sa bann bato ki koste, nou pou annan diferant prosedir si zot pe debark *24 hours* ouswa si zot pou la pou en semenn.

So, i annan en kantite kontrol ki nou pe mete e *advisory* nou pe gannyen ek sa bato ki nou pe travay lo la. Mersi Mr Speaker.

MR SPEAKER

Mersi Minis. Bon avek sa, nou'n ariv a lafen sa sesyon kestryon. Mon remerci Minis ek son delegasyon pou zot partisipasyon. Mon swet zot bonn kontinyasyon e bon travay. Nou pou pran en *pause* la.

Zot konnen lo *Order Paper* i annan en lot *item* e sa se en *Statement* lo i lapar Minis Lasante. Nou pou rebran Lasanble pou sa 3:45. Mersi.

(BREAK)

MR SPEAKER

Bon, nou rebran avek *Statement par* Minis. Madanm raporter ava apel Minis ek son delegasyon?

Bonn apre midi Minis Lasante Mrs Peggy Vidot e egalman bonn apre midi Dr Jude Gedeon, *Public Health Commissioner* e Dr Danny Louange *CEO Health Care Agency*. Mersi pou zwenn nou apre midi. E pou Minis prezant *Statement* lo propozisyon, negosyasyon avek *WHO* lo pandemik – lo *WHO Pandemic Agreement*. Minis, ou *Statement* silvouple.

MINISTER PEGGY VIDOT

Bonn apre midi Mr Speaker, *Leader* Lopoziyon, *Leader* Zafer Gouvernman, Manm Lasanble Nasyonal, telespektater.

Mr Speaker, si ou ti a permet mwan pou komanse, mon ti a kontan anmenn mon felisitasyon a Onorab Spiro e Onorab Bistoquet e anmenn mon swe pou zot koman bann Manm Lasanble Nasyonal e swet zot tou de bon.

Mr Speaker, mon ti a kontan komanse par dir mersi pou aksepte mon demann pou vin dan Lasanble Nasyonal lo premye lokazyon posibil, apre repons lo Leta Lanasyon.

Ou ava rapel Mr Speaker, ki Minister Lasante in deza donn en konferans depres lo sa size e sa in deza eklersi bokou kestyon.

Me mon santi dan sa prosesis pou vin devan Lasanble, akoz apre tou anba nou Konstitisyon, se Lasanble Nasyonal ki ratifye tou Trete Enternasyonal ki Sesel i decide sinyen.

Lenformasyon dan sa prosesis i tre enportan, pou ki nou tou nou reste lo menm paz. Rezon prensipal ki mon'n fer sa demann, se pou eklersi, edike e retir okenn dout e bann panik ki kapab ganny poze par bann propagann enternasyonal, ki pe osi protez lentere swa bann gran lakonpanyen oubyen lezot lentere,

An plis ki sa, mon'n war sa lentere nasyonal spesyalman ganny eksprimen. Me malerezman mon'n osi war serten lenformasyon ki pa korek.

Premye pwen Mr Speaker, se pou fer kler ki napa okenn Trete ki'n fini pare e ki Sesel in sinyen. I en Trete ki ankor an diskisyon. Mon ti a kontan dir ki sa Lagreman i ankor pe ganny travay lo la par sa group ki'n ganny idantifye pou fer sa travay.

Mr Speaker, zis pou fer remarke ki depi nou konferans depres e ozordi, in annan ankor amannman ki pe ganny konsidere e ki pe ganny ankor diskite dan sa Lagreman. Sa i en prosesis dinamik e se pour sa rezon ki nou pa devret tonm lo okenn konklizyon e pou swiv tou bann devlopman.

Pandemik *COVID-19* in ravaz lemonn in koz bokou maladi, lanmor, soufrans dan nou pei e globalman. Lavi tou Seselwa, in ganny bouverse par *COVID* e nou tou nou konsyan son lenpak sever lo lasosyete e lo lekonomi.

Sa Trete i swiv leksperyans lemonn avek pandemi *COVID*. Lorganizasyon Mondyal pou Lasante – sa lorganizasyon ki pe etidye bann defi e bann bon pratik e aprezan ansanm avek tou pei, tou pei Manm pe regarde, ki mannyer lemonn i kapab vin pli rezilyan pou pli byen protez limanite an ka nou ganny en lot pandemi lo sa splander.

Donk lanfaz i lo leta prevansyon, akse ek medikaman, partaz lenformasyon e resours e asire ki tou pei e tou nasyon i ganny trete dan menm fason; sa ki an Angle nou apel "*equity*."

Mr Speaker, avan mon al dan plis detay, mon anvi dir

klerman ki nou souverennite pa pe ganny afekte, drwa sak endividi i ganny proteze konsernan son swa pran tretman, swa pou pran vaksen ou lezot form tretman. E ki a tou moman, lotorite konsernen savedir Leta Seselwa pou bezwen rod proteksyon e gerizon son pep koman son priyorite.

An 2018 1 an avan *COVID* ti aparet, Direkter Zeneral Lorganizasyon Mondyal ti averti ki lemonn pa ti annan ase preparasyon, pou fer fas avek en nouvo maladi ki kapab repann dan lemonn. En pandemi i kapab aparet nenport ki ler.

Malerezman, napa en pei ki ti pare pou fer fas avek *COVID* malgre sa alert ki *OMS* ti'n prezante, tou pei ti napa sifizaman resours, tou pei ti napa sifizaman resours e preparasyon an plas, pou envit propagasyon sa viris.

An rezilta ki nou'n vwar Mr Speaker, se ki kordinasyon pou en repons efektiv lo nivo nasyonal e enternasyonal, ti pran tro bokou letan pou ganny met an plas; partaz lenformasyon ki korek e azour ti manke.

Pa tou pei ki ti annan resours e kapasite pou prodwi

mwayen neser pou teste e tret maladi.

Ti annan mankman prodwi parey bann proteksyon gan, mas e diferan keksoz lo nivo global e menm serten pei ti defann leksportasyon sa bann prodwi. Pa tou pei ki ti pare pou partaz avek bann ki ti napa sa kapasite.

Ler vaksen ti pare, serten pei ti met komann pou gran kantite e distribisyon lo nivo enternasyonal pa ti ditou ekitab.

Pou nou Sesel, ler nou tipe sey ganny vaksen, e si menm si nou ti pou annan larzan pou aste sa vaksen a se moman, nou ti ganny dir poudir pli boner ki nou kapab gannyen anba *KOVAK* sete an *juillet* 2021.

Me gras a bonte serten pei zanmi, nou ti kapab ganny vaksen an Zanvyè 2021 e se mersi a *I'OMS* e a Linyon Afriken ki ti mobiliz resours, pou ofer nou tes laboratwar e lekipman proteksyon.

Ozordi lemonn i reste vilnerab a en lot pandemi e sa maladi si nou apel li maladi X, kan mannyer nou donn li en non, i kapab komanse dan nenport ki pei, e propaz vitman menm avan ki nou rekonnèt li koman en lot maladi, avek

potansyel pou li vin en pandemi.

Se avek sa sityasyon e avek lesan ki nou'n aprann atraver COVID-19 ki nou bezwen annan en preparasyon lo nivo nasyonal e enternasyonal, ki pou vitman detekte sa maladi e komans bann mezir pou metrize li.

Lo nivo nasyonal sa i vedir en sistenm sirveyans entans, laboratwar ekipe, travayer Lasante Piblik byen formen, en sistenm swen lasante performan.

Zefor sak endividyel i pa sifi e alors nou bezwen war ki mezir e lapros enternasyonal nou bezwen met an plas, pou ki pei i kolabore, partaze, e asire ki tou pei, ki gran ou pti, i annan akse avek teknolozi e mezir dan en fason ki zis e ekitab.

Se sa larezon det en Lagreman pandemi ki reini tou pei. Sa Lagreman i annan pou bi an premye, asire ki tou pei i annan akse ekitab avek e partaz tes, tretman e vaksen pou sov lavi, me osi pou sov legzistans.

Dezyenman, an se ki konsern sofgard sistenm lasante, sa Lagreman pou amelyor partaz lenformasyon lo bann organizm ki annan potansyel pou koz en pandemi e

protez travayer lasante, ensi ki bann ki pli vilnerab dan sosyete.

Finalman, sa Lagreman pou ogmant korperasyon ant bann manm e I'OMS pou prepare en repons konzwent. En tel Lagreman enternasyonal i bezwen fonde lo serten prensip.

Lartik 3 dan sa Lagreman, i sit sa bann prensip tre byen. I demande ki nou annan respe pou drwa imen, dinyite sak endividi.

I garanti pou souverente nasyonal e lapros e respekte Konstitisyon e Lalwa sak pei. Ki nou annan ekite e sa i santral dan sa Lagreman ki lo kote nasyonal, ou lo kote enternasyonal.

Ki nou annan responsabilite pou pei pou lasante son pep ki rekonnèt ki i annan diferan nivo kapasite dan bann pei e ki i annan solidarite ki a latransparans, rann kont, lenklisivite e langazman tou parti prenan.

E neseseite annan lasyans, ek levidans pou fer desizyon e annan proporsyonalite, konfidansyalite e proteksyon lenformasyon.

Tou sa i kouver en kantite dan sa lagreman. Egalman en langazman pou pei kolabore, partaz lenformasyon e en

lasirans ki annan kapasite prodiksyon ki regard bezwen lezot pei i osi fondamantal.

Lorganizasyon Mondyal Lasante, sa lorganizasyon ki pei ti kree akoz zot ti vwar nesesite pou annan kordinasyon ek kolaborasyon atraver lemond i sa mwayen pou ki tou pei kapab ganny konsiderasyon e tretman ki zis e ki ekitab.

Aprè tou pandan en pandemi, si en pei i ganny neglizè sa i kree en risk pou lezot pei e pou lemond antye, alor i rezonnab pou ekspekte ki tou pei i a war nesesite pou en tel fason asir an solidarite.

Sa prosesis devlop en Lagreman enternasyonal lo pandemi, in komanse depi 2021 ek sa dokiman ki an revè ki pa ankor finalize i reflekte sa ki pei pe propoze. Tou pei i valoriz son souvrennte e napa enn ki pou sakrifye pou en tel prensip.

Gouvernman Sesel i war nesesite annan en Lagreman, lo baz ki mon'n fek eksplike ki en pei koman Sesel ki kapab mwayen proteksyon ki vilnerab anver bann bann menas, ki sorti an deor nou frontyer; nou bezwen annan garanti ki nou pa pe reste deryer ler pandemi i frap lo nou laport, e ki nou kapab depan premyerman lo nou lenfrastriktir e mezir ki nou'n met an plas dan nou pei.

Me osi lo sa ki nou kapab resevwar sa kalite soutyen ki nou kapab annan, sa kalite lenformasyon ki nou bezwen annan, e sa kolaborasyon ki nou bezwen annan avek lemond.

En Lagreman dan son versyon final i bezwen adres nesesite e bezwen Sesel e respekte tou valè ek nou Konstitisyon.

Sesel i pare koman en pei responsab, pou azir dan en fason kolaboratif avek larestan lemond dan ka en pandemi en Lagreman enternasyonal e sa lenstriman i pou ankadre sa kolaborasyon, baze lo respe sa pei e dan en lespri solidarite e lekite e an prenan kont ki tou sa bann prensip ki mon'n site i deza ladan.

Sa Lagreman ki pe ganny propoze i ankor an form draft e komite ki apel *Enter-Governmental Negotiating body* i konpri manm sorti dan tou le 6 rezyon dan *I'OMS*, in fer fini son 8em rankont travay ki'n deroule pandan sa 2 dernyen semenn Vandredi. Bann provizyon anba sa Lagreman i ava ganny sirkile byento par *I'OMS*.

Letan pa pou permet mwan Mr Speaker, pour mwan al dan tou detay sa Lagreman. Zis mon ti a kontan dir sa

Lagreman i annan li 3 sapit e 36 Lartik ki kapab lir konm swivan; dan sapit 1 nou vwar Lartik premye ki defini bann terminoloji ki ganny servi;

Lartik 2 i donn lobzektif sa lagreman ki dir Lagreman i ganny gide par lekite, drwa lasante, bann prensip e lapros pou anpese, prepare e reponn a pandemi son bi se pou donn dan en fason konpreansiv e efektif adres bann mankman e defi ki egziste lo nivo nasyonal, rezyonal e enternasyonal.

Lartik 3 i kouver bann prensip e lapros zeneral. Dan sa lartik mon fek site, tou sa bann prensip ki mon fek dir i trouve dan sa lartik. E dan sapit 2 i komans avek Lartik 4 ki koz lo prevansyon pandemi e sirveyans lasante piblik.

I demande ki tou pei pou korpore pou devlop e ranforsi prevansyon pandemi e kapasite sirveyans. Sa i enkli kapasite laboratwar pou teste, analiz rezilta e partaz lenformasyon pou ranforsi kapasite.

Sa i enkli devlopman *platform One Health* par tou pei pou pli byen konpran e zer bann maladi enfektye enkli rezistans avek antibiyotik.

Lartik 5 i koz plis lo *One Health* e konn le ensiste pou pei promot lapros *One Health* pou prevansyon maladi e byensir

pandemi, akoz nou konnen poudir maladi zannimo, plant ek imen.

I annan serten koneksyon e alor nou bezwen pran en lapros ki pli konpreansiv ler nou pe regard keksoz koumsa.

Lartik 6 i donn detay lo ki pei i bezwen fer, pou prepar sistenm lasante, servis esansyel e fonksyonman tout an respektan bann Lalwa e Polisi pei pou prevansyon soutenab pandemi.

Lartik 7 i kouver bann ... neseler pou bann pei pran pou investir dan resours imen e donn latansyon neseler, preparasyon, prevansyon.

E repons pou pandemi e asire ki servis esansyel i kontinyen. Formasyon i bezwen ganny priyorite neseler baze lo resours ki i annan.

Dan Lartik 8 i kouver *monitoring* e revi preparasyon evalyasyon pou anpes e reponn a en pandemi ler i arive. I osi eksplik devwar pei pou raport lo nivo preparasyon.

Dan Lartik 9 kot i koz lo resers devlopman esansyel e koman nou merit partaz rezilta resers ki annan an kont tout an prenan kont Lalwa pei.

Dan Lartik 10 i fer referans avek prodiksyon bann komodite relevan pou prepare e

pou reponn a en pandemi. I pe osi demann bann pei pou pran mezir pou mentenir prodiktivite tel ki tes, tel ki vaksen, tel ki latizann, e osi pou partaz teknolozi. Ankor tou lesanz i bezwen ganny respekste. Bann norm e bann Lezislasyon pei e norm enternasyonal.

Lo Lartik 11 ki koz lo transfer teknolozi e konnesans i demande ki pei i bezwen korpore avek lezot e prodikter bann prodwi lo bann term ki mityelman akseptab.

Lartik 12 i donn plis detay lo bann benefis e lenportans partaz lenformasyon teknik ek syantifik.

Lartik 13 i eksplik ki mannyer bann lasenn network resours anba l'OMS, an kolaborasyon avek bann furniser pou ganny organize, konmsa ki tou pei i a benefisyee espesyalman bann pei ki ankor pe devlope.

Lartik 14 i ranforsi regilasyon e demande ki pei i annan an plas regilasyon pou ede pou devlop en repons a lesansyel nesese pou nenport ki evantyalite, me osi ki ogard bann prodwi ki antre dan pei.

Lartik 15 i lo konpansasyon e layabilite.

16 i koz lo korperasyon kolaborasyon enternasyonal. Sa Lartik i demann bann pei ki

pou kolabore e pou korpore antre zot menm avek bann lorganizasyon rezyonal, enternasyonal pou formil bann mezir e prosedir e gidans pou prepare, anpese e reponn a en pandemi.

Dan 17 i apel pwen lapros enkliziv pou Gouvernman en sosyete an antye pou prepare e anpes en pandemi. Dan lartik 18 i lo kominikasyon e lenformasyon pou piblik. Bann Leta Manm i bezwen ogmant lakse e ranforsi lenformasyon syantifik pou popilasyon. Sa i enportan dan konba kont fo lenformasyon.

Lartik 19 i kapasite lenplimantasyon en sipor sa lartik pe lans lapel avek pei manm atraver bann lorganizasyon, pou ranforsi zot kapasite partaz lenformasyon syantifik e teknik e servi bann striktir enternasyonal ki egziste pou mobiliz resours nesese kot i manke.

Dan Lartik 20 i koz lo finansman kan mannyer pou kapab annan finansman soutenab pou prevansyon, pou anpese e preparasyon repons pandemi e i koz lo posibilite kontribisyon par pei.

Me i dir sa i pou ganny fer dan mwayen e propoze ki pou ganny fer dapre mwayen sak pei. Sapit 3 i koz lo bann

laranzman enstitisyonnèl e provizyon final. I ava koz lo formasyon en *Conference of Parties* en pe parey ki nou annan pou *climate change*. I koz lo drwa pou vote lo rapor ki sa *Conference of Parties* i ava fer lo sekretarya sa *Conference of Parties*.

E Lartik 25 lo lenplimantasyon sa Lagreman ki pou ganny gide par the chart of *United Nations* e Konstitisyon *I'OMS*, tout an rekonesan bann lezot Lalwa enternasyonal tel ki *International Health Regulations*.

E dan 6 i koz – 26 – 27 kot i koz lo prezervasyon e pour manm, manm i kapab sorti dan sa Lagreman. I koz lo kan manner lamannman i kapab ganny fer e i donn en *annex* dan 29 pou dir bann ki ti pe pran keksoz dan kan manner pou fer.

E Lartik 31 i koz lo kan manner sa sinyatir pou fer. I propoze ki si sa Lagreman in ariv en staz final e ki i prezante an Me 2024, si i diskite e i ganny en vot *two thirds* dan Lasanble, i kapab pase pou pei ki dakor avek pou sinyen.

I koz lo kan manner ratifikasyon e akseptans e laprouvasyon i ganny fer. E Lagreman i bezwen pas atraver prosis laprouvasyon ki Lalwa

sak pei e Lartik 39 i dir kan manner pou antre anfers ler kantite parti i a'n sinyen.

E Lartik 34 i donn detay lo ki manner dezakor pou ganny zere, e kote pou depositwar bann diferan lamannman protokol e tou sa.

E ankor an dernyenrer Lartik 36 i deklare ki tou teks ki pou ganny servi si bann teks i ganny aksepté dan Nasyon-z-Ini e ki osi *I'OMS* L i form par.

Sa dokiman i lo sit *I'OMS* e tou dimoun i kapab ganny akse avek. Alor mon a ankouraz tou dimoun pou lir sa dokiman pou bann ki pa ankor kapab ganny letan pou fer li e zot ava vwar e fer zot prop zizman lo son konteni.

Avan terminen Mr Speaker, mon le fer resorti ki sa Lagreman pa ankor konplet me son bann prensip i dan lavantaz tou pei. An se ki konsern preparasyon, prevansyon ek repons pou en prosen pandemi. I pou ganny prezante pou diskisyon an Me si in ariv sa staz final.

Mr Speaker, mon ti a konan osi enform Lasanble ki anba *I'OMS* ki i annan en lot Lagreman ki ti vin anfers depi 1969 – sa Lagreman ki *binding* i apel Regilasyon Enternasyonal pour Lasante.

Sa Lagreman in annan plizyer revizyon e pli gran revizyon ti ganny fer an 2005 e i pe osi ganny revize apre leson ki nou'n aprann avek *COVID-19* pou li vin pli byen kapab servi bann pei.

Regilasyon Enternasyonal pou Lasante, i sa striktir legal ki definir bann pei, e zot lobligasyon dan fason ki zot mannye levennman ek *emergency* lasante piblik ki annan potansyel pou pas en pei a lot.

Son bi orizinalman sete pou kontrol serten maladi enfektye. Bann devlopman en sanzman ki pe arive dan lemond bann pei manm in vwar, ki i neser ki sa regilasyon i kouver lezot lirezans lasante piblik.

Pour le moman, i annan omwen 300 propozisyon pou koman lamannman e group pe travay lo la e nou ekspekte ki sa revizyon, i pou anmenn en koerans avek sa nouvo Lagreman pandemi ki pe ganny devlope.

Mon oule osi dir ki serten lenformasyon ki pa neserman vre pe ganny dir. I annan ki dir ki nou vann ou souvrennte. Sa Lagreman i pa dan okenn fason dir sa – okontrer Lartik 3(2) i ranforsi sa e reaffirm nou souvrennte nasyonal, akoz dan

bokou lenstans i fer resorti ki aksyon pou ganny fer an akor avek Lalwa ki gouvern sa pei. I osi dir ki Lagreman pa pe respe drwa imen.

Ankor Lartik 3(1) i dir ki lenplimantasyon sa Lagreman i pou ganny fer an plen respe dinyite endividyel, drwa imen e drwa fondamanteal e laliberte. I dir ki ki *I'OMS* pou obliz nou pran vaksen, enpoz *lockdown* eksetera. *I'OMS* napa drwa fer sa! I napa sa pouvwar.

Sa bann tel desizyon i ganny pran lo nivo nasyonal an akor avek Lalwa Lasante Piblik ki egziste dan sak pei; ki nou bezwen donn en serten poursantaz nou Bidze Lasante pou lenplimantasyon sa Lagreman.

Ankor Lartik 20 i dir ki sa i a ganny fer dan mwayen ki sa pei i santi i kapab. Sa Lagreman Mr Speaker, i pou kapab anmenn benefis pou nou. I pe fer nou met nou pare pou en lot pandemi kan sa i ava arive par fer sir ki koman en pei, nou pare e lo nivo global pou annan mezir ki pou fer sir nou annan bokou plis korporasyon, kolaborasyon ek kordinasyon pou gard sa zenerasyon e zenerasyon fitir an sekirite lo kote lasante.

Nou bezwen gard antet toultan ki bakteri, ki viris, ki

fungus, ki nenport ki patozen pa pran kont bann laliny ki imen nou mete lo map pou deside ki teritwar e ki pou nasyon. Zot pa get kouler politik, ni nou groser, ni nou grander, ni nou lafors defans, ni nou lafors ekonomi.

Zot al kot i fer zot plezir san demann person permisyon; san demann person viza e pour sa rezon lemonn i bezwen travay ansanm pou fer fas sa ki bann patozen i kapab anmenn kot nou. Mersi Mr Speaker.

(APPLAUSE)

MR SPEAKER

Mersi Minis pou ou *statement*. Nou pou pran kestyon bann Manm. E pou permet bann zofisye partisip avek Minis, nou a pas dan Staz Komite. Mon rapel bann Manm ki *Standing Order 38* i fer kler ki size en *statement* i pa en size pou deba; kestyon i ganny permet pou klarifikasyon lo bann fe ki i annan dan sa *statement*. Nou a komans avek kestyon bann Manm ki'n lev lanmen, Onorab Esparon.

HON REGINA ESPARON

Mersi Mr Speaker. Mersi Minis ek delegasyon pou vin fer sa leklersisman, ki mon'n konpran tre byen. Mon annan zis en pti

klarifikasyon Minis. Ou'n dir poudir i annan apepre 300 amannman ki'n ganny propoze, eski Sesel i anvizaze anmenm okenn amannman? E si wi, dan ki *area*? Mersi.

MR SPEAKER

Mersi Onorab. Minis, ou a diriz ou *panel*?

MINISTER PEGGY VIDOT

Sesel i partisip dan sa bann diskisyon lo 2 nivo. I kapab fer lo baz endividyel koman en pei osinon i kapab fer li lo baz rezyonal, koman dan nou rezyon Lafrik.

Rezyon Lafrik, wi, i n anmenn serten propozisyon e proposal pou fer serten lamannman e ler in fer sa in diskite avek diferan pei e dan sa letan, Sesel i partisip dan sa bann diskisyon. Me ankor Onorab, sa i dan sa regilasyon enternasyonal pou Lasante. E i pa neserman dan sa Lagreman.

Dan Lagreman, wi, an annan diferan diskisyon avek rezyon e Sesel in partisipe ladan.

MR SPEAKER

Mersi Minis. Onorab Cosgrow.

HON WALLACE COSGROW

Mersi Mr Speaker. Bonn apre midi Minis ek ou tim. Minis, dan ou *statement* apre midi la, ou'n dir nou ki poudir sa Trete pa ankor pare - pa ankor finalize pa ankor pare.

Mon note ki sa *Intergovernmental Negotiating body* pou zwenn pou en 9enm fwa ant le 18-29 Mars pou kapab enkorpor bann diferan sanzman or diferan propozisyon ki annan pou met dan sa Trete.

Savedir i en Trete ki ankor an konstriksyon - ki ankor annan bann keksoz pou met ladan. E Minis mon ti ava kontan konnen akoz dan en *statement* ki ou'n fer an Zanbye, ou'n *commit* e ou'n dir ki Sesel pou sinyen - piblik - piblikman Minis, ou'n dir ki Sesel pou sinyen pou sinyen en Trete ki son bann detay pa ankor fini prepare.

So akoz Minis ki ou'n *commit* Sesel ladan e i annan konsern souvrennte, malgre ou'n dir ki poudir napa konsern souvrennte; i annan konsern, i annan *areas* kot *WHO will indicate* ki pou arive avek serten provizyon *dictate* avek serten pei.

So, dir nou akoz ki ou ou'n deside *commit* san konsilte avek pep Seselwa, san met devan nou Lasanble e dir nou ki poudir Sesel pou sinyen? Mersi.

MR SPEAKER

Mersi. Minis?

MINISTER PEGGY VIDOT

Sesel pa pe kapab sinyen. Sesel i dakor avek prensip annan en Lagreman, en lenstriman lo sa nivo e dan sa kad, wi, Sesel i donn son laprouvasyon. Me i pa ankor - nou pa kapab sinyen en teks ki pa ankor finalize.

HON WALLACE COSGROW

Mr Speaker, en klarifikasyon. Sete Minis li menm lo en *panel*, si mon pa tronpe an *Dubai* an Zanbye ki ti donn sa komitman lo lapar Sesel, koman Minis Lasante, ou ti dir Sesel pou sinyen! San konsiltasyon. Donn nou lesplikasyon!

MR SPEAKER

Non, mon krwar Minis in eklersi sa pwen poudir in eklersi. Minis, si ou annan keksoz pou azoute, lo sa ki ou'n dir - si ou santi ki ou'n fin reponn sa kekyon, nou a kapab *move to the next question*. Mon donn ou laparol.

MINISTER PEGGY VIDOT

Mr Speaker, mon'n reponn poudir koman Minis Lasante, mon'n dir ki nou dakor avek prensip en tel Lagreman. Sinyatir pa'n ganny diskite dan

summit e Lagreman in ganny diskite poudir an koman en prensip – an prensip si sa tel Lagreman i keksoz ki nou nou kapab siporte, wi.

E mon'n dir ankor dan sa *statement* akoz mon santi poudir i pou annan benefis pou Sesel. Me i tou depan – sinyatir i ava vin ler nou war draf final.

MR SPEAKER

Mersi Minis. Mon krwar ou'n fer sa kler. Nou a pran lot kestyon. Onorab Loze.

HON JOHAN LOZE

Mersi Mr Speaker. Minis, vi ki ou *statement* ozordi i lo *Pandemic Accords*, mon a zis met a ou latansyon ki tre byento, nou pou annan kestyon ki nou pou anvoye lo regilasyon lasante enternasyonal li menm, ki li i en prosesis separe ki pe ganny fer konzwentman avek *Pandemic Accords*.

Akoz laba osi nou annan serten konsern, me selman nou pa oule *load* deba ozordi dan bann fason ki pa nesaser.

Minis, mwan mon annan zis 2 leklersisman ki mon pe serse; premyerman ou'n dir nou poudir an 2005, Regilasyon Enternasyonal Lasante ti ganny amande, Minis i ti ganny amande an relasyon avek SARS, avek kriz SARS ki ti pe

pase globalman e *WHO* li i ti panse sa letan, ki i pou fer sa bann sanzman pou ede *manage* pandemi global.

Aprè *COVID-19* in vini in montre bann fay ki pa'n kapab ganny adrese par lamannman ki zot ti fer an 2005. La 2020 Linyon Eropéen i vini i propoz sa *Pandemic Accord* ki nou pe koz lo la ozordi, san ki i ti'n menm ganny letan pou asize, e gete ki *COVID* in fer – ki *COVID* pa'n fer.

Bon, Minis, mon met devan ou ki Sesel i form parti *COP* – i form parti tou sa bann Trete Lanvironnman e tou sa bann benefis ki ou'n donn nou la Sesel pou gannyen, i parey dan sa bann Trete *Global Warming* lot, lot, e nanryen pa marse. Koman en pei tyermonn nou pa ganny nanryen.

So, mon premye kestyon pou mwan demann ou, kwa Minis ki ou panse pou diferan la dan sa *Pandemic Accords* konpare avek sa ki ti arive an 2005 ki pa'n marse, e konpare avek bann lezot keksoz ki lo bann *global agenda* parey bann diskisyon ki pase dan *COP* ki Minis Joubert li menm ti dir napa benefis – nanryen pa marse.

E mon lot leklersisman ki mon le Minis, mon le konpran en pti pe, kan mannyer

Gouvernman i fonksyonnen, depi sa diskisyon in ganny *entamer* ou Minister Minis, ni ou 2 lazans ki akote ou, *not a word*; zot pa'n diskite nanryen isi ater – zot pa'n enform sa pep nanryen.

Kot nou al antann ou koze? Dan *Global Summit UAE*. So, mon oule konpran ki manner Gouvernman i fonksyonnen avek sa bann keksoz koumsa. Bomaten nou'n diskite enn ki ni *Cabinet*, ni Minis, ni Prezidan pa ti konnen-Lanmerik ki'n anonse. Mersi Mr Speaker.

MR SPEAKER

Bon, ou'n poz ou kestyon Onorab, mersi.

MINISTER PEGGY VIDOT

Mr Speaker, mon a dir mersi Onorab, pou son kestyon ki in demande ki sa ki mon krwar pou sanze avek sa Lagreman ki pe ganny devlope, an vi ki serten keksoz ki i dir in arive dan lezot – si oule sityasyon e zot krwar i pa pe marse.

I pou sanmenm sa rezon ki zisteman diskisyon pe ganny fer, pou fer sir ki dan sa Lagreman i met an plas bann gran striktir, bann gran keksoz ki pou ed pei. Akoz souvandfwa in annan diferans aköz pei pa ti prepare e sa i pe ganny

enkorpore. E nou kapab dir poudir si i ganny enkorpore i annan plis sans ganny marse ki si i reste – i pa ganny diskite ditou, osinon ganny mete dan sa Lagreman.

Onorab, ou'n demann mwan kan manner Gouvernman i marse? I pa mon devwar pou mwan vin dir ou sa. Mon krwar koman en Manm Lasanble, ou merit konnen ki manner Gouvernman i marse dan en pei. Mersi.

MR SPEAKER

Mersi. Onorab Clifford Andre.

HON CLIFFORD ANDRE

Mersi Mr Speaker. Bonn apre midi Minis avek ou delegasyon. Minis, ou'n eksplike ou'n dir ki ver Me ki pou annan posibleman finalizasyon sa dokiman.

Eski antretan letan i annan bann Lagreman ki pe ganny fer, eski i pou annan en nivo konsiltasyon ki zot in mazine pou met an plas, kot i a permet – mon konnen zot pa kapab fer ek tou dimoun. me ki a permet bann reprezantan lepep pou kapab ekoute e transmet zot konsern si pou annan okenn. Eski pou annan en nivo konsiltasyon ki pou ganny fer? Mersi.

MR SPEAKER

Mersi.

MINISTER PEGGY VIDOT

Mersi Onorab. Onorab, dek ki nou ganny teks final par - wi, nou ava met an plas e konsiltasyon ki nou santi poudir i esansyel e nesaser. Mersi.

MR SPEAKER

Mersi. Onorab Lemiel?

HON SYLVANNE LEMIEL

Mersi Mr Speaker. Bonn apre midi Minis avek delegasyon, tou dimoun ki a lekout. Minis, depi kan oubyen ki lannen petet ou ti kapab enform nou ki *WHO* ti'n agree pou li annan en Lagreman lo pandemik global? I pa fek komanse sa.

I bezwen i annan en pe letan pase, depi ki *WHO* in fer bann pei konnen poudir pou annan sa Lagreman – sirtou apre pandemik *COVID-19*.

So kan ki nou Sesel ti ganny enformen par *WHO* poudir nou pou annan sa Lagreman, ale al diskite, al regarde ki annan kekfwa ki pou kontribye zot pou zot met dan sa Lagreman? Kan ki ou ti okouran ou lo kote ou Minister ki konmkwa pou annan sa Lagreman?

E ki demars akoz si en pe letan ou'n okouran, nou pep Seselwa nou pa ti konnen. So zis donn nou sa detay kan e petet osi akoz depi kan ki ou'n konnen akoz ou pa'n vin devan petet pou ganny pwennvi Lepep Seselwa lo la? Mersi.

MR SPEAKER

Mersi. Minis.

HON PEGGY VIDOT

Mersi Mr Speaker. Mersi Onorab. Onorab, sa desizyon pa'n ganny pran par *WHO*. Sa desizyon in ganny pran par pei dan en sesyon kot *United Nation* bann Sef. Ti annan 36 Sefdeta ler zot ti pe diskite sa, zot ti dir. E zot in demann *WHO* pou *lead* pou devlop bann striktir pou diskite.

Sa Lagreman, sa bann diskisyon in dan domenn piblik depi sa lenterval e nenport ki dimoun ki pe ogarde ki pe pase ti kapab ganny vwar. Mon pa kapab anmenn kot ou; mon napa en teks ki mon ti pe kapab prezan pou sa lenterval.

E menm la parey mon dir sa teks ki'n ganny sirkile lafenn lannen pase, i teks ki nou pe kapab dizon komans travay en pe - travay lo la, me i pa dan en staz kot nou santi poudir mon vin prezante, mon vin prezant li dan ki fason. Me solman sa

lenformasyon in lo domenn piblik e tou dimoun ti'n kapab ganny akse.

MR SPEAKER

Mersi.

HON SYLVANNE LEMIEL

(Off-Mic)

MR SPEAKER

Onorab, mon a permet lezot dimoun demann kestyon – *sorry?* I annan en kestyon ki pa'n ganny reponn – wi, ale?

HON SYLVANNE LEMIEL

Mr Speaker, mon ti'n demann Minis, kan? Wi, bann pei – nou bann reprezantan in al laba, in demann *WHO* pou fer sa, mon'n demann ou ki lannen ki sa bann dimoun ti zwenn pou pran en desizyon lo la? I bezwen annan en kantite lannen depi ler nou'n ganny dir pou annan sa. Mersi.

MR SPEAKER

Wi, be Minis in reponn kestyon manner ou'n demande. Si –

(Off-Mic)

MR SPEAKER

...eskiz mwan, krwar mwan ekout mwan. Si Minis i annan keksoz ki i bezwen klarifye, i a klarifye. Si i santi in reponn sa

kestyon, nou pou kontinyen avek lot kestyon. Minis?

MINISTER PEGGY VIDOT

Mr Speaker, mon'n dir sa dan mon *statement* ki kan ki sa diskisyon in komanse. E mon krwar mon'n sit li e i la dan sa *statement*. Mersi.

MR SPEAKER

Mersi. Mon santi – non mon annan en pti problem ki mon'n war pe devlope. I sanble i annan Manm petet zot pa pe sey rode ki i annan dan sa Trete – dan sa konvansyon. Zot pe re esey rod defo lo sa ki Minis in fer.

Size – mon aksepte kritik ki kapab ganny fer, me selman size – size ki devan Lasanble se konteni sa konvansyon. Mersi. Onorab Spiro ou kestyon.

HON RACHEL SPIRO

Mersi Mr Speaker. Minis ek ou delegasyon bonn apre midi. Bonn apre midi tou dimoun ki a lekout... Mon pe refer lo sa ki mon bann koleg in dir pli boner dan Lasanble la. E Minis pe dir ki sa dokiman i dan domenn piblik. E letan i pe dir dan domenn piblik, vre i la pou tou dimoun ganny akse avek, me konbyen dimoun sitwayen la deor, ki vremen pe rod sa

lenformasyon ki Minis pe koz lo la, la?

Akoz menm la letan mon pe regarde, bann lorganizasyon non-governmental parey *ARID* zot in fer sorti en *press release*, konmkwa zot osi zot pa'n ganny konsilte e mon konnen poudir en kantite dokiman letan i dan...

MR SPEAKER

Eskiz mwan – ekskiz mwan – eskiz mwan, sa diskisyon i pa lo devwar Minis pou konsilte *ARID*. I lo konteni sa Trete. Mersi.

(Off-Mic)

MR SPEAKER

Onorab, si ou annan en kestyon lo sa konvansyon sa Trete silvouple.

HON RACHEL SPIRO

Mr Speaker, mon annan en kestyon, akoz bann dokiman letan i ankor dan diskisyon, i ganny anvoye kot lorganizasyon *non-governmental at least* pou ganny en lopinyon bann piblik la deor, lo ki zot panse, espesyalman lo en dokiman sansib parey sa enn, i napa konsiltasyon. I enportan ki i annan konsiltasyon e byen boner avan Me i arive ki piblik la deor i ganny konsilte. Mersi.

(APPLAUSE)

MR SPEAKER

Mersi. Kestyon Onorab William.

HON WAVEN WILLIAM

Mersi Mr Speaker. Minis, mon'n ekout ou atantivman. E mon anvi ou klarifye ki piblik la deor i kapab konpran egzaktman kwa ki pe arive. Letan ou pe dir ou pou – alegasyon in ganny dir ki ou'n dir ou pou sinyen, me eski ou'n donn en *timeline*?

Akoz si ou pa'n donn en *timeline* en dimoun i kapab dir "be mon pou *on behalf of Government*" me i pa vedir ki sa keksoz pe al ganny fer desito.

So, mon ti a kontan sa pti klarifikasyon akoz "pou" avek "pe" – "pe al sinyen" avek "pou sinyen" *means two different things*. Si ou ti kapab eklersi sa pou nou, silvouple. Mersi.

MR SPEAKER

Mersi. Minis?

MINISTER PEGGY VIDOT

Onorab, parey mon'n dir, dan diskisyon, dan *World Summit* ti napa sinyatir – ti demann sipor. An sipor wi, i la, akoz nou siport sa proses. Nou siport en Lagreman ki anmenn lemonn ansanm pou fer nou pli kapab

anpese reponn, prepare pou en pandemi.

Sinyen parey ou dir, i ava ganny diskite ler no annan an draf – en final. Ler i a ganny prezante la nou pa ava sinyen si nou an dakor. Me si nou santi poudir i annan keksoz ki anpes nou sinyen, nou pa a sinyen. Nou a siny ler dokiman i a dan nou faver.

MR SPEAKER

Mersi. Onorab Pillay?

HON SEBASTIEN PILLAY

Mersi Mr Speaker. Mr Speaker, mon'n *download* depi apepre 2 semenn dernyen versyon bann sanzman ki mon kapab ganny akse avek *online* sa dokiman. E sa i date an Oktob 2023 – dernyen versyon ki mwan mon annan. Mon pa konnen si i annan enn apre, akoz mannyer mon konpran, i difisil pou konnen ki konbyen versyon i annan. Dernyen versyon ki mwan i an Oktob 2023.

Prezan legzanp Parlman Angle, ki nou nou model lo la, ti an Mars 2021, Premye Minis Boris Johnson ti enform Parlman Angle ki pou annan sa linisyativ. Prezan an Novanm 2022, ti annan en petisyon ki ti ganny mete devan Lasanm Parlman, pou ki i annan en

deba lo sa size par Gouvernman Angle – 2022.

Sesel in okouran – Minis, ou'n dir nou Prezidan Larepublik in ale savedir Prezidan Ramkalawan avek ou ti okouran depi 2021 ki pou annan sa lakor.

An Zanvye 2024, ou enform Lepep Seselwa atraver sa *summit* ki nou'n war ti napa mon sipor, ki Sesel pou sinyen an Me 2024.

Prezan Mr Speaker, Minister Lasante i annan plizyer problem ki i pe *deal* avek li, *from long queues* kot *SOPD*, en *mess-up* konpletman avek sistenm lapwentman kot *SOPD*;

(Interruption)

HON SEBASTIEN PILLAY

...*casualty* ki koule;

(Interruption)

HON SEBASTIEN PILLAY

...mankman latizann...

MR SPEAKER

Onorab, i pa le moman pou ou vin tir defo avek Minister Lasante. Nou pe koz lo sa konvansyon silvouple. Al lo konteni sa konvansyon.

HON SEBASTIEN PILLAY

Mersi-mersi Mr Speaker. Mr Speaker, dan konteni sa konvansyon, son bann diferan iterasyon ki'n annan, nou war sa 36 lartik in ganny sanze plizyer fwa. E la Minis fer dir nou ler nou a dakor; ler Sesel pou dakor ek sa bann lartik – in sorti lo son pozisyon nou pou sinyen – ler nou a dakor.

Prezan nou regard sa bann lartik ki pertinan pou nou. Lartik 12 sa konvansyon ki'n bezwen sanze. E an plis ki sa, sa ki pou akonpany sa konvansyon, se bann *international regulations* ki nou, nou pa ankor konnen koman en pei nou. Koman popilasyon nou.

E koman en Lasanble, sa pa ankor vin devan nou. Alors Mr Speaker, kestyon pou Minis, eski ou pa krwar ki ou'n fail dan ou *duty of care* koman en Minis pou gard lepep Seselwa enformen lo sa konvansyon, e lo son lenpak lo nou souvrennte Mr Speaker, parey bann sanzman ki pe ganny –

MR SPEAKER

Onorab, ekskiz mwan – les mwan lir, *Standing Orders*. “*The Minister makes a statement to the Assembly on behalf of the Government on any matter on which the Government is responsible and the statements*

may not be debated, but at the discretion of the Speaker questions may be asked by Members for the purpose of elucidating any matter of fact with which the statement deals.”

Sa *statement* i deal avek sa konvansyon ki Minis in dir pe ganny diskite. So, kestyon i bezwen lo la. E mon'n tann ou ankor komans akiz Minis, lenkonpetans, *in fail* – mon pa krwar i size sa *item* ki devan nou. Eski ou annan okenn kestyon, oubyen eski nou kapab *move on*?

HON SEBASTIEN PILLAY

Mersi Mr Speaker. I paret ki nou annan difikilte pou nou kapab kestyon Minis Lasante dan sa Lasanble. So oule kontrol sa ki mon dir, mon ava seye pou fer Minis kapab reponn nou lo en eleman sa konvansyon.

(comments off-mic)

HON SEBASTIEN PILLAY

(Me pran plas Speaker anler ou!)

(Interruptions)

MR SPEAKER

Silvouple.

HON SEBASTIEN PILLAY

Mr Speaker, Gouvernman ti devret enform nou, ki bann sanzman ki pe ganny propoze dan diferan lartik sa Konvansyon - sirtou bann ki pou afekte nou popilasyon direkteman.

Malgre sa konvansyon i koz lo en relasyon ki i devret annan avek bann Lalwa Enternasyonal, i devret *subject to a wider public debate*, akoz ler ou pou enplimant serten konponan sa konvansyon, i pou annan serten restriksyon lo drwa sitwayen inetableman ki pou vini.

Par egzanp regard dan Lartik 12 Mr Speaker, e regard bann akse avek bann lenformasyon entelektyel ki pou vin ladan, e ki manner *WHO* i kontrol sa. Tou bann dokter ki la – mwan mon napa problem ek sa mwan – zot vin atraver sa protokol.

Me popilasyon avek bann sanzman dan pandemik i nesaser. E se pou sa rezon ki Minis ti devret fer en pli bon travay pou li eksplik nou bann eleman pertinan an se ki konsern nou souverente ki manner i pe ganny afekte, ki mon santi i pa'n fer. E se pour sa rezon Mr Speaker, ki mon pou repete ki ou pa dakor ek

mwan me ki sa Minis i devret *resign!*

(APPLAUSE)

MR SPEAKER

Ok, ale, ou'n dir Minis *resign*, me selman e ou pe rod deba. Mon oule petet rapel zot poudir manner tou sa bann konvansyon in vin devan Lasanble, napa en konvansyon ki mon rapel ki'n pas devan Lasanble avan, pou demann son lopinyon sa konvansyon.

Konvansyon i vin devan Lasanble ler Gouvernman in aksepte i met la, Lasanble i fer deba. Si Lasanble pa dakor, i rezete. *That's it! That's it!*

(comments off-mic)

MR SPEAKER

Onorab, mon fek dir ou manner Lasanble in fer toultan. Prezan i annan en manner. Manner Lasanble i fer toultan, Lasanble i debat lo konvansyon letan Gouvernman i met konvansyon dan Lasanble, sa i enn.

Prezan si Lasanble i le en deba lo en size, Lasanble i kapab anmenn Mosyon lo nenport size – Lasanble – Leader Lopozisyon i kapab met en Mosyon dan Lasanble pou dir Lasanble i dakor ki

Gouvernman i kontinyen avek sa negosyasyon.

Oubyen i kapab met en Mosyon dir, Lasanble i demande ki Gouvernman i aret sa negosyasyon. Si zot oule fer sa. Mersi.

(APPLAUSE)

MR SPEAKER

Kestyon, dir mwan mon pou dir si kestyon pa pe prodiktiv pou *elucidate the fact* parey i dir, nou pou bezwen zis aret demann kestyon. Onorab Georges ou annan en kestyon? Onorab Georges en kestyon silvouple.

HON BERNARD GEORGES

Mersi Mr Speaker. Mr Speaker, mon ti anv i zis prefas mon kestyon par dir avek Minis – remerci Minis pou en ekselan prezantasyon – pli bon ki sa Minis ti pou gate!

(APPLAUSE)

HON BERNARD GEORGES

Bokou, bokou in ganny dir apre midi lo konsiltasyon e mon kestyon Minis, mon premye kestyon, se Msyé René avan in fer koudeta li, lekel ki in vin konsilte avek?

(Interruptions off-mic)

HON BERNARD GEORGES

E ler- e ler...

(Interruptions off-mic)

MR SPEAKER

Onorab – Onorab sa kestyon, sa kestyon napa relevans avek sa size. Mon repet ankor – mon repet ankor, si kestyon-si kestyon pa kapab lo size ki devan Lasanble, mon pou termin kestyon. Mersi.

HON BERNARD GEORGES

Mersi Mr Speaker. Mr Speaker, mon kestyon pou Minis se sa enn; Minis, ou'n eksplik nou o komansman ou prezantasyon, eski mon'n byen konpran ou, ki en Gouvernman e sa Gouvernman pa en leksepsyon, ki negosye en Trete ler in fini negosye i sinyen.

E ler in fini sinyen anba Konstitisyon, i vin devan sa Lasanble Nasyonal kot sa Lasanble Nasyonal, i ganny apele pou ratifye sa ki Gouvernman in sinyen. E a sa moman fer tou konsiltasyon e fer deba lo la avan aksepte li? Eski mon'n byen konpran ou Minis?

Eski se sa prosedir ki ou arive dan sa enn Trete? Mersi Mr Speaker.

MR SPEAKER

Mersi. Minis, oule adres pwen?

HON PEGGY VIDOT

Mersi Mr Speaker. Mersi Onorab, pou ou kestyon. E i enn parey mon'n dir, ki pou swiv prosedir ki pou tou konvansyon ki pei in adopte, in pratike nou a swiv sa menm prosedir. Mersi.

MR SPEAKER

Mersi. Onorab Aglae, ou annan en kestyon?

HON EGBERT AGLAE

Mersi Mr Speaker. Bonn apre midi Minis e le de Dokter. I domaz ki pa sa ki'n arive Minis menm ou'n donn ou larepons. Mon kestyon alors Minis, i konm swivan;

2021, sa prosesis i an mars pou kapab vin avek sa *Pandemic Treaty* ki *WHO* dapre li 2024 i sipoze komans vin anfors; *ok* sa i enn.

Prezan baze lo sa Minis, nou, nou koz lo konsiltasyon ki enportan. Se sa ki lepep i anvi konnen- se sa ki sa bann *NGOs* i anvi trouve arive lo sa size.

Minis, eski bann konsiltasyon akoz dan lenplimantasyon sa Trete dan domestikasyon ki si Lasanble i pase, zot annan 2 tyer dayer, i pou annan bann konsekans

avek Polisi ek regilasyon. Eski zot in fer en *analysis* ki bann lefe ki i pou anmennen akoz i annan bokou pei ki pe komans *flag* serten drwa imen ki sa i kapab *reach*.

Eski zot in fer *analysis* pou met devan pep Seselwa, pou dir sa pou koumsa, sa i riske arive e la Lepep Seselwa i a pran en desizyon si i form parti sa Trete ou non? Mersi.

MR SPEAKER

Mon pa'n tro konpran egzaktaman ki pwen. Minis oule adres sa?

MINISTER PEGGY VIDOT

Mersi. Si mon'n byen konpran, i pe demande si nou pou swiv menm kalite prosedir ki nou'n servi pou nou fer – si nou ariv siny sa Trete kan i ganny prezante.

Sa Trete - *WHO* pa'n dir sa Trete pou vin anfors an 2024. In dir sa Trete i ava ganny prezante dan Lasanble Mondyal Lasante an Me, 2024. E si dimoun i pare pou sinyen, i a sinyen, me i vin anfors e i pou pran li – in eksplike dan son kontenir ki mannyer i a vin anfors, i pou pli long.

Mon pe konpran ou Onorab, si nou pou swiv menm mekanizm ki'n ganny swiv dan lepase, pou fer en Trete ganny

ratifye, ganny domestike *whichever* dimoun pe ogarde.

Mon'n fek dir ler Onorab Georges in demann mwan, wi nou ava swiv menm kalite prosedir. Mersi.

MR SPEAKER

Mersi. Mon pou repet *Standing Orders* ankor; *Questions*, “*the statement should not be debated but at the discretion of the Speaker, questions may be asked by Members.*”

Mon pou limit kestyon pou bann Manm ki'n lev lanmen ziska la e apre nou pou termin sa. Mon azout Onorab Gill, akoz i ti'n lev lanmen avan mon'n fer sa lanons – mon ava azout Onorab Gill.

Onorab Larue, ou kestyon?

HON FLORY LARUE

Mersi Mr Speaker. Bonn apre midi Minis. Minis. Lefe ki sa Lagreman i sipoze ganny prezante an Me, nou'n dir ki an relasyon avek Lartik 25 dan sa Lagreman i dir nou ki i mars ansanm avek *International Health Regulations*, ki li osi i anba lamannman e ou menm ou, ou'n dir nou ki i annan plis ki 300 amannman, eski nou pa santi ki i annan tro bokou amannman dan sa regilasyon, pou fer li pas koman zis en

dokiman ki'n ganny amande; lefe ki i vreman *stringent* lo ki i enplimante ladan?

E eski pei pou kontinyen avek sa prosesis amannman olye get li dan son totalite?

E lefe ki enn bann lartik ki pe ganny retire, i pou ganny delete dan son *existing form* kot i dir sa bout “*full respect for the dignity, human rights and the fundamental freedoms of persons*” i konpletman ganny retire e nouvo teks i ganny propoze, eski nou santi ki sa i laliny ki nou pou agree avek lo kote sa bann amannman, pou nou met anmars sa Lagreman? Mersi.

MR SPEAKER

Mersi. Dernyen pwen i an relasyon avek konteni Trete e mon permet li.

MINISTER PEGGY VIDOT

Mersi Onorab. Onorab, ou ti ava dir mwan ki lartik ki ou pe *quote* silvouple?

HON FLORY LARUE

Mersi Minister. Minister dan Lartik 25, limero 2 “*the parties recognized that WHO Pandemic Agreement and other relevant international instruments, including the international health regulations should be*

interpreted so as to be complimentary and compatible.”

Lefe ki *that regulations is now being amended the same time* nou pe siny sa Lagreman, ki pou le moman ou'n dir nou an Me 2024 i pou ganny prezante pou bann ki'n pare pou sinyen, eski nou pare pou antre ladan, lefe ki sa bann amannman pa ankor ganny fer?

I annan 300 amannman dan en dokiman ki annan zis 30 paz, eski nou devret al avek en dokiman ki date 1969 lo amannman olye reget li dan son totalite e fer li nef? Mersi.

MINISTER PEGGY VIDOT

Onorab, mersi pou ou kestyon ki pe demann en pe si oule klarifikasyon. Wi, sa *IHR* in ganny revize an 2005 epi in annan pli pti revizyon pli tar e menm ler *COVID* in vini, in annan serten lamannman.

Parey mon'n dir in annan propoze par diferan diferan pei, diferan group aprosan 300 amannman. E pour sa rezon an se moman la, i difisil pou diskite sa bann amannman, aköz i ankor amannman diferan group e ou a war si ou ogard tou sa laliny i annan bann propozisyon ki kontradir kanmarad.

Solman tousala in ganny mete dan sa dokiman ki an se

moman i lo *website*. In annan ankor travay ki'n ganny fer par en Komite Teknik ki'n pran tou sa bann amannman ki pe etidye, ki pe mete.

Nou koman en pei, nou pa ankor ganny anvoye sa bann diferan amannman. E pour sa rezon nou pe zis war sa enn pei in dir sa – sa enn dokiman ki'n ganny dir, strike this one out, met sa enn bout, me solman en desizyon pa ankor ganny pran lo nivo sa group ki pe travay lo la, ki sa ki zot pe mete, ki sa ki zot pe tire.

E ki fer ki si nou a diskite, par egzanp nou ava dir in dir sa mo "*non binding*" aköz en dimoun in dir tire, i pa neserman ki sa group ki pe travay lo la, i pe aksepte sa propozisyon.

E pour sa rezon, mannyer i ete la, i difisil pou diskite li, aköz ou pa konnen ki sa ki zot pe aksepte, ki sa ki zot pe rezete dan sa 300 propozisyon. Me solman sa ki nou konnen, se ki ler i a'n pare, i pou bezwen anmenn – annan serten koerans, e serten *alignment* avek sa Lagreman ki pe ganny propoze.

MR SPEAKER

Mersi. Wi, klarifikasyon lo ki ou'n demande Onorab?

HON FLORY LARUE

Wi, Minis pa'n reponn sa bout; eski nou pou kontinyen? Eski nou pou gard sa dat Me 2024 menm ki i dir ki serten pei ki pare pou sinyen, lefe ki sa konponan regilasyon ki mars ansanm ek li, anba li, li i pa ankor pare?

Ou pe siny en Lagreman ki li i donn pouvwat en lot set regilasyon ki li i pa ankor pare. So, nou pe siny li ki fer ki nou adopte larestan, san ki nou konnen ki kwa ki final. Alor sa 2 dat.

MR SPEAKER

Me sa i p depan lo pozisyon Sesel. I depan sa ki arive. Mersi.

Onorab Uranie, ou kestyon.

HON ROCKY URANIE

Mersi Mr Speaker. Bonn apre Minis avek ou delegasyon. Minis, mon'n tann ou non ki nou bezwen fer en kontribisyon si sa Lagreman i pase, nou bezwen fer en kontribisyon sorti dan Bidze.

An se moman parey ou konnen, Minister Lasante pe pas atraver en kantite bann problem, e nou napa sa kantite larzan. E ki bann kriter spesyal dapre ou pou ganny mete, pou determinen ki kantite kontribisyon nou koman en pti

leta zil, nou pou fer atraver sa Lagreman?

E ki bann kondisyon ki annan spesyal pou pti leta zil, si ou annan sa bann lenformasyon? Mersi.

MR SPEAKER

Mersi. Minis?

MINISTER PEGGY VIDOT

Onorab, mon napa sa lenformasyon pou pti leta zil, me solman sa ki i dir i, i dapre mwayen sa pei. Si sa pei napa mwayen pou li fer i pa fer. Si i annan mwayen i a fer. Mersi.

MR SPEAKER

Mersi. Onorab Hoareau, ou kestyon?

HON JOHN HOAREAU

Mersi Mr Chair. Mr Chair, mon kestyon ti zisteman baze lo zafer finansman. Se ki mwan mon ti anvi en pti klarifikasyon lo ki formil zot pe mazine pou servi dizon si i *GDP*? Oubyen si i *Vulnerable Index*, oubyen si i sa *5% of current health expenditure to pandemic*, ki kalite formil zot pe mazine zot pou servi *towards* kontribisyon Sesel ver sa Lagreman? Mersi.

MR SPEAKER

Mersi. Minis?

MINISTER PEGGY VIDOT

Onorab, pou le moman i napa okenn formil ki'n ganny deside e napa okenn desizyon ki'n ganny dir, konbyen sak pei pou peye. In dir si i annan kontribisyon i ava fer *according to* mwayen sa pei.

Me ler i ava annan en sekretarya ki a'n travay lo tou sa la, la zot ava mete. Me solman an prensip, se ki i pou *according to* mwayen me pa *according to GDP or anything* koumsa ki'n ganny propoze.

MR SPEAKER

Mersi. Onorab Gill.

HON CHURCHILL GILL

Mersi Mr Speaker. Bonn apre midi Minis. Minis mon annan 2 kestyon. Enn dan konteni bann diferan lartik ki ou'n mansyonnen. Ou'n mansyonn konpansasyon ek *liability*. Si ou kapab met dan ki konteks ki sa pou vini, akoz i annan Manm ki'n koz lo kontribisyon me sa i lanvers kot ou ou pe dir konpansasyon ek *liability*. Si ou kapab *contextualize* li, pou nou konpran dan ki sans ki sa i vini.

2enm pou sa vin anfers, eski i annan *minimum* pei ki ler in sinyen, sa i vin anfers, oubyen si de pei i sinyen i vin anfers menm? Mersi.

MR SPEAKER

Mersi. Minis?

MINISTER PEGGY VIDOT

Mersi Mr Speaker. Dr Gedeon i ava reponn lo la. Me an term ki kantite pei, an se moman i ankor pe an diskisyon ki kantite. 2 pei pa pou kapab fer li vin anfers e sa i ava ganny diskite, wi.

MR SPEAKER

Dr Gedeon?

DR JUDE GEDEON

Mersi Mr Speaker. Bonn apre midi tou bann Onorab prezan. Sa Lartik 15 lo konpansasyon ek *liability* i demande ki sak parti, oubyen sak pei i devlop bann stratezi nasyonal, pou zot fer sir ki an ka i annan bann demann pou fer konpansasyon apre ki en prodwi in ganny administre.

E zot annan sa stratezi e sa zouti pou zot kapab reponn a sa bann demann ki dimoun i kapab fer.

Sa i aplik plito pou bann prodwi medikal; par egzanp vaksen, bann serten lekipman, latizann. Sesel pa pe prodwi sa bann keksoz e sa pou tro aplik pou nou, me selman bann pei ki prodwi sa bann materyo medikal zot bezwen annan sa bann striktir an plas. Mersi.

MR SPEAKER

Mersi. Onorab Adelaide.

HON FRANCOIS ADELAIDE

Mersi Mr Chairman. Minis, dabor, les mwan felisit ou avek ou 2 *personnel* o bor ou akoz zot in kapab kontrol *COVID* e Seselwa in kapab sirmont sa evantyalite.

E mwan mon annan konfyans avek lekip lasante ki zot pou kapab fer en bon travay e zot pou pran bann bon desizyon.

(APPLAUSE)

HON FRANCOIS ADELAIDE

Mon kestyon alors, Minis, ler mon pe get sa Lagreman, mon pe konpran li poudir ki i pe fer – i pe fer sir ki i pe protez bann Leta ki petet i pou war li en pe pli mizer e ki ler petet ki ariv bann petet bann pandemik, bann ki annan larzan, i tant pou ganny priyorite lo bann ki napa.

E sa pou fer ki sa bann keksoz pe armonize, poudir tou pei ki pe siny sa, zot pou ganny en rekour e zot kapab sov zot pep.

Dabor, eski sa Lagreman i zis ou avek Prezidan Ramkalawan ki dakor, ouswa i en konsiltasyon avek ou lekip

medikal, pou zot kapab pran sa bon desizyon pour byennet Sesel? Mersi.

MR SPEAKER

Mersi. Minis?

MINISTER PEGGY VIDOT

Mersi Onorab. Mersi pou donn nou sa konpliman. Wi, i en Lagreman ki si nou dakor, si i reponn tou nou kestyon ki nou annan, i ava en Lagreman ki nou ava anmenn li koman en Lagreman ki pei in aksepte.

I pa ni pour mwan, i pa ni pou Prezidan, me i ava vin pou nou koman Lepep Seselwa pou protez nou pei, e vwar kan mannyer nou kapab ogmant sekirite lasante dan nou pei.

Si nou group dan Lasante, i travay lo sa bann keksoz, wi, definitivman nou pe bezwen *rely* lo nou bann teknisyen, nou bann dimoun ki konn size a profon e nou bann dimoun ki nou annan ki nou regard li koman nou *expert* nasyonal. Mersi.

MR SPEAKER

Mersi. Nou a termin la lo *statement*. Mon a remersye bann Manm lo kontribisyon e Minis e son delegasyon pou son prezantasyon e pour zot leksplikasyon adisyonnal.

Sa i met nou a lafen nou *Order Paper* pou ozordi. Mon zis anvi eklersi pou nou piblik ki demen pou napa *Sitting*; Lasanble pe fer en travay an prive, nou pou dan en seminar lo size lentelizans artifisyel e zis pou eksplike ki sa en size ki konsern Lasanble ki bokou Manm...

Premyerman ti en manm piblik ki ti anmenn sa size devan serten Manm e dan *Assembly's Business Committee*, bann *Leaders* ti dakor poudir zot Manm, wi, i enterese dan sa size e i en size ki pou enportan dan Lezislasyon a lavenir. E se pour sa ki nou'n aksepte fer sa seminar demen, kot tou Manm pou partisipe.

Bon, mon pa remersye zot. Nou a pas dan Staz Lasanble pou nou *adjourn* pou ozordi. Mersi, Lasanble i *adjourn*. Nou a rebran Mardi prosen.

(ADJOURNMENT)